



南史
二



リ 8
1735
178



08
1735
178



南史卷五

齊本紀下第五

廢帝鬱林王

廢帝海陵王

明帝

廢帝東昏侯

和帝

廢帝鬱林王諱昭業字元尚小字法身文惠太子長子也高帝為相王鎮東府時年五歲牀前戲高帝方令左右拔白髮問之曰兒言我誰耶答曰太翁高帝笑謂左右曰豈有為人作曾祖而拔白髮者乎即擲鏡鑷其後問訊高帝指示賓客曰我基於此四世矣及武帝即位封為南郡王時年十歲永明五年十一月戊子寇於



此係明治八年八月八日所購以贈資



氏蘭向爾甫

東宮崇正殿其日小會賜王公以下帛各有差給南郡王扶二人
七年有司奏給班劔二十人鼓吹一部高選友學禮絕羣王十一
年給阜輪三望車文惠太子薨立南郡王爲皇太孫居東宮其年
七月戊寅武帝崩皇太孫卽帝位大赦八月壬午詔稱遺詔以護
軍將軍武陵王曄爲衛將軍征南大將軍陳顯達卽本號並開府
儀同三司以尚書左僕射西昌侯鸞爲尚書令右僕射王晏爲左
僕射吏部尚書徐孝嗣爲右僕射癸未加司徒竟陵王子良位太
傅增班劔三十人蠲除三調及衆逋在今年七月三十日以前者
省御府及無用池田邸治減關市征稅先是每有蠲原之詔少無
事實督責如故是時西昌侯鸞任知朝政天下咸望風來蘇至此
恩信兩行海內莫不欣然九月辛酉追尊文惠皇太子爲世宗文
皇帝冬十月壬寅尊皇太孫太妃爲皇太后立皇后何氏十一月

庚戌魏人來聘辛亥立臨汝公昭文爲新安王曲江公昭秀爲臨
海王皇弟昭粲爲永嘉王

隆昌元年春正月丁未大赦改元加太傅竟陵王子良殊禮鎮軍
將軍西昌侯鸞卽本號爲大將軍給鼓吹一部親兵五百人以領
軍鄱陽王鏘爲尚書右僕射詔百僚極陳得失又詔王公以下各
舉所知辛亥祀南郊宥隆昌元年以來流人戊午拜崇安陵甲戌
使司徒參軍劉敬聘于魏二月辛卯祀明堂夏四月辛巳衛將軍
開府儀同三司武陵王曄薨戊子太傅竟陵王子良薨丁酉以驃
騎將軍廬陵王子卿爲衛將軍尚書右僕射鄱陽王鏘爲驃騎將
軍並開府儀同三司閏月丁卯以鎮軍大將軍西昌侯鸞卽本號
開府儀同三司五月甲戌朔日有蝕之秋七月癸巳皇太后令廢
帝爲鬱林王帝少美容止好隸書武帝特所鍾愛敕皇孫手書不

得妄出以貴之進退音吐甚有令譽生而爲竟陵文宣王所攝養常在表妃間竟陵王移任西州帝亦隨任焉性甚辯慧哀樂過人接對賓客皆欵曲周至矯情飾詐陰懷鄙慝與左右無賴羣小二十許人共衣食同臥起妃何氏擇其中貌美者皆與交歡密就富市人求錢無敢不與及竟陵王移西邸帝獨任西州每夜輒開後堂閣與諸不逞小人至諸營署中淫宴凡諸小人並逆加爵位皆疏官名號於黃紙使各囊盛以帶之許南面之日卽便施行又別作籥鉤兼善效人書每私出還輒扇籥封題如故故人無知者師史仁祖侍書胡天翼聞之相與謀曰若言之二宮則其事未易若與營署爲異人所毆打及犬物所傷豈直罪止一身亦當盡室及禍年各已七十餘生寧足吝邪數日中二人相係自殺二宮不知也武帝以旣陽縣寒人給事中綦母珍之代仁祖剡縣寒人馬澄

代天翼文惠太子每禁其起居節其用度帝謂豫章王妃庾氏曰阿婆佛法言有福生帝王家今見作天王便是大罪左右主帥動見拘執不如市邊屠酤富兒百倍文惠太子自疾及薨帝侍疾及居喪哀容號毀旁人見者莫不嗚咽裁還私室卽歡笑酣飲備食甘滋塋畢立爲皇太孫問訊太妃截壁爲閣於太妃房內往何氏間每入輒彌時不出武帝往東宮帝迎拜號慟絕而復蘇武帝自下輿抱持之寵愛日隆又在西州令女巫楊氏禱祀速求天位及文惠薨謂由楊氏之力倍加敬信呼楊婆宋氏以來人間有楊婆兒哥蓋此徵也武帝有疾又令楊氏日夜禱祈令宮車早晏駕時何妃在西州武帝未崩數日疾稍危與何氏書紙中央作一大喜字而作三十六小喜字繞之侍武帝疾憂容慘慙言發淚下武帝每言及存亡帝輒哽咽不自勝武帝以此謂爲必能荷負大業謂

曰五年中一委宰相汝勿厝意五年以後勿復委人若自作無成無所多恨臨崩執帝手曰阿奴若憶翁當好作如此再而崩大斂始畢乃悉呼武帝諸伎備奏衆樂諸伎雖畏威從事莫不哽咽流涕素好狗馬卽位未旬便毀武帝所起招婉殿以材賜閹人徐龍駒於其處爲馬埒馳騎墜馬面額並傷稱疾不出者數日多聚名鷹快犬以梁肉奉之及武帝梓宮下渚帝於端門內奉辭輶輶車未出端門便稱疾還內裁入閣卽於內奏胡伎鞞鐸之聲震響內外時司空王敬則問新除射聲校尉蕭坦之曰便如此不當忽忽邪坦之曰此政是內人哭響徹耳自山陵之後便於閣內乘內人車問訊往皇后所生母宋氏間因微服游走市里又多徃文帝崇安陵隧中與羣小共作諸鄙褻擲塗賭跳放鷹走狗雜狡獪帝旣失道朝事大小皆決之西昌侯鸞鸞有諫多不見從極意賞賜

左右動至百數十萬每見錢曰我昔思汝一個不得今日得用汝未武帝聚錢上庫五億萬齋庫亦出三億萬金銀布帛不可稱計卽位未朞歲所用已過半皆賜與諸不逞羣小諸寶器以相擊剖破碎之以爲笑樂及至廢黜府庫悉空其在內嘗裸袒著紅紫錦繡新衣錦帽紅縠禪雜采袒服好鬪雞密買雞至數千價武帝御物甘草杖宮人寸斷用之徐龍駒爲後宮舍人日夜在六宮房內帝與文帝幸姬霍氏淫通改姓徐氏龍駒勸長留宮內聲云度霍氏爲尼以餘人代之皇后亦淫亂齋閤通夜洞開內外淆雜無復分別中書舍人綦母珍之朱隆之直閤將軍曹道剛周奉叔並爲之羽翼西昌侯鸞屢諫不納旣而尼媪外入頗傳異語乃疑鸞有異志中書令何胤以皇后從叔見親使直殿省常隨后呼胤爲三父與胤謀誅鸞令胤受事胤不敢當依違杜諫乃止又謀出鸞於

西州中敕用事不復關諮鸞慮變先使蕭湛坦之等於省誅曹道剛朱隆之等率兵自尚書省入雲龍門戎服加朱衣於上比入門三失履王晏徐孝嗣蕭坦之陳顯達王廣之沈文季係進帝在壽昌殿裸身與霍氏相對聞外有變使閉內殿諸房間令闔人登與光樓望還報云見一人戎服從數百人急裝在西鍾樓下須臾蕭湛領兵先入宮帝走向愛姬徐氏房拔劍自刺不入以帛纏頸輿接出延德殿湛初入殿宿將士皆衛執弓楯欲戰湛曰所取自有入卿等不須動宿衛信之及帝出各欲自奮帝竟無一言出西弄遇弒年二十二昇尸出徐龍駒宅殯葬以王禮霍氏及廣昌君宋並賜死餘黨亦見誅先是文惠太子立樓館於鍾山下號曰東田太子屢游幸之東田反語爲顛童也武帝又於青溪立宮號曰舊宮反之窮廡也果以輕涓而至於窮又武帝時有小史姓皇名太

子武帝曰皇太子非名之謂於是移點於外易名爲犬子處士何點曰太子者天地之所懸三才之所係今化而爲犬不得立矣旣而文惠太子薨鬱林海陵相繼廢黜此其驗也永明中百姓忽著破後帽始自建業流於四遠貴賤翕然服之此服祇也帽自蕭湛之家其流遂遠天意若曰武穆文昭皆當滅而湛亦誅死之效焉廢帝海陵恭王諱昭文字季尚文惠太子第二子也永明四年封臨汝公鬱林王卽位改封新安王及鬱林廢西昌侯鸞奉帝纂統延興元年秋七月丁酉皇帝卽位大赦改元賜文武位二等以鎮軍大將軍開府儀同三司錄尚書事都督揚州刺史加班劍爲三十人封宣城郡公出鎮東城以尚書左僕射王晏爲尚書令以丹陽尹徐孝嗣爲左僕射以領軍將軍沈文季爲右僕射以車騎大將軍陳顯達爲司空以驃騎大將軍鄱陽王鏘爲司徒命宣城公

鸞甲仗百人入殿陳顯達王晏徐孝嗣蕭湛各五十人入殿八月
壬辰魏人來聘甲午以前司空王敬則爲太尉辛丑復置南蠻校
尉官甲辰詔使者觀省風化九月癸未誅新除司徒鄱陽王鏘中
書大將軍隨王子隆遣平西將軍王廣之誅南兗州刺史安陸王
子敬于是江州刺史晉安王子懋起兵遣中護軍王玄邈討誅之
乙酉又誅湘州刺史南平王銳郢州刺史晉熙王鈔南豫州刺史
宜都王鏗丁亥以衛將軍廬陵王子卿爲司徒以撫軍將軍桂陽
王鐸爲中軍將軍開府儀同三司冬十月丁酉加宣城公鸞黃鉞
進授都督中外諸軍事太傅領大將軍揚州刺史加殊禮進爵爲
王戊戌誅新除中軍將軍桂陽王鐸撫軍將軍衡陽王鈞侍中祕
書監江夏王鋒鎮軍將軍建安王子貞左將軍巴陵王子倫是時
宣城王鸞輔政帝起居皆諮而後行思食蒸魚菜太官令答無錄

公命竟不與辛亥皇太后令廢帝爲海陵王使宣城王入纂皇統
建武元年詔海陵王依漢東海王彊故事給虎賁旄頭畫輪車設
鍾箴宮縣十一月稱王有疾數遣御師往視乃殞之給溫明祕器
斂以竟冕之服大鴻臚監護喪事塋給輜輶車九旒大輅黃屋左
纛前後部羽葆鼓吹挽歌二部依東海王彊故事謚曰恭先是武
帝立禪靈寺於都下當世以爲壯觀天意若曰禪者禪也靈者神
明之目漢文帝晏駕而鼎業傾移也永明世市里小兒以鐵相擊
於地謂之鬪鑿鑿之爲言族也至是宗室族滅矣又武帝時以燕
支爲朱衣朝士皆服之及明帝以宗子入纂此又奪朱之效也時
又多以生紗爲帽半其裙而析之號曰倚勸先是人間語好云擾
攘建武至是朝士勸進實爲忽遽倚勸擾攘之言於是驗矣
高宗明皇帝諱鸞字景栖始安貞王道生之子也小字玄度少孤

高帝撫育過諸子宋泰豫元年爲安吉令有嚴能之名昇明中累遷淮南宣城二郡太守進號撫國將軍高帝踐祚封西昌侯位郢州刺史永明元年爲侍中領驍騎將軍王子侯舊乘纏帷車帝獨乘下帷儀從如素士公事混撓販食人擔火誤燒牛鼻豫章王以白武帝帝笑焉轉爲散騎常侍左衛將軍清道而行十年累遷尚書左僕射右衛將軍武帝遺詔爲侍中尚書令尋加鎮軍將軍給班劔二十人隆昌元年卽本號爲大將軍給鼓吹一部親兵五百人尋加中書監開府儀同三司海陵王立爲驃騎大將軍錄尚書事揚州刺史加都督增班劔爲三十人封宣城郡公鎮東府城給兵五千人錢二百萬布千匹九江事難假黃鉞事寧表送之尋加黃鉞都督中外諸軍事太傅領大將軍揚州牧增班劔爲四十人給幢絡三望車前後部羽葆鼓吹劔履上殿入朝不趨贊拜不名置

左右長史司馬從事中郎掾屬各四人封宣城王未拜太后令廢海陵王以上入纂高帝爲第三子羣臣三請乃受命建武元年冬十月癸亥皇帝卽位大赦改元文武賜位二等以太尉王敬則爲大司馬以司空陳顯達爲太尉乙丑詔斷遠近上禮丁卯詔自今雕文篆刻歲時光新可悉停省藩牧守宰或有薦獻事非任土嚴加禁斷十一月壬申日有蝕之帝宿沐浴不御內其日潔齋蔬食斷朝務屏人單衣恰危坐以至事畢追尊始安貞王爲景皇妃江氏爲懿后別立寢廟號陵曰修安封桂陽王鑠等諸王子皆爲列侯凡諸王侯得罪者諸子皆復屬藉又詔遣大使觀省四方癸酉革永明之制依晉宋舊典太子以師禮敬少傅甲戌進大司馬尋陽公王敬則等十三人爵邑各有差省新林苑先是百姓地者悉以還王廢南蠻校尉官己卯追崇妃劉氏爲敬皇后號陵曰興安

庚辰立皇子寶義爲晉安王寶玄爲江夏王寶源爲廬陵王寶實
爲建安王寶融爲隨郡王寶攸爲南平王甲申斷官長貢獻及私
餉遺以安陸昭王緬第二子寶晔襲封安陸王丁亥詔細作中署
材官車府凡諸王可悉開番假遽令休息戊子立皇子寶卷爲皇
太子賜天下爲父後者爵一級己丑詔東宮肇建遠近或有慶禮
可悉斷之永明中御史中丞沈深表百官年登七十者皆令致仕
並窮困私門庚子詔自縉紳年及可一遵永明七年以前銓叙之
科十二月庚戌宣德右僕射劉朗之游擊將軍劉璩之子坐不贍
給兄子致使隨母他嫁免官禁錮終身付之鄉論是歲魏孝文皇
帝遷都洛陽

二年春正月辛未降都下繫囚殊死以下詔王公以下各舉所知
內外羣僚各進忠言無有所諱魏攻豫司徐梁四州壬申遣鎮軍
王廣之督司州右衛將軍蕭坦之督徐州尚書右僕射沈文季督
豫州以拒魏己卯詔都下二縣有毀發墳隴宜修理乙未魏軍攻
鍾離徐州刺史蕭惠休破之丙申加太尉陳顯達使持節都督西
北道諸軍事丁酉內外纂嚴三月己未司州刺史蕭誕與衆軍攻
敗魏軍詔雍豫司南兗徐五州遭遇兵戎之家悉停今年稅調丙
寅停青州麥租魏軍自壽春退甲申解嚴夏四月己亥朔親錄三
百里內獄訟自外委州郡訊察三署徒隸原遣有差魏軍圍漢中
梁州刺史蕭懿拒退之五月甲午寢廟成詔監作長帥賜位一等
六月壬戌誅領軍蕭湛西陽王子明南海王子罕邵陵王子貞秋
九月己丑改封南平王寶攸爲邵陵王蜀郡王子文爲西陽王廣
漢王子峻爲衡陽王臨海王昭秀爲巴陵王永嘉王昭粲爲桂楊
王冬十月癸卯詔罷東田毀光興樓并詔水衡量省御乘乙卯納

皇太子妃褚氏大赦王公以下班賜各有差斷四方上禮十二月
丁酉詔晉帝諸陵悉皆修理并增守衛吳晉陵失稔之鄉蠲三調
有差

三年春正月丁酉以陰平王楊昺子崇祖爲沙州刺史封陰平王
二月己巳詔申明守長六周之制事竟不行乙酉詔以去歲魏攻
緣邊諸州郡將士有臨陣及病死者並送還本土三月壬午詔車
府乘輿有金銀飾者皆剔除之夏四月魏軍攻司州櫟城戍主魏
僧嶠擊破之冬閏十二月戊寅皇太子冠賜王公以下帛各有差
爲父後者賜爵一級斷遠近上禮

四年春正月庚午大赦庚辰詔人產子者蠲其父母調役一年又
賜米十斛新婚者蠲夫役一年壬辰誅尚書令王晏二月以尚書
左僕射徐孝嗣爲尚書令秋八月甲午追尊景皇所生王氏爲恭

太后魏軍攻沔北冬十月又通司雍二州甲戌遣太子中庶子蕭
衍右軍司馬張稷禦之十一月丙辰以氏楊靈珍爲北秦刺史封
仇池公武都王十二月丁丑遣度支尚書崔慧景率衆救雍州
永泰元年春正月癸未朔大赦中軍大將軍徐孝嗣卽本號開府
儀同三司沔北諸郡爲魏所攻相繼亡敗新野太守劉忌隨宜應
接食盡煮土爲粥而救兵不至城被尅死之乙巳遣太尉陳顯達
持節救雍州丁未誅河東王鉉臨賀王子岳西陽王子文衡陽王
子峻南康王子琳永陽王子珉湘東王子建南郡王子夏巴陵王
昭秀桂陽王昭粲二月癸丑遣左衛將軍蕭惠休假節援壽陽辛
未豫州刺史裴叔業敗魏軍于淮北三月甲午蠲雍州遇魏軍之
縣租布戊申詔增仲尼祭秩上以疾患不瘳望氣者云宜改元夏
四月甲寅大赦改元文武賜位二等己未立武陵昭王子子坦爲

衡陽王丁丑大司馬會稽太守王敬則舉兵反五月壬午遣輔國將軍劉山陽率軍東討乙酉斬敬則傳首建鄴曲赦浙東吳晉陵等七郡秋七月己酉帝崩于正福殿年四十七遺詔徐孝嗣可重申八命中書監本官悉如故沈文季可尚書左僕射常侍護軍如故江祏可右僕射江祀可侍中劉暄可衛尉卿軍政大事委陳太尉內外衆事無大小委徐孝嗣遙光坦之江祏其大事與沈文季江祀劉暄參懷心腹之任可委劉俊蕭惠休崔慧景羣臣上謚曰明皇帝廟號高宗塋興安陵帝明審有吏才持法無所借制御親幸臣下肅清驅使寒人不得用四幅繖大存儉約罷武帝所起新林苑以地還百姓廢文惠太子所起東田斥賣之永明中輿輦舟乘悉剔金銀還主衣庫以牙角代之嘗用皂莢訖授餘滌與左右曰此猶堪明日用大官進御食有裹蒸帝十字畫之曰可四片破

之餘充晚食而武帝掖庭中宮殿服御一無所改其儉約如此性猜忌亟行誅戮信道術用計數每出行幸先占利害簡於出入將南則詭言之北皆不以實竟不南郊初有疾無輟聽覽羣臣莫知及疾篤敕臺省府署文簿求白魚以爲藥外始知之身衣絳衣服飾皆赤以爲厭勝巫覡云後湖水頭經過宮內致帝有疾帝乃自至太官行水溝左右啟太官無此水則不立決意塞之欲南引淮流會崩事寢

廢帝東昏侯諱寶卷字智藏明帝第二子也本名明賢明帝輔政後改焉建武元年立爲皇太子永泰元年七月己酉明帝崩太子卽皇帝位八月庚申鎮北將軍晉安王寶義進號征北大將軍開府儀同三司冬十月己未詔刪省律科癸亥詔蕭坦之江祏更直殿省總監宿衛辛未詔劉暄江祏更直延明殿省十一月戊子立

皇后褚氏庚寅尚書令徐孝嗣議王侯貴人昏連昏以真銀盃益
出近俗又牢燭侈縷亦虧曩制今除金銀連鎖自餘新器悉用埏
陶牢燭華侈亦宜停之奏可

永元元年春正月戊寅朔大赦改元辛卯祀南郊丁酉改封隨王
寶融爲南康王安陸王寶暉爲湘東王竟陵王昭胃爲巴陵王二
月太尉陳顯達敗績于馬圈夏四月丙午朔魏孝文皇帝崩己巳
立皇子誦爲皇太子大赦賜爲父後者爵一級五月癸亥加撫軍
大將軍始安王遙光開府儀同三司六月甲子詔原雍州今年三
調秋七月辛未淮水變赤如血丙戌殺尚書右僕射江昶侍中江
祀地震自此至來歲晝夜不止小屋多壞丁卯都下大水死者甚
衆賜死者材器並加振恤八月乙巳蠲遇水資財漂蕩者今年調
稅又詔爲馬圈戰亡將士舉哀丙辰揚州刺史始安王遙光據東

反詔曲赦都下中外戒嚴遣領軍將軍蕭坦之致討戊午斬遙光
傳首己巳以尚書令徐孝嗣爲司空以領軍蕭坦之爲尚書左僕
射閏月丙子以江陵公寶覽爲始安王九月甲辰殺尚書左僕射
蕭坦之右衛將軍曹武戊午殺領軍將軍劉暄壬戌以頻殺大臣
大赦冬十月乙未誅尚書令新除司空徐孝嗣右僕射新除鎮軍
將軍沈文季庚子以吳興太守蕭惠休爲尚書右僕射辛丑以侍
中王亮爲左僕射十一月丙辰太尉江州刺史陳顯達舉兵反於
尋陽乙丑加護軍將軍崔慧景平南將軍督衆軍南討十二月甲
申陳顯達至都宮城嚴警乙酉斬顯達傳其首餘黨盡平

二年春正月庚午詔討豫州刺史裴叔業二月己丑叔業病死兄
子植以壽春降魏三月乙卯以平西將軍崔慧景攻壽春夏四月
丙午尚書右僕射蕭惠休卒丁未崔慧景於廣陵反舉兵內向壬

子命右衛將軍左興盛督都下水步衆軍禦之南徐州刺史江夏王寶玄以京城納慧景乙卯遣中領軍王瑩率衆軍屯北籬門壬戌慧景至瑩等敗績甲子慧景入建鄴臺城內閉門拒守豫州刺史蕭懿興兵入援己巳以懿爲尚書右僕射癸酉慧景棄衆走斬之詔曲赦都下及南徐南兗二州乙亥以新除尚書右僕射蕭懿爲尚書令丙子以中領軍王瑩爲尚書右僕射五月己酉江夏王寶玄伏誅壬子赦己丑曲赦都下及徐兗二州六月庚寅車駕於樂游苑內會如三元都下放女人觀秋七月甲申夜宮內火唯東閣內明帝舊殿數區及太極以南得存餘皆蕩盡冬十月己亥殺尚書令蕭懿十一月甲寅西中郎長史蕭穎胄起兵於荊州十二月雍州刺史蕭衍起兵於襄陽是歲魏宣武皇帝景明元年三年春正月丙申朔日有融之帝與宮人於閱武堂元會皇后正

位闈人行儀帝戎服臨視丁酉以驃騎大將軍晉安王寶義爲司徒以新除撫軍將軍建安王寶寅爲車騎將軍開府儀同三司乙巳長星見竟天辛亥祀南郊大赦詔百官陳讜言二月丙寅乾和殿西廂火壬午詔遣羽林兵征雍州中外纂嚴始內橫吹五部於殿內晝夜奏之壬戌蚩尤旗見三月乙巳南康王寶融卽皇帝位於江陵癸丑遣平西將軍陳伯之西征六月蕭穎胄弟穎孚起兵廬陵戊子赦江州安成廬陵二郡秋七月癸巳曲赦荆雍二州雍州刺史張欣泰前南譙太守王靈秀率石頭文武奉建安王寶寅向臺至杜姥宅宮門閉乃散走丙辰龍鬪于建康淮激水五里八月辛卯以太子左率李居士總督西討諸軍事屯新亭九月甲辰蕭衍至南豫州輔國將軍監南豫州事甲冑軍二萬人於姑熟奔歸丙辰李居士與衍軍戰於新亭見敗冬十月甲戌王珍國又戰

敗於朱雀航戊寅寧朔將軍徐元瑜以東府城降青冀二州刺史
桓和入衛屯東宮尋亦降衍於是閉宮城門自守十二月丙寅新
除雍州刺史王珍國侍中張稷率兵入殿殺帝時年十九帝在東
宮便好弄不喜書學明帝亦不以為非但勗以家人之行令太子
求一日再入朝發詔不許使三日一朝在宮嘗夜捕鼠達旦以為
笑樂明帝臨崩屬後事以隆昌為戒曰作事不可在人後故委任
羣小誅諸宰臣無不如意性訥澀少言不與朝士接欲速墜惡靈
在太極殿徐孝嗣固爭得踰月每當哭輒云喉痛太中大夫羊闡
入臨無髮號慟俯仰憤遂脫地帝輟哭大笑謂宦者王寶孫曰此
謂禿秋啼來乎自江祐始安王遙光等誅後無所忌憚日夜於後
堂戲馬鼓譟為樂合夕便擊金鼓吹角令左右數百人叫雜以羌
胡橫吹諸伎常以五更就臥至晡乃起王侯以下即朔朝見晡後

方前或際暗遣出臺閣案奏月數十日乃報或不知所在闔豎以
紙包裹魚肉還家並是五省黃案二年元會食後方出朝賀裁竟
便還殿西序寢自己至申百僚陪位皆僵仆菜色比起就會怒遽
而罷太子所生母黃貴嬪早亡令潘妃母養之拜潘氏為貴妃乘
臥輿帝騎馬從後著織成袴褶金薄帽執七寶縛稍又有金銀校
具錦繡諸帽數十種各有名字戎服急裝縛袴上著絳衫以為常
服不變寒暑陵冒雨雪不避阨穽馳騁渴乏輒下馬解取腰邊蠡
器酌水飲之復上馳去馬乘具用錦繡處患為雨所濕織雜采珠
為覆蒙備諸雕巧教黃門五六十人為騎客又選營署無賴小人
善走者為逐馬鷹犬左右數百人常以自隨奔走往來略不暇息
置射雉場二百十六處翳中帷帳及步障皆給以綠紅錦金銀鏤
弩牙瑋瑁帖箭每出輒與鷹犬隊王徐令孫媒翳隊王俞靈韻齊

馬而走左右爭逐之又甚有筋力牽弓至三斛五斗能擔幢初學
擔幢每傾倒在幢杪者必致踣傷其後白虎幢七丈五尺齒上擔
之折齒不倦擔幢諸校具服飾皆自製之綴以金華玉鏡衆寶舍
人主書及至左右主帥並皆侍側逞諸變態曾無愧顏始欲騎馬
未習其事俞靈韻爲作木馬人在其中行動進退隨意所適其後
遂爲善騎陳顯達卒漸出游走不欲令人見之驅斥百姓唯置空
宅而已是時率一月二十餘出旣往無定處尉司常慮得罪東行
驅西南行驅北應旦出夜便驅逐吏司奔驅叫呼盈路打鼓踢圍
鼓聲所聞便應奔走臨時驅迫衣不暇披乃至徒跣走出犯禁者
應手格殺百姓無復作業終日路隅從萬春門由東宮以東至郊
外數十里皆空家盡室巷陌縣幔爲高障置人防守謂之屏除高
障之內設部伍羽儀復有數部皆奏鼓吹羌胡伎鼓角橫吹夜反

火光照天每三四更中鼓聲四出幟戟橫路百姓喧走士庶莫辯
或於市肆左側過親幸家環繞宛轉周徧都下老小震驚啼號塞
道處處禁斷不知所過疾患困篤者悉捫移之無人捫者扶匍道
側吏司又加捶打絕命者相係從騎及左右因之入富家取物無
不蕩盡工商莫不廢業樵蘇由之路斷至於乳婦昏姻之家移產
寄室或輿病棄屍不得殯葬有棄病人於青溪邊者吏懼爲監司
所問推置水中泥覆其面須臾便死遂失骸骨前魏興太守王敬
賓新死未斂家人被驅不得留視及家人還鼠食兩眼都盡如此
非一又嘗至沈公城有一婦人當產不去帝入其家問何獨在答
曰臨產不得去因剖腹看男女又長秋卿王儼病篤不聽停家死
於路邊丹陽尹王志被驅急狼狽步走惟將二門生自隨藏朱雀
航南酒壚中夜方得羽儀而歸喜游獵不避危險至蔣山定林寺

一沙門病不能去藏於草間爲軍人所得應時殺之左右韓暉光曰老道人可念帝曰汝見麀鹿亦不射邪仍百箭俱發故貴人富室者皆數處立宅以爲避圍之舍每還宮常至三更百姓然後得反禁斷又不卽通處處屯咽或泥塗灌注或冰凍嚴結老幼啼號不可聞見時人以其所圍處號爲長圍及建康城見圍亦名長圍識者以爲讖焉三年殿內火合夕便發其時帝猶未還宮內諸房閣已閉內人不得出外人又不敢輒開比及開死者相枕領軍將軍王瑩率衆救火太極殿得全內外叫喚聲動天地帝三更中方還先至東宮慮有亂不敢使人參覘審無異乃歸其後出游火又燒璿儀曜靈等十餘殿及栢寢北至華林西至祕閣三千餘間皆盡左右趙鬼能讀西京賦云栢梁旣災建章是營於是大起諸殿芳樂芳德仙華大興含德清曜安壽等殿又別爲潘妃起神仙永

壽玉壽三殿皆巾飾以金璧其玉壽中作飛仙帳四面繡綺窗間盡盡神仙又作七賢皆以美女侍側鑿金銀爲書字靈獸神禽風雲華炬爲之玩飾椽桷之端悉垂鈴佩江左舊物有古玉律數枚悉裁以鈿笛莊嚴寺有王九子鈴外國寺佛面有光相禪靈寺塔諸寶珥皆剝取以施潘妃殿飾性急暴所作便欲速成造殿未施梁桷便於地畫之唯須宏麗不知精密酷不別畫但取絢曜而已故諸匠賴此得不用情又鑿金爲蓮華以帖地令潘妃行其上曰此步步生蓮華也塗壁皆以麝香錦幔珠簾窮極其麗繁役工匠自夜達曉猶不副速乃剔取諸寺佛刹殿藻井仙人騎獸以充足之武帝興光樓上施青漆世人謂之青樓帝曰武帝不巧何不純用瑠璃潘氏服御極選珍寶主衣庫舊物不復周用貴市人間金銀寶物價皆數倍虎珀釧一隻直百七十萬都下酒租皆折輸金

以供雜用猶不能足下揚南徐二州橋桁塘埭丁計功爲直斂取見錢供太樂主衣雜費由是所在塘瀆悉皆隳廢又訂出雄雉頭鶴氅白鷺縷百品千條無復窮已親倖小人因緣爲姦科一輸十又各就州縣求爲人輸準取見直不爲輸送守宰懼威口不得道須物之處以復重求如此相仍前後不息百姓困盡號泣道路少府大官凡諸市買事皆悉速催求相係吏司奔馳遇便虜奪市廛離散商旅靡依又以閔武堂爲芳樂苑窮奇極麗當暑種樹朝種夕死而復種率無一生於是徵求人家望樹便取毀徹墻屋以移置之大樹合抱亦皆移掘插葉繫華取玩俄頃刻取細草來植階庭烈日之中至便焦燥紛紜往還無復已極山石皆塗以采色跨池水立紫閣諸樓壁上畫男女私褻之像明帝時多聚金寶至是金以爲泥不足周用令富室買金不問多少限以賤價又不還直

張欣泰嘗謂舍人裴長穆曰宮殿何事頓爾夫以秦之富起一阿房而滅今不及秦一郡而頓起數十阿房其危殆矣答曰非不悅子之道顧言不用耳潘妃放恣威行遠近父寶慶與諸小共逞姦毒富人悉誣爲罪田宅資財莫不啟乞或云寄附隱藏復加收沒計一家見陷禍及親隣又慮後患男口必殺明帝之崩竟不一日蔬食居處衣服無改平常潘妃生女百日而亡制斬衰經杖衣悉麤布羣小來弔盤旋地坐舉手受執蔬膳積旬不聽音伎左右直長閹豎王寶孫諸人共營有羞云爲天子解菜又於苑中立店肆模大市日游市中雜所貨物與宮人閹豎共爲禪販以潘妃爲市令自爲市吏錄事將鬪者就潘妃罰之帝小有得失潘則與杖乃敕虎賁威儀不得進大荆子閤內不得進實中荻雖畏潘氏而竊與諸姊妹淫通每游走潘氏乘小輿宮人皆露禪著綠絲屣帝自

戎服騎馬從後又開渠立埭躬自引船埭上設店坐而屠肉于時
百姓歌云闕武堂種楊柳至尊屠肉潘妃酤酒又偏信蔣侯神迎
來入宮晝夜祈禱左右朱光尚詐云見神動輒諮啟並云降福始
安之平遂加位相國末又號爲靈帝車服羽儀一依王者又曲信
小祠日有十數師巫魔媪迎送紛紜光尚輒託云神意范雲謂光
尚曰君是天子要人當思百全計光尚曰至尊不可諫正當託鬼
神以達意耳後東入樂游人馬忽驚以問光尚光尚曰向見先帝
大曠不許數出帝大怒拔刀與光尚等尋覓既不見處乃縛菰爲
明帝形北向斬之懸首苑門上自永元以後魏每來伐繼以內難揚
南徐二州人丁三人取兩以此爲率遠郡悉令上米準行一人五
十斛輸米旣畢就役如故又先是諸郡役人多依人士爲附隸謂
之屬名又東境役苦百姓多注籍詐病遣外醫巫在所檢占諸屬

名并取病身凡屬名多不合役止避小小假並是役蔭之家凡注
病者或已積年皆攝充將役又追責病者租布隨其年歲多少銜
命之人皆給貨賂隨意縱捨又橫調徵求皆出百姓羣小以陳顯
達下數日便敗崔慧景圍城正得十日及蕭衍師至亦謂爲然裹
糧食樵芻凡所須物爲百日備帝謂茹法珍曰須來至白門前當
一決及至近郊乃聚兵爲固守計召王侯分置尚書都坐及殿省
尚書舊事悉充紙鎧使冠軍將軍王珍國領三萬人據大桁莫有
鬪志遣王寶孫督戰呼爲王侯子寶孫切罵諸將帥直閣將軍席
豪發憤突陣死豪驍將也旣斃衆軍於是土崩軍人從朱雀觀上
自投及赴淮水死者無數於是閉城自守城內軍事委王珍國克
州刺史張稷入衛以稷爲副實甲猶七萬人帝著烏帽袴褶備羽
儀登南掖門臨望又虛設鎧馬齋仗千人皆張弓拔白出東掖門

稱蔣王出盪又受刀敕等教著五音兒衣登城望戰還與御刀左右及六宮於華光殿立軍壘以金玉爲鎧仗親自臨陣詐被創勢以板柵將去以此厭勝又於闕武堂設牙門軍頓每夜嚴警帝於殿內騎馬於鳳莊門入徽明門馬被銀蓮葉具裝鎧雜羽孔翠寄生逐馬左右衛從晝眠夜起如平常聞外鼓吹叫聲被大紅袍登景陽樓望弩幾中之衆皆怠怨不爲致力募兵出戰至城門數十步皆坐甲而歸慮城外有伏兵乃燒城傍諸府署六門之內皆盡城中閭道西掖門向相聚爲市販死牛馬肉蕭衍長圍旣立塹柵嚴固然後出盪屢戰不捷帝猶惜金錢不肯賞賜茹法珍叩頭請之帝曰賊來獨取我邪何爲就我求物後堂儲數百具榜啓爲城防帝曰擬作殿竟不與城防巧手而悉令作殿晝夜不休又催御府細作三百人精仗須圍解以擬屏除金銀雕鏤雜物倍急於常法

珍蟲兒又說帝曰大臣不留意使圍不解宜悉誅之珍國張稷懼禍乃謀應蕭衍以計告後閤舍人錢強強許之密令遊盪王崔叔智夜開雲龍門稷及珍國勒兵入殿分軍又從西上閣入後宮御刀豐勇之爲內應是夜帝在含德殿吹笙歌作女兒子臥未熟聞兵入趨出北戶欲還後宮清曜閣已閉閤人禁防黃泰平刀傷其膝仆地顧曰奴反邪直後張齊斬首送蕭衍宣德太后令依漢海昏侯故事追封東昏侯

和帝諱寶融字智昭明帝第八子也建武元年封隨郡王永元元年改封南康王出爲西中郎將荊州刺史督九州軍事二年十一月甲寅長史蕭穎胄奉王舉兵其日太白及辰星俱見西方乙卯教纂嚴丙辰以雍州刺史蕭衍爲使持節都督前鋒諸軍事戊午衍表勸進十二月乙亥羣僚勸進並不許壬辰驍騎將軍夏侯亶

自建鄴至江陵稱宣德太后令西中郎將南康王宜纂承皇統光臨億兆可且封宣城王相國荊州牧加黃鉞置僚屬三年正月乙巳王受命大赦唯梅虫兒茹法珍等不在例是日長星見竟天甲寅建牙于城南二月己巳羣僚上尊號立宗廟在南北郊

中興元年春二月乙巳皇帝即位大赦改永元三年爲中興文武賜位二等是夜彗星竟天以相國左長史蕭穎胄爲尚書令加雍州刺史蕭衍尚書左僕射都督征討諸軍以晉安王寶義爲司空廬陵王寶源爲車騎將軍開府儀同三司丙午有司奏封庶人寶卷爲零陵侯詔不許又奏爲涪陵王詔可夏四月戊辰詔凡東討衆軍及諸向義之衆普復除五年秋七月丁卯魯山城王孫樂祖以城降己未郢城主薛元嗣降八月丙子平西將軍陳伯之降九月己未詔假黃鉞蕭衍若定京邑得以便宜從事冬十一月壬寅

尚書令鎮軍將軍蕭穎胄卒十二月丙寅建康城平己巳宣德皇太后令以征東大將軍蕭衍爲大司馬錄尚書驃騎大將軍揚州刺史封建安郡公依晉武陵王遵承制故事壬申改封建安王寶寅爲鄱陽王癸酉以司徒揚州刺史晉安王寶義爲太尉領司徒乙酉以尚書右僕射王瑩爲左僕射

二年春正月戊戌宣德皇太后臨朝入居內殿壬寅大司馬蕭衍都督中外諸軍事加殊禮己酉以大司馬長史王亮爲守尚書令甲寅加大司馬蕭衍位相國梁公備九錫禮二月壬戌誅湘東王寶暉丙戌進梁公蕭衍爵爲王三月辛丑鄱陽王寶寅奔魏誅邵陵王寶攸晉熙王寶貞庚戌車駕東歸至姑熟丙辰遜位于梁丁巳廬陵王寶源薨四月辛酉詔至皇太后遜居外宮梁受命奉帝爲巴陵王宮于姑熟戊辰巴陵王殂年十五追尊爲齊和帝葬

恭安陵初梁武帝欲以南海郡爲巴陵國邑而遷帝焉以問范雲
雲俛首未對沈約曰今古殊事魏武所云不可慕虛名而受實禍
梁武領之於是遣鄭伯禽進以生金帝曰我死不須金醇酒足矣
乃引飲一升伯禽就加摺焉先是文惠太子與才人共賦七言詩
句後輒云愁和帝至是其言方驗又永明中望氣者云新林婁湖
青溪並有天子氣於其處大起樓苑宮觀武帝屢游幸以應之又
起舊宮於青溪以弭其氣而明帝舊居東府城西延興末明帝龍
飛至是梁武帝衆軍城於新林而武帝舊宅亦在征虜百姓皆著
下屋白紗帽而反裙覆頂東昏曰裙應在下今更在上不祥命斷
之於是百姓皆反裙向下此服袂也帽者首之所寄今而向下天
意若曰元首方爲猥賤乎東昏又令左右作逐鹿帽形甚窄狹後
果有逐鹿之事東昏宮裏又作散叛髮反髻根向後百姓爭學之

及東昏狂惑天下散叛矣東昏又與羣小別立帽騫其口而舒兩
翅名曰鳳度三橋帚向後總而結之名曰反縛黃麗東昏與刀敕
之徒親自著之皆用金寶鑿以璧璫又作者調帽鏤以金玉間以
孔翠此皆天意梁武帝舊宅在三橋而鳳度之名鳳翔之驗也黃
麗者皇離爲日而反縛之東昏戮死之應也調者梁武帝至都而
風俗和調先是百姓及朝士皆以方帛填胸名曰假兩此又服袂
假非正名也儲兩而假之名不得真也東昏誅其子廢爲庶人假
兩之意也

論曰鬱林地居長嫡瑕釁未彰而武皇之心不變周道故得保茲
守器正位尊極旣而愆鄙內作兆自宮闈雖爲害未遠而足傾社
稷郭璞稱永昌之名有二日之象隆昌之號實亦同焉明帝越自
支庶任當負荷乘機而作大致殲夷流涕行誅非云義舉事苟非

安能無內愧既而自樹本枝根胤孤弱貽厥所授屬在凶患用覆宗祊亦其理也夫名以行義往賢垂範備而之禪術士誠之東昏以卷矣藏以終之其兆先徵蓋亦天所命矣

南史卷五

齊本紀下第五終

齊本紀下第五終

南史卷六

梁本紀上第六

齊本紀上第六

梁高祖武皇帝諱衍字叔達小字練兒南蘭陵中都里人姓蕭氏與齊同承淮陰令整整生皇高祖鎔位濟陰太守鎔生皇曾祖副子位州治中從事副子生皇祖道賜位南臺治書侍御史道賜生皇考諱順之字文緯於齊高帝為始族弟皇考外甚清和而內懷英氣與齊高少而款狎嘗共登金牛山路側有枯骨縱橫齊高謂皇考曰周文王以來幾年當復有掩此枯骨者乎言之慄然動色皇考由此知齊高有大志常相隨逐齊高每外討皇考常為軍副及北討薛索兒夜遣人入營提刀徑至齊高眠牀皇考手刃之頻為齊高鎮軍司馬長史時宋帝昏虐齊高謀出外皇考以為一旦奔亡則危幾不測不如因人之欲行伊霍之事齊高深然之歷黃

門郎安西長史吳郡內史所經皆著名吳郡張緒常稱文武兼資有德有行吾敬蕭順之袁粲之據石頭黃回與之通謀皇考聞難作率家兵據朱雀橋回覘人還告曰朱雀橋南一長者英威毅然坐胡牀南向回曰蕭順之也遂不敢出時微皇考石頭幾不據矣及齊高創造皇業摧鋒決勝莫不垂拱仰成焉齊建元末齊高從容謂皇考曰當令阿玉解揚州相授玉豫章王疑小名也齊武帝在東宮皇考嘗問訊及還齊高指皇考謂疑曰非此翁吾徒無以致今日及卽位深相忌憚故不居台輔以參豫佐命封臨湘縣侯歷位侍中衛尉太子詹事領軍將軍丹陽尹贈鎮北將軍謚曰懿帝以宋孝武大明元年歲次甲辰生于秣陵縣同夏里三橋宅初皇妣張氏嘗夢抱日已而有娠遂產帝帝生而有異光狀貌殊特日角龍顏重岳虎顧舌文八字項有浮光身映日無景兩髀駢骨

項上隆起有文在右手曰武帝爲兒時能蹈空而行及長博學多通好籌略有文武才幹所居室中常若雲氣人或遇者體輒肅然初爲衛軍王儉東閣祭酒儉一見深相器異請爲戶曹屬謂廬江何憲曰此蕭郎三十內當作侍中出此則貴不可言竟陵王子良開西邸招文學帝與沈約謝朓王融蕭琛范雲任昉陸倕等並游焉號曰八友融俊爽識鑒過人尤敬異帝每謂所親曰宰制天下必在此人累遷隨王鎮西諮議參軍行經牛渚逢風入泊龍瀆有一老人謂帝曰君龍行虎步相不可言天下方亂安之者其在君乎問其名氏忽然不見尋以皇考艱去職歸建鄴及齊武帝不豫竟陵王子良以帝及兄懿王融劉繪王思遠顧嵩之范雲等爲帳內軍王融欲因帝晏駕立子良帝曰夫立非常之事必待非常之人融才非負圖視其敗也范雲曰憂國家者惟有王中書帝曰憂

國欲爲周召欲爲豎刁邪懿曰直哉史魚何其木強也初皇考之薨不得志事見齊魚復侯傳至是鬱林失德齊明帝作輔將爲廢立計帝欲助齊明傾齊武之嗣以雪心恥齊明亦知之每與帝謀時齊明將追隨王恐不從又以王敬則在會稽恐爲變以問帝帝曰隨王雖有美名其寔庸劣旣無智謀之士爪牙惟仗司馬垣歷生武陵太守卞白龍耳此並惟利是與若咱以顯職無不載馳隨王止須折簡耳敬則志安江東窮其富貴宜選美女以娛其心齊明曰亦吾意也卽徵歷生爲太子左衛率白龍游擊將軍並至續召隨王至都賜自盡豫州刺史崔慧景旣齊武舊臣不自安齊明憂之乃起帝鎮壽陽外聲備魏實防慧景師次長瀨慧景懼罪白服來迎帝撫而宥之將軍房伯玉徐玄慶並曰慧景反跡旣彰實是見賊我曹武將譬如韝上鷹將軍一言見命便卽制之帝笑曰

其如掌中嬰兒殺之不武於是曲意和釋之慧景遂安隆昌元年拜中書侍郎遷黃門侍郎建武二年魏將王肅劉昶攻司州刺史蕭誕甚急齊明遣左衛將軍王廣之赴救帝爲偏帥隸廣之行次熨斗洲有人長八尺餘容貌衣冠皓然皆白緣江呼曰蕭王大貴帝旣屢有徵祥心益自負時去誕百里衆軍以魏軍盛莫敢前帝欲大振威略謂諸將曰今屯下梁之城塞鑿峴之險守雉腳之路據賢首之山以通西關以臨賊壘三方犄角出其不備破賊必矣廣之等不從後遣徐玄慶進據賢首山魏絕其糧道衆懼莫敢援之惟帝獨奮請先進於是廣之益帝精甲銜枚夜前失道望見如持兩炬者隨之果得道徑上賢首山廣之軍因得前魏軍來脇帝堅壁不進時王肅自攻城一鼓而退劉昶有疑心帝因與書間成其隙一旦有風從西北起陣雲隨之來當肅營尋而風回雲轉還

向西北帝曰此所謂歸氣魏師遁矣令軍中曰望麾而進聽鼓而動肅乃傾壁十萬陣于水北帝揚麾鼓譟響振山谷敢死之士執短兵先登長戟翼之城見援至因出軍攻魏柵魏軍表裏受敵因大崩肅昶單騎走斬獲千計流血絳野得肅昶巾箱中魏帝敕曰聞肅衍善用兵勿與爭鋒待吾至若能禽此人則江東吾有也以功封建陽縣男尋爲司州刺史有沙門自稱僧暉謂帝曰君項有伏龍非人臣也復求莫知所之帝在州甚有威名嘗有人餉馬帝不受餉者密以馬繫齋柱而去帝出見馬荅書殷勤縛之馬首令人驅出城外馬自還都爲太子中庶子領四廂直出鎮石頭齊明性猜忌帝避時嫌解遣部曲常乘折角小牛車齊明每稱帝清儉勗勵朝臣四年魏孝文帝自率大衆逼雍州刺史曹武度沔守樊城武舊齊武腹心齊明忌之欲使后弟劉暄爲雍州暄不願出

外因江祏得留齊明帝擬帝雍州受密旨出頓聲爲軍事發遣人命五兵尚書崔慧景征南將軍陳顯達相續援襄陽慧景與帝進行鄧城魏孝文帥十餘萬騎奄至慧景引退帝止之不從於是大敗帝帥衆拒戰獨得全軍及魏軍退以帝爲輔國將軍監雍州事先是雍州相傳樊城有王氣至是謠言更甚及齊明崩遺詔以帝爲都督雍州刺史時揚州刺史始安王遙光尚書令徐孝嗣右僕射江祏右將軍蕭垣之侍中江祀衛尉劉暄更直內省分日帖敕世所謂六貴又有御刀茹法珍梅蟲兒豐勇之等八人號爲八要及舍人王暄之等四十餘人皆口擅王言權行國憲帝謂張弘策曰政出多門亂其階矣當今避禍惟有此地勤行仁義可坐作西伯但諸弟在都恐離時患須與益州圖之耳時上長兄懿罷益州還仍行郢州事乃使弘策詣郢陳計於懿語在懿傳言旣不從弘

策還帝乃召弟偉及愔是歲至襄陽乃潛造器械多伐竹木沈於檀溪密爲舟裝之備時帝所住齋常有氣五色回轉狀若盤龍季秋出九日臺忽暴風起煙塵四合帝所居獨白日清朗其上紫雲騰起形如繖蓋望者莫不異焉尋而大臣相次誅戮永元二年冬懿又被害信至帝密召長史王茂中兵呂僧珍別駕柳慶遠功曹史吉士瞻等謀之既定以十一月乙巳召僚佐集於聽事告以舉兵是日建牙出檀溪竹木裝舸艦旬日大辦百姓願從者得鐵馬五千匹甲士三萬人先是東昏以劉山陽爲巴西太守使過荊州就行事蕭穎胄以襲襄陽帝知其謀乃遣參軍王天武龐慶國詣江陵徧與州府人書論軍事天武既發帝謂諮議參軍張弘策曰今日天武坐收天下矣荊州得天武至必回遑無計若不見同取之如拾地芥耳斷三峽據巴蜀分兵定湘中便全有上流以此威

聲臨九派斷彭蠡傳檄江南風之靡草不足比也政小引日月耳江陵本憚襄陽人加辱亡齒寒必不孤立寧得不聞見同邪挾荆雍之兵埽定東夏韓白重出不能爲計况以無算之昏主役御刀應敕之徒哉及山陽至巴陵帝復令天武齋書與穎胄兄弟去後帝謂張弘策曰用兵之道攻心爲上攻城次之心戰爲上兵戰次之今日是也近遣天武往州府人皆有書今段止有兩封與行事兄弟云一二天武口具及問天武口無所說天武是行事心脊彼聞必謂行事與天武共隱其事則人人生疑山陽惑於衆口判相嫌貳則行事進退無以自明是馳兩空函定一州矣山陽至江安聞之果疑不上柳忱勸斬天武送首山陽穎胄乃謂天武曰天下之事縣之在卿今就卿借頭以詐山陽昔樊於期亦以頭借荆軻於是斬之送首山陽山陽信之馳入城將踰閩縣門發折其車轅

投車而走中兵參軍陳秀拔戟逐之斬于門外傳首於帝仍以南
康王尊號之議來告且曰時有未利當須來年二月遽便進兵恐
非廟算帝荅曰今坐甲十萬糧用自竭若頓兵十旬必生悔吝且
太白出西方杖義而動天時人謀有何不利昔武王伐紂行逆太
歲復須待年月乎竟陵太守曹景宗遣杜思沖勸帝迎南康都襄
陽時正尊號帝不從王茂又私于張弘策曰今以南康置人手中
彼挾天子以令諸侯節下前去爲人所使此豈歲寒之計弘策言
之於帝帝曰若前途大事不捷故自蘭艾同焚若功業克建誰敢
不從豈是碌碌受人處分於沔南立新野郡以集新附三年二月
南康王爲相國以帝爲征東將軍戊申帝發襄陽自冬積霰至是
開霽士卒咸悅弟遂留帝偉守襄陽城謂曰當置心於襄陽人腹
中推誠信之勿有疑也天下一家乃當相見遂移檄建鄴闡揚威

武及至竟陵命長史王茂與太守曹景宗爲前軍中兵參軍張法
安守竟陵城茂景宗帥衆濟岍進頓九里其日郢州刺史張沖迎
戰茂等大破之荊州遣冠軍將軍鄧元起軍主王世興田安等會
大軍於夏口帝築漢口城以守魯山命水軍主張惠紹朱思遠等
游遏中江絕郢魯二城信使時張沖死其衆推軍主薛元嗣及沖
長史程茂爲主三月乙巳南康王卽帝位於江陵遙廢東昏爲涪
陵王以帝爲尙書左僕射加征東將軍都督征討諸軍假黃鉞西
臺又遣冠軍將軍蕭穎達領兵來會四月帝出沔命王茂蕭穎達
等逼郢城五月巳酉帝移屯漢南是日有紫雲如蓋陰於壘幕甲
寅東昏遣寧朔將軍吳子陽光子衿等十三軍救郢州進據巴口
七月帝命王茂帥軍主曹仲宗康絢武會超等潛師襲加湖將逼
子陽水涸不通艦子衿喜其夜流星墜其城四更中無雨而水暴

長衆軍乘流齊進鼓譟攻之俄而大潰子陽等竄走衆盡溺于江
王茂虜其餘而旋郢魯二城相視奪氣先是東昏遣冠軍將軍陳
伯之鎮江州爲子陽等聲援帝謂諸將曰夫征討未必須實力所
聽威聲耳今加湖之敗誰不讐服陳武牙卽伯之之子狼狽奔歸
彼間人情理當兇懼我謂九江傳檄可定也因命搜所獲俘囚得
伯之幢主蘇隆之厚加賞賜使致命焉戊午魯山城主孫樂祖降
已未夜郢城有數百毛人踰堞且泣因投黃鵠磯蓋城之精也及
旦其城主程茂薛元嗣遣參軍朱曉求降帝謂曰城中自可不識
天命何意恒罵曉曰明公未之思耳桀犬何嘗不吠堯初郢城之
閉將佐文武男女口十餘萬人疾疫流腫死者十七八及城開帝
並加隱卹其死者命給棺槨東昏聞郢城沒乃爲城守計簡二尚
方二治囚徒以配軍其不可活者於朱雀門內日斬百餘人尚書

令王亮苦諫不從陳伯之遣蘇隆之反命求未便進軍帝曰伯之
此言意懷首鼠可及其猶豫逼之乃命鄧元起卽日沿流八月天
子遣兼黃門郎蘇回勞軍帝登舟命諸軍以次進路留上庸太守韋
叡守郢城行州事鄧元起將至尋陽陳伯之猶懼乃收兵退保湖
口留其子武牙守益城及帝至乃束甲請罪九月天子詔帝平定
東夏以便宜從事前軍之次蕪湖南豫州刺史申胄棄姑孰走至
是大軍進據之自發雍州帝所乘艦恒有兩龍導引左右莫不見
者緣道奉迎百姓皆如挾纊仍遣曹景宗蕭穎達領馬步進頓江
寧東昏遣征虜將軍李居士迎戰景宗擊走之於是王茂鄧元起
呂僧珍進據赤鼻邏曹景宗陳伯之爲游兵是日新亭城主江道
林率兵出戰衆軍禽之於陣大軍次新林建康士庶傾都而至送
款或以血爲書命王茂進據越城曹景宗據阜茨橋鄧元通據道

士墩陳伯之據籬門道林餘衆退屯航南迫之因復散走退保朱雀憑淮自固時李居士猶據新亭壘請東昏燒南岬邑屋以開戰場自大航以西新亭以北蕩然矣十月東昏石頭軍主朱僧勇歸降東昏又遣征虜將軍王珍國列陣於航南大路悉配精手利器尚十餘萬闔人王偃子持白虎幡督諸軍王茂曹景宗等犄角奔之珍國之衆一時土崩衆軍退至宣陽門李居士以新亭壘徐元瑜以東府城降石頭白下諸君並宵潰壬午帝鎮石頭命衆軍圍六門東昏悉焚門內驅逼營署官府並入城有衆二十萬青州刺史桓和給東昏出戰因降先是俗語謂密相欺變者爲和欺於是蟲兒法珍等曰今日敗於桓和可謂和欺矣帝命諸軍築長圍初衆軍旣逼東昏遣軍主左僧慶鎮京口常僧景鎮廣陵李叔獻屯瓜步及申胄自姑孰奔歸又使屯破墩以爲東北聲援至是帝遣

曉喻並降帝乃遣弟輔國將軍秀鎮京口輔國將軍恢屯破墩從弟寧朔將軍景鎮廣陵吳郡太守蔡黃奔郡赴降十一月丙寅兼衛尉張稷北徐州刺史王珍國斬東昏其夜以黃油裹首送軍帝命呂僧珍張彌勒兵封府庫及圖籍帝乃入收嬖妾潘妃誅之及兇黨王暄之以下四十八人屬吏以宮女二千人分賚將士宣德皇后令追廢涪陵王爲東昏侯授帝中書監大司馬錄尚書驃騎大將軍都督揚州刺史封建安郡公食邑萬戶給班劍四十人黃鉞侍中征討諸軍事並如故依晉武陵王遵承制故事百僚致敬已卯帝入屯閱武堂下令大赦丙戌入鎮殿內是日鳳皇集建鄴又下令凡昏制謬賦淫刑濫役外可詳檢前源悉皆除蕩其主守散失諸所損耗精立科條咸從原例丁亥遣豫州刺史李元履以兵五千慰勞東方十二郡二年正月辛卯下令通檢尚書衆曹東

昏時諸諍訟失理及主者淹停不時施行者精加訊辯依事議奏其義師臨陣致命疾病死亡者並加葬斂收恤遺孤甲午天子遣兼侍中席闡文兼黃門侍郎樂法才慰勞都下追贈皇祖散騎常侍左光祿大夫皇考侍中丞相乙未下令朱雀之捷逆徒送死者特許家人殯葬若無親屬或有貧苦二縣長尉卽爲埋掩建康城內不達天命自取淪滅亦同此科又下令減損浮費自非奉桑盛修絃冕習禮樂之容繕甲兵之備此外一皆禁絕御府中署量宜罷省命外詳爲條格戊戌宣德皇后臨朝入居內殿拜帝大司馬解承制百僚致敬如前丁亥詔進帝都督中外諸軍事劔履上殿入朝不趨贊拜不名加前後部羽葆鼓吹置左右長史司馬從事中郎掾屬各四人并依舊辟士餘並如故甲寅齊帝進帝位相國總百揆封十郡爲梁公備九錫之禮加遠游冠綠綬綬位在諸王

上策曰上天不造難鍾皇室世祖以休明早崩世宗以仁德不嗣高宗襲統宸居弗永雖夙夜劬勞而隆平不洽嗣君昏暴書契弗睹朝權國柄委之群孽勦戮忠賢誅殘台輔含冤抱痛噍類靡餘公藉昏明之期因兆庶之願爰率羣后翊成中興宗社之危已固天人之望允塞此實公紐我絕綱大造皇家者也永明季年邊隙大啓荆河連率招引戎荒公受言本朝輕兵赴襲排危冒險剛柔遞用坦然一方還成藩服此又公之功也在昔隆昌洪基已謝高宗慮深社稷將行權道公定策帷帳激揚大節廢帝立王謀猷深著此又公之功也建武闡業厥猷雖遠戎狄內侵憑陵關塞司部危逼淪陷指期公總兵外討卷甲長驚焚廬毀帳胡哭言歸此又公之功也樊漢阡切羽書續至公星言鞠旅稟命徂征拯我邊危重獲安堵此又公之功也漢南迴弱咫尺勅寇公作藩爰始因資

靡託練兵訓卒蒐狩有序俾我危城翻爲強鎮此又公之功也永
元紀號瞻烏已及雖廢昏有典而伊霍難行公首建大策爰立明
聖義踰邑綸勳高代入此又公之功也文王之風雖被江漢京邑
蠢蠢湮爲洪流公投袂萬里事惟拯溺義聲所覃無思不遑此又
公之功也魯城夏洩梗據中流乘山置壘縈川自固公御此烏集
陵茲地險費無遺矢戰未窮兵踐華之固相望俱拔此又公之功
也惟此羣凶同惡相濟緣江負險蟻聚淮湖桴燿一臨應時遽潰
此又公之功也姦孽震皇復懷舉斧畜兵九派用擬勤王公稜威
直指勢踰風電旆旆小臨全州稽服此又公之功也姑孰衝要密
邇京畿兇徒熾聚斷塞津路公兵威所震望旗自駭此又公之功
也羣豎猖狂志在借一豕突淮涘武騎如雲公爰命英勇因機騁
銳氣冠阪泉勢踰洹水此又公之功也琅邪石首襟帶岨固新壘

東塘金湯是埒憑險作守兵食兼資風激電駭莫不震疊城復于
隍於是乎在此又公之功也獨夫昏悞憑城靡懼鼓鍾鞀鞀傲若
有餘狎是邪孽忌斯冠冕凶狡因之將逞孥戮公奇謀密運威略
潛回忠勇之徒得申厥效白旗宣室未之或比此又公之功也公
有拯億兆之勲重之以明德爰初厲志服道儒門濯纓來仕清猷
映世時運艱難宗社危殆岷岡已燎玉石同焚驅率貔貅抑揚霆
電義等南巢功齊牧野若夫禹功寂寞微管誰嗣拯其將魚駐其
袒髮解茲亂綱理此焚絲復禮衽席反樂河海永平故事聞之者
歎息司隸舊章見之者隕涕請我人命還之斗極憫閭縉紳重符
戴天之慶哀哀黔首復蒙履地之恩德踰於嵩岱功隣於造物超
哉邈矣越無得而言焉朕又聞之疇庸命德建侯作屏咸用克固
四維永隆萬葉是以二南流化九伯斯征王道淳洽刑厝罔用惟

公經綸天地寧濟區夏道冠乎伊稷賞薄於桓文豈所以憲章齊魯長轡宇宙敬惟前烈朕甚懼焉今進授相國改揚州刺史爲牧以豫州之梁郡歷陽南徐州之義興揚州之淮南宣城吳吳興會稽新安東陽十郡封公爲梁公錫茲白土苴以白茅爰定爾邦用建冢社在昔旦奭入居保佑逮于畢毛亦作卿士任兼內外禮寔宜之今命使持節兼太尉王亮授相國揚州牧印綬梁公璽紱使持節兼司空王志授梁公茅土金虎符第一至第五左竹使符第一至第十左相國位冠羣后任總百司恒典彝數宜與事革其以相國總百揆去錄尚書之號上所假節侍中貂蟬中書監印中外都督大司馬印綬建安公印策驃騎大將軍如故又加公九錫其敬聽後命以公禮律兼修刑德備舉哀矜折獄罔不用情是用錫公大輅戎輅各一玄牡二駟公勞心稼穡念在人天丕崇務本惟

穀是寶是用錫公袞冕之服赤舄副焉公鎔鈞所被變風以雅易俗陶人載和邦國是用錫公軒縣之樂六佾之儻公文德廣覃義聲遠洽椎髻鬖首夷歌請吏是用錫公朱戶以居公揚清抑濁官方有序多士聿興械櫜流詠是用錫公納陛以登公正色御下以身範物式遏不虞折衝惟遠是用錫公虎賁之士三百人公威同夏日志清姦宄放命圯族刑茲罔赦是用錫公鈇鉞各一公跨躡嵩溟陵厲區宇譬諸日月容光必至是用錫公彤弓十彤矢百盧弓百盧矢千公永言惟孝至感通神恭嚴祀典祭有餘敬是用錫公拒鬯一卣圭瓚副焉梁國置丞相以下一遵舊式欽哉其敬循往策祇服大禮對揚天眷用膺多福以弘我太祖之休命帝固辭府僚勸進不許二月辛酉府僚重請曰近以朝命蘊策冒奏丹誠奉被還令未蒙虛受縉紳顒顒深所未達蓋聞受金於府通人之

弘致高蹈海隅匹夫之小節是以履乘石而周公不以為疑贈玉
璜而太公不以為讓况世哲繼軌先德在人經綸草昧歎深微管
加以朱方之役荆河是依班師振旅大造王室雖復累繭救宋重
祗存楚居今觀古曾何足云而惑甚盜鍾功疑不賞皇天后土不
勝其酷是以玉馬駿奔表微子之去金板出地告龍逢之寃明公
據鞏號哭厲三軍之志獨居掩涕激義士之心故能使海若登祗
罄圖效祉山戎孤竹束馬景從伐罪弔人一匡靜亂匪叨天功寔
勤濡足龜玉不毀誰之功歟獨為君子將使伊周何地於是始受
相國梁公之命命焚東昏淫奢異服六十二種於都街齊帝追贈
梁公夫人為梁國妃乙丑南兗州隊主陳文興於宣武城內鑿井
得玉鏤騏驎金鏤玉璧水精環各二又鳳凰見建康縣桐下里宣
德皇后稱美符瑞歸于相國府丙寅詔梁國依舊選諸要職悉依

天朝之制帝上表以前代選官皆立選簿請自今選曹精加隱括
依舊立簿使冠履無爽名實不違庶人識涯涘造請自息且聞中
間立格甲族以二十登仕後門以過立試吏豈所以弘獎風流希
向後進此實巨蠹尤宜刊革詔依表施行丙戌詔進梁公爵為王
以豫州之南譙廬江江州之尋陽邳州之武昌西陽南徐州之南
琅邪南東海晉陵揚州之臨海永嘉十郡並梁國并前為二十郡
其相國揚州牧驃騎大將軍如故帝固辭有詔斷表相國左長史
王瑩等率百僚敦請三月癸巳受梁王之命下令赦國內殊死以
下鰥寡孤獨不能自存者賜穀五斛府州所統亦同蠲蕩丙午齊
帝命帝冕十有二旒建天子旌旗出警入蹕乘金根車駕六馬備
五時副車置旄頭雲罕樂舞八佾設鍾簋宮縣王妃王子王女爵
命之號一如舊儀丙辰齊帝下詔禪位即安姑孰四月辛酉宣德

皇后令曰西詔至帝憲章前代敬禪神器于梁明可臨軒遣使恭授璽紱未亡人便歸于別宮壬戌策曰咨爾梁王惟昔邃古之載肇有生靈皇雄大庭之辟赫胥尊盧之后斯並龍圖鳥跡以前恍惚杳冥之世固無得而詳焉洎乎農軒炎皞之代放勳重華之主莫不以大道君萬姓公器御八紘居之如執朽索去之若釋重負一駕汾陽便有窅然之志暫適箕嶺卽動讓王之心故知戴黃屋服玉璽非所以示貴稱尊乘大輅建旂旗蓋欲令歸趣有地是故忘已而字兆庶徇物而君四海及於精華內竭畚櫓外勞則撫茲歸運惟能是與四百告終有漢所以高揖黃德旣謝魏氏所以樂推爰及晉宋亦弘斯典我太祖握河受曆應符啓運二葉重光三聖係軌嗣君喪德昏棄紀度毀紊天綱彫絕地紐是以谷滿川枯山飛鬼哭七廟已危人神無主惟王體茲上哲明聖在躬端冕而

協邕熙推鋒而拯塗炭武功與日車並運文教與鵬翼齊舉固以幽顯宅心謳訟斯屬豈徒桴鼓播地卿雲叢天而已哉至於晝睹爭明夜飛枉矢除舊之徵必顯更姓之符允集今便仰祇乾象俯從人願敬禪神器授帝位于爾躬大祚告窮天祿永終於戲王允執其中式遵前典以副昊天之望禋上帝而臨億兆格文祖而膺大業以傳無疆之祚豈不盛與并命璽書遣兼太保中書監兼尚書令王亮兼太尉中書令王志奉皇帝璽紱受終之禮一依唐虞故事帝抗表陳讓表不獲通於是齊百官豫章王元琳等八百一十九人及梁臺侍中范雲等一百一十七人並上表勸進帝謙讓不受是日太史令蔣道秀陳天文符讖六十四條事並明著羣臣重表固請乃從之

天監元年夏四月丙寅皇帝卽位于南郊設壇柴燎告天曰皇帝

臣衍敢用玄牡昭告于皇皇后帝齊氏以歷運斯旣否終則亨欽
若天應以命于衍夫任是司牧惟能是授天命不于常帝王非一
族唐謝虞受漢替魏升爰及晉宋憲章在昔咸以君德馭四海元
功子萬姓故能大庇毗黎光宅區宇齊代云季世主昏凶狡焉羣
慝是崇是長肆厥姦回暴亂以播虐于我有邦俾九服八荒之內
連率岳牧之君蹶角頓顙匡救無術衍投袂星言推鋒萬里厲其
挂冠之情用拯兆庶之切遂因時來宰司邦國濟物康世寔有厥
勞而畧緯呈祥川岳効祉代終之符旣顯革運之期已萃殊俗百
蠻重譯獻欵人神遠邇罔不和會於是羣公卿士咸致厥誠並以
皇乾降命難以謙拒衍自惟匪德辭不獲遂仰迫上玄之眷俯惟
億兆之心宸極不可久曠人神不可乏主遂藉樂推膺此嘉祚以
茲寡薄臨馭萬方顧求夙志永言祇惕敬簡元辰恭茲大禮升壇

受禪告類上帝克播休祉以弘盛烈式傳厥後用永保于我有梁
惟明靈是饗禮畢有詔放觀乃備法駕還建康宮臨太極前殿大
赦改元賜人爵二級文武位二等鰥寡孤獨不能自存者人穀五
斛逋布口錢宿責勿復收其犯鄉論清議賊汗淫盜一皆蕩滌洗
除前注與之更始封齊帝爲巴陵王全食一郡載天子旌旗乘五
時副車行齊正朔郊祀天地禮樂制度皆用齊典以齊宣德皇后
爲齊文帝妃齊帝后王氏爲巴陵王妃齊代王侯封爵悉皆降省
其効著艱難者別有後命惟宋汝陰王不在除例劫賊餘口沒在
臺府者悉皆蠲放諸流徙之家並聽還本土以兼尚書令王亮爲
尚書令兼尚書右僕射沈約爲尚書僕射封皇弟中護軍宏爲臨
川王南徐州刺史秀爲安成王雍州刺史偉爲建安王右衛將軍
恢爲鄱陽王荊州刺史憺爲始興王自郡王以下列爵爲縣六等

皇弟皇子封郡王二千戶王之庶子爲縣侯五百戶謂之諸侯功臣爵邑無定科鳳凰集南蘭陵丁卯詔凡後宮樂府西解暴室諸如此例被幽逼者一皆放遣若衰老不能自存者官給廩食戊辰遺巴陵王錢二百萬絹布各千疋綿二千斤車騎將軍高麗王高雲進號車騎大將軍鎮東大將軍百濟王餘太進號征東大將軍鎮東大將軍倭王武進號征東將軍已巳巴陵王殂于姑孰追謚爲齊和帝終禮一依故事庚午詔分遣內侍周省四方觀政聽謠訪賢舉滯其有田野不闢獄訟無章忘公徇私侵漁是務者悉隨事以聞若懷寶迷邦蘊竒待價蓄響藏真不求聞達各依名騰奏罔或遺隱又詔曰金作贖刑有聞自昔入縲以免施於中代永言叔季偷薄成風嬰愆入罪厥塗匪一死者不可復生刑者無因自反由此而望滋實庸可致乎可依周漢舊典有罪入贖外詳爲條

格以時奏聞辛未以新除謝沐公蕭寶義爲巴陵王以奉齊祀復南蘭陵武進縣依前代之科徵新除相國軍諮祭酒謝朓爲侍中左光祿大夫開府儀同三司改南東海爲蘭陵郡土斷南徐州諸僑郡縣癸酉詔於公車府謗木肺石傍各置一函若肉食莫言山阿欲有橫議投謗木函若從我江漢功在可策犀兕徒弊龍蛇方縣次身才高妙擯壓莫通懷傅呂之術抱屈賈之歎其理有嗷然受困包匭夫大政侵小豪門陵賤百姓已窮九重莫達若欲自申並可投肺石函甲戌詔斷遠近上慶禮閏月丁酉以行宕昌王梁彌邕爲安西將軍河涼二州刺史正封宕昌王壬寅詔以憲綱日弛漸以爲俗令端右以風聞奏事依元熙舊制有司奏追尊皇考爲文皇帝廟號太祖皇妣張氏爲獻皇后陵曰建陵郝氏爲德皇后陵曰脩陵五月乙亥夜盜入南北掖燒神武門總章觀害衛尉

卿張弘策戊子江州刺史陳伯之舉兵反以領軍將軍王茂爲征南將軍江州刺史率衆討之六月庚戌封北秦州刺史楊紹先爲武都王是月陳伯之奔魏江州平前益州刺史劉季連據成都反秋七月丁巳朔日有蝕之八月戊戌置建康三官癸卯鸞鳥見樂游苑乙巳平北將軍西涼州刺史象舒彭進號安西將軍封鄧至王丁未命中書監王瑩等八人參定律令詔尚書郎依昔奏事交州獻能歌鸚鵡詔不納林邑于阇利國各遣使朝貢冬十一月己未立小廟甲子立皇子統爲皇太子賜天下爲父後者爵一級十二月大雪深三尺是歲大旱米斗五千人多餓死二年春正月乙卯以尚書僕射沈約爲左僕射吏部尚書范雲爲右僕射辛酉祀南郊降死罪以下囚庚辰以仇池公楊靈珍爲北梁州刺史封仇池王夏四月癸卯尚書刪定郎蔡法度上梁律二

十卷令三十卷科四十卷五月尚書右僕射范雲卒乙巳益州刺史鄧元起尅成都赦益州六月丁亥以新除左光祿大夫謝朓爲司徒尚書令甲午以中書監王瑩爲尚書右僕射是夏多癘疫秋七月扶南龜茲中天竺國各遣使朝貢冬十月皇子綱生降都下死罪以下囚十一月乙卯雷電大雨晦三年春正月癸丑以尚書右僕射王瑩爲左僕射太子詹事柳惔爲右僕射二月魏尅梁州三月隕霜殺草夏五月丁巳以扶南王憍陳如闍耶跋摩爲安南將軍六月丙子詔分遣使巡察州部視人寃酷癸未大赦秋七月甲子立皇子綜爲豫章王八月魏尅司州九月壬子以河南王世子伏連籌爲鎮西將軍西秦河二州刺史封河南王北天竺國遣使朝貢冬十一月甲子詔除贖罪科是歲魏正始元年

四年春正月癸卯詔自今九流常選年未三十不通一經不得解
褐若有才同甘顏勿限年次置五經博士各一人有司奏吳令唐
傭鑄盤龍火鑪翔鳳硯蓋詔禁錮終身丙午省鳳凰銜書伎戊申
詔往代多命宮人帷宮觀禋郊之禮非所以仰虔蒼昊自今停止
辛亥祀南郊大赦二月初置胄子律博士壬午遣衛尉卿楊公則
率宿衛兵塞洛口壬辰交州刺史李凱據州反長史李叟討平之
曲赦交州是月立建興苑於秣陵建興里夏四月丁巳以行宕昌
王梁彌博爲安西將軍河梁二州刺史正封宕昌王六月庚戌立
孔子廟冬十月使中軍將軍揚州刺史臨川王宏都督北討諸軍
事侵魏以興師費用王公以下各上國租及田穀以助軍資是歲
大穰米斛三十

五年春正月丁卯朔詔凡諸郡國舊族邦內無在朝位者選官搜

括使郡有一人乙亥起前司徒謝朓爲中書監司徒甲申立皇子
綱爲晉安王三月丙寅朔日有蝕之夏四月甲寅初立詔獄詔建
康縣置三官與廷尉三官分掌獄事號建康爲南獄廷尉爲北獄
五月置集雅館以招遠學秋七月乙丑鄧至國遣使朝貢八月辛
酉作東宮九月臨川王宏軍至洛口大潰所亡萬計宏單騎而歸
冬十一月甲子都下地震生白毛乙丑以師出淹時大赦魏人乘
勝攻鍾離十二月癸卯司徒謝朓薨

六年春三月庚申隕霜殺草是月有三象入建鄴夏四月壬辰置
左右驍騎左右游擊將軍官癸巳曹景宗韋叡等破魏師於邵陽
洲斬獲萬計己酉以江州刺史王茂爲尚書右僕射丁巳以揚州
刺史臨川王宏爲驃騎大將軍開府儀同三司以右光祿大夫沈
約爲尚書左僕射五月己巳置中衛中權將軍改驍騎爲雲騎游

擊爲游騎秋八月戊子赦戊戌都下大水九月乙亥改闕武堂爲德陽堂聽訟堂爲儀賢堂冬閏十月乙丑以開府臨川王宏爲司徒以行太子太傅尙書左僕射沈約爲尙書令以行太子少傅吏部尙書袁昂爲兼尙書右僕射甲申以左光祿大夫夏侯詳爲左僕射十二月丙辰左僕射夏侯詳卒

七年春正月戊子以元樹爲恒朔二州都督封魏郡王戊戌詔作神龍仁獸闕於端門大司馬門外二月乙卯新作國門于越城南乙丑增置鎮衛將軍以下爲十品以法日數凡二十四班以法氣序不登十品別有八班以象八風又置施外國將軍二十四班合一百九號庚午詔於州郡縣置州望郡宗鄉豪各一人專掌搜薦乙亥以車騎大將軍高麗王高雲爲撫東大將軍開府儀同三司夏四月乙卯以皇太子納妃故赦大辟以下頒賜朝臣及近侍各

有差五月都下大水戊子詔蘭陵縣脩建二陵周回五里內居人賜復終身巳亥詔復置宗正太僕大匠鴻臚又增太府大舟仍先爲十二卿及置朱衣直閣將軍官六月辛酉改陵監爲令秋八月丁巳皇子繹生赦大辟以下未結正者九月壬辰置童子奉車郎癸巳立皇子績爲南康王冬十月丙寅以吳興太守張稷爲尙書左僕射丙子詔大舉北侵丁丑魏縣瓠鎮主白阜生豫州刺史胡遜以城內屬是歲魏永平元年

八年春正月辛巳祀南郊大赦壬辰魏鎮東參軍成景雋以宿豫城內屬夏四月戊申以司徒臨川王宏爲司空揚州刺史以車騎將軍領太子詹事王茂卽本號開府儀同三司秋七月癸巳巴陵王蕭寶義薨冬十一月壬寅立皇子績爲廬陵王

九年春正月乙亥以左光祿大夫王瑩爲尙書令庚寅新作緣淮

塘三月巳丑幸國子學親臨講肄賜祭酒以下各有差乙未詔皇太子及王侯之子年在從師者皆入學夏四月丁巳選尚書五都令史革用士流六月癸丑盜殺宣城太守朱僧勇閏六月巳丑宣城盜轉寇吳興太守蔡樽討平之冬十二月癸未幸國子學策試胄子賜訓授之司各有差是歲于闐林邑國並遣使朝貢十年春正月辛丑祀南郊大赦戊子荊州言騶虞見三月盜殺東莞琅邪二郡太守劉晰以胸山引魏徐州刺史盧昶夏六月以國子祭酒張充爲尚書右僕射冬十二月山車見臨城縣振遠將軍馬仙琕大破魏軍斬馘十餘萬復胸山城是歲初作宮城門三重樓及開二道宕昌國遣使朝貢婆利國貢金席十一年春正月壬辰詔自今捕謫之家及罪應質作若年有老小可停將送加鎮南將軍江州刺史建安王偉開府儀同三司司空

揚州刺史臨川王宏進位太尉以驃騎將軍王茂爲司空二月戊辰新昌濟陽二郡野蠶成繭三月丁巳爲旱故曲赦揚徐二州庚申高麗國遣使朝貢夏四月百濟扶南林邑等國各遣使朝貢秋九月宕昌國遣使朝貢冬十月乙未以吳郡太守袁昂爲兼尚書右僕射巳酉降太尉揚州刺史臨川王宏爲驃騎將軍開府同三司之儀癸丑齊宣德太妃王氏薨是歲魏延昌元年十二年春正月辛卯祀南郊赦大辟罪以下辛酉兼尚書右僕射袁昂卽正丙寅詔明下遠近若委骸不葬或條衣莫改量給棺具收斂辛巳新作太極殿改爲十三間以從閏數閏三月乙丑特進中軍將軍沈約卒夏四月都下大水六月癸巳新作太廟增基九尺秋九月加揚州刺史臨川王宏位司空以司空王茂爲驃騎將軍開府同三司之儀位江州刺史冬十月丁亥詔曰明堂地居卑

濕可量就埤起以盡誠敬

十三年春二月庚辰朔震于西南天如裂丁亥耕藉田大赦賜孝悌力田爵一級夏六月都下訛言有棖棖取人肝肺及血以飴天狗百姓大懼二旬而止秋七月乙亥立皇子綸爲邵陵王繹爲東湘王紀爲武陵王是歲林邑扶南于闐國各遣使朝貢作浮山堰十四年春正月乙巳朔皇太子冠大赦賜爲父後者爵一級王公以下班賚各有差停遠近上慶禮辛亥祀南郊詔班下遠近博采英異又前以墨刑用代重辟者除其條丙寅汝陰王劉胤薨丁巳魏宣武皇帝崩夏四月丁丑驃騎將軍開府同三司之儀江州刺史王茂薨冬十月浮山堰壞是歲蠕蠕狼牙脩國各遣使來朝貢十五年春三月戊辰朔日有蝕之既夏四月高麗國遣使朝貢六月庚子以尙書令王瑩爲左光祿大夫開府儀同三司尙書右僕

射袁昂爲左僕射吏部尙書王暕爲右僕射秋八月蠕蠕河南國各遣使朝貢九月辛巳左光祿大夫開府儀同三司王瑩薨壬辰大赦冬十一月交州刺史李旻斬反者阮宗孝傳首建鄴曲赦交州是歲魏孝明皇帝熙平元年

十六年春正月辛未祀南郊詔尤貧家勿收今年三調無田業者所在量宜賦給及優蠲產子之家恤理冤獄并賑孤老鰥寡不能自存者二月辛亥耕藉田甲寅赦罪人三月丙子敕太醫不得以生類爲藥公家織官紋錦飾並斷仙人鳥獸之形以爲褻衣裁翦有乖仁恕於是祈告天地宗廟以去殺之理欲被之含識郊廟牲牲皆代以麩其山川諸祀則否時以宗廟去牲則爲不復血食雖公卿異議朝野喧囂竟不從冬十月宗廟薦羞始用蔬果是歲河南扶南婆利等國各遣使朝貢

十七年春二月癸巳雍州刺史安成王秀薨甲辰大赦三月丙申改封建安郡王偉為南平王夏六月乙酉中軍將軍中書監臨川王宏以本號行司徒秋八月壬寅詔兵騶奴婢男年六十六女年六十免為編戶閏八月千陁利國遣使朝貢冬十月乙亥以行司徒臨川王宏即正十一月辛亥以南平王偉為左光祿大夫開府儀同三司是歲魏神龜元年

十八年春正月甲申以領軍將軍鄱陽王恢為征西將軍荊州刺史以荊州刺史始興王憺為中撫將軍並開府儀同三司以尚書左僕射袁昂為尚書令以右僕射王暕為左僕射以太子詹事徐勉為右僕射辛卯祀南郊孝悌力田賜爵一級夏四月丁巳帝於無碍殿受佛戒赦罪人秋七月于闐扶南國各遣使朝貢

南史卷六 梁本紀上第六

魏川中鳳圖
氏圖回開中

南史卷七

梁本紀中第七

魏川中鳳圖
氏圖回開中

普通元年春正月乙亥朔大赦改元丙子日有蝕之己卯以司徒臨川王宏為太尉揚州刺史以金紫光祿大夫王份為尚書左僕射庚子扶南高麗等國並遣使朝貢二月癸丑以高麗王嗣子安為寧東將軍高麗王三月滑國遣使朝貢夏四月河南國遣使朝貢秋七月己卯江淮海並溢九月乙亥有星晨見東方光爛如火是歲魏正光元年

二年春正月辛巳祀南郊詔置孤獨園以恤孤幼戊子大赦二月辛丑祀明堂三日庚寅大雪平地三尺夏四月乙卯改作南北郊丙辰詔曰平秩東作義不在南前代因襲有乖禮制可於茲千畝於是徙藉田於東郊外十五里五月癸卯琬琰殿火延燒

後宮屋三千間閏月丁巳詔自今可停賀瑞六月丁卯義同刺史
文僧明以州歸魏秋七月丁酉假大匠卿裴邃節督衆軍侵魏甲
寅魏荊州刺史桓叔興帥衆降八月丁亥始平郡石鼓村地自開
成井方六尺六寸深三十二丈冬十一月百濟新羅國各遣使朝
貢十二月戊辰以鎮東大將軍百濟王餘隆爲寧東大將軍

三年春正月庚子以吳郡太守王暕爲尚書左僕射庚戌都下地
震三月乙卯巴陵王蕭屏薨夏四月丁卯汝陰王劉端薨五月壬
辰朔日有蝕之旣癸巳大赦詔公卿百僚各上封事連率郡國舉
賢良方正直言之士秋八月甲子婆利白題國各遣使朝貢冬十
一月甲申開府儀同三司始興王憺薨

四年春正月辛卯祀南郊大赦辛亥祀明堂二月乙亥耕藉田孝
弟力田賜爵一級預耕之司尅日勞酒冬十月庚午以中衛將軍

袁昂爲尚書令卽本號開府儀同三司十一月癸未朔日有蝕之
甲辰尚書左僕射王暕卒十二月戊午用給事中王子雲議始鑄
鐵錢狼牙修國遣使朝貢

五年夏六月乙酉龍鬪于曲阿王陂因西行至建陵城所經樹木
倒折開數十丈庚子以員外散騎常侍元樹爲平北將軍北青兗
二州刺史率衆侵魏

六年春正月辛亥祀南郊大赦庚申魏徐州刺史元法僧以彭城
來降自去歲以來北侵諸軍所在尅獲甲戌以元法僧爲司空封
始安郡王二月辛巳改封法僧爲宋王三月丙午賜新附人長復
除註誤罪失一無所問夏五月巳酉脩宿豫堰又脩曹公堰於濟
陰壬子遣中護軍夏侯督壽陽諸軍侵魏六月庚辰豫章王綜
奔魏魏復據彭城秋七月壬戌大赦冬十二月壬辰都下地震是

歲魏孝昌元年

七年春正月辛丑朔赦死罪以下夏四月乙酉太尉臨川王宏薨南州津改置校尉增加奉秩詔在位郡臣各舉所知凡是清吏咸使薦聞秋九月己酉荊州刺史鄱陽王恢薨冬十一月庚辰丁貴嬪薨大赦是歲河南高麗林邑滑國並遣使朝貢

大通元年春正月乙丑以尚書右僕射徐勉爲尚書左僕射詔百官奉祿自今可長給見錢辛未祀南郊詔流亡者聽復宅業蠲役五年尤貧家勿收今年三調孝弟力田賜爵一級是月司州刺史夏侯夔進軍三關所至皆尅初帝創同泰寺至是開大通門以對寺之南門取反語以協同泰自是晨夕講義多由此門三月辛未幸寺捨身甲戌還宮大赦改元大通以符寺及門名夏五月丙寅成景雋尅臨潼竹邑冬十月庚戌魏東豫州刺史元慶和以渦

陽內屬甲寅曲赦東豫州十一月丁卯以中護軍蕭藻爲都督侵魏鎮于渦陽是歲林邑師于高麗等國各遣使朝貢

二年春正月乙酉蠕蠕國遣使朝貢二月築寒山堰癸丑魏孝明皇帝崩夏四月戊戌魏爾朱榮推奉孝莊帝庚子榮殺幼主及太后胡氏辛丑魏郢州刺史元願達以義陽降封願達爲樂平王是時魏大亂其北海王顥臨淮王彧汝南王悅並來奔北青州刺史元儁南荊州刺史李志皆以地降冬十月丁亥以魏北海王顥主魏遣東宮直閣將軍陳慶之衛送還北魏衛州刺史鄧獻以地降是歲魏武泰元年尋改爲建義又改曰永安

中大通元年春正月辛酉祀南郊大赦賜孝悌力田爵一級辛巳祀明堂夏四月癸巳陳慶之攻拔魏梁城進屠考城禽魏濟陰王暉業五月癸酉進尅虎牢魏孝莊帝出居河北乙亥元顥入京師

借號建武六月壬午以永興公主疾篤故大赦公主志也是月都下疫甚帝於重雲殿爲百姓設救苦齋以身爲禱閏月護軍將軍南康王績薨己卯魏將爾朱榮攻殺元顥京師反正秋九月辛巳朱雀航華表灾癸巳幸同泰寺設四部無遮大會上釋御服披法衣行清淨大捨以便省爲房素床瓦器乘小車私人執役甲午升講堂法坐爲四部大衆開涅槃經題癸卯羣臣以錢一億萬奉贖皇帝菩薩大捨僧衆默許乙巳百辟詣寺東門奉表請還臨宸極三請乃許帝三荅書前後並稱頓首冬十月巳酉又設四部無遮大會道俗五萬餘人會畢帝御金輅還宮御太極殿大赦改元十一月戊子魏巴州刺史嚴始興以城降是歲盤盤蠕蠕國並遣使朝貢

二年夏四月癸丑幸同泰寺設平等會庚申大雨雹六月丁巳遣

魏汝南王悅還北主魏庚申以魏尚書左僕射范遵爲司州牧隨悅北侵是月林邑扶南國遣使朝貢秋八月庚戌幸德陽堂祖魏主元悅山賊寇會稽郡縣九月壬午假超武將軍湛海珍節以討之是歲魏莊帝殺其權臣尔朱榮其黨奉魏長廣王曄爲主而殺孝莊帝年號建明

三年春正月辛巳祀南郊大赦丙申以魏尚書僕射鄭元護爲征北大將軍二月辛丑祀明堂夏四月巳巳皇太子統薨六月癸丑立昭明太子子華容公歡爲豫章郡王枝江公譽爲河東郡王曲江公譽爲岳陽郡王是月丹丹國遣使朝貢秋七月乙亥立晉安王綱爲皇太子大赦賜爲父後者及出處忠孝文武清勤並爵一級庚寅詔宗戚有服屬者並賜湯沐食鄉亭侯各隨遠近以爲差次壬辰以吏部尚書何敬容爲尚書右僕射九月狼牙修國遣使

南史七
朝貢是秋吳興生野稻饑者賴焉冬十月巳酉上幸同泰寺升法
座爲四部衆說涅槃經迄于乙卯前樂山縣侯蕭正則有罪流徙
至是招誘亡命欲寇廣州在所討平之十一月乙未上幸同泰寺
升法座爲四部衆說般若經迄于十二月辛丑是歲魏尔朱兆又
廢其主曄而奉節閔皇帝改建明二年爲普泰元年又魏渤海王
高歡舉兵信都別奉渤海太守朗爲主改普泰元年爲中興

四年春正月丙寅以開府儀同三司南平王偉爲大司馬以司空
宋王元法僧爲太尉尚書令以開府儀同三司袁昂爲司空立臨
川靖惠王宏子正德爲臨賀郡王庚午立嫡王孫大器爲宣城郡
王位列諸王上癸未魏南兖州刺史劉世明以城降二月壬寅以
太尉元法僧還北主魏以侍中元景隆爲徐州刺史封彭城郡王
通直常侍元景宗爲青州刺史封平昌郡王隨法僧北侵庚戌新

除揚州刺史邵陵王綸有罪免爲庶人三月庚午侍中領國子博
士蕭子顯表置制旨孝經助教一人生十人專通帝所釋孝經義
夏四月盤盤國遣使朝貢秋七月甲辰星隕如雨九月乙巳加司
空袁昂尚書令冬十一月高麗國遣使朝貢十二月丙子魏彭城
王尔朱仲遠來奔以爲定洛將軍封河南王北侵隨所尅土使自
封建庚辰以太尉元法僧爲郢州刺史驃騎大將軍開府同三司
之儀是歲魏相渤海王高歡平尔朱氏廢節閔皇帝及自所奉渤
海故王朗而奉平陽王修是爲孝武皇帝改中興二年爲太昌尋
又改爲永熙元年

五年春正月辛卯祀南郊大赦賜孝弟力田爵一級先是一日丙
夜南郊令解滌之等到郊所履行忽聞異香三隨風至及將行事
奏樂迎神畢有神光圓滿壇上朱紫黃白雜色食頃乃滅戊申都

下地震巳酉長星見辛亥祀明堂二月癸未幸同泰寺設四部大會升法坐發金字般若經題訖于巳丑三月丙辰大司馬南平王偉薨夏五月戊子都下大水御道通船六月巳卯魏建義城主蘭保殺東徐州刺史崔祥以下邳降冬十月庚申以尚書右僕射何敬容爲左僕射以吏部尚書謝舉爲右僕射是歲河南波斯盤盤等國並遣使朝貢

六年春二月癸亥耕藉田大赦賜孝悌力田爵一級三月巳亥以行河南王可沓振爲西秦河二州刺史正封河南王甲辰百濟國遣使朝貢夏四月丁卯熒惑在南斗秋七月甲辰林邑國遣使朝貢冬十月丁卯以信武將軍元慶和爲鎮北將軍封魏王率衆北侵閏十二月丙午西南有雷聲二是歲魏孝武帝迫于其相高歡出居關中歡又別奉清河王世子善見爲主是爲孝靜帝改永熙

三年爲天平元年魏於是始分爲兩孝武既至關中又與丞相宇文泰不平未幾遇鳩而崩

大同元年春正月戊申朔大赦改元二月辛巳祀明堂丁亥耕藉田辛丑高麗丹丹國並遣使朝貢二月丙寅幸同泰寺設無遮大會辛未滑國遣使朝貢夏四月庚子波斯國遣使朝貢壬戌幸同泰寺鑄十方銀像并設無碍會秋七月辛卯扶南國遣使朝貢冬十月雨黃塵如雪十一月壬戌北梁州刺史蘭欽攻漢中魏梁州刺史元羅降癸亥復梁州是歲西魏文皇帝大統元年

二年春二月乙亥耕藉田三月庚辰詔求讜言及令文武在位舉士戊寅帝幸同泰寺設平等法會夏四月乙未以開府同三司之儀元法僧爲太尉五月癸卯以魏梁州刺史元羅爲青冀二州刺史封東郡王六月丁亥詔郊明堂陵廟等令改視散騎侍郎秋九

月辛亥幸同泰寺設四部無碍法會冬十月乙亥詔大舉北侵壬午幸同泰寺設無碍大會十一月雨黃塵如雪攬之盈掬己亥詔北侵衆軍班師辛亥都下地震生白毛長二尺十二月壬申與東魏通和

三年春正月辛丑祀南郊大赦賜孝悌力田爵一級是夜朱雀門災壬寅雨灰黃色二月丁亥耕藉田癸巳以護軍將軍蕭藻爲尚書左僕射三月戊戌立昭明太子子警爲武昌郡王警爲義陽郡王夏五月癸未幸同泰寺鑄十方金銅像設無碍法會六月青州胸山隕霜秋七月青州雪害苗稼癸卯東魏人來聘己酉義陽王警薨八月辛卯幸阿育王寺設無碍法喜食大赦九月使兼散騎常侍張臯聘于東魏閏九月甲子侍中太尉元法僧薨冬十月丙辰都下地震是歲饑

四年春二月己亥耕藉田三月河南蠕蠕國並遣使朝貢夏五月甲戌東魏人來聘六月辛丑日有蝕之秋七月癸亥詔以東冶徒李胤之降象牙如來真形大赦戊寅使兼散騎常侍劉孝儀聘于東魏八月甲辰詔南兗等十二州旣經饑饉曲赦逋租宿責勿收今年三調九月閱武于樂游苑

五年春正月乙卯以護軍將軍廬陵王續爲驃騎將軍安右將軍尚書左僕射蕭藻爲中衛將軍並開府儀同三司中權將軍丹陽尹何敬容以本號爲尚書令吏部尚書張纘爲尚書左僕射丁巳御史中丞參禮儀事賀琛奏今南北二郊及藉田往還並宜御輦不復乘路三郊請用素輦藉田往還乘常輦皆以侍中陪乘停大將軍及太僕詔付尚書博議施行改素輦名大同輦郊祀宗廟乘佩輦辛未祀南郊詔孝弟力田及州閭鄉黨稱爲善人者各賜爵

一級秋八月乙酉扶南國獻生犀冬十一月乙亥東魏人來聘十二月使兼散騎常侍柳豹聘于東魏是歲都下訛言天子取人肝以飴天狗大小相警日晚便閉門持仗數月乃止

六年春正月庚戌朔曲赦司豫徐兗四州二月己亥耕藉田夏四月癸未詔晉宋齊三代諸陵有職司者勤加守護五月己卯河南王遣使朝獻馬及方物求釋迦像并經論十四條敕付像并制旨涅槃般若金光明講疏一百三卷秋七月丁亥東魏人來聘遣散騎常侍陸晏子報聘八月戊午大赦辛未盤盤國遣使朝貢九月戊戌司空袁昂薨冬十一月己卯曲赦都下十二月壬子江州刺史豫章王歡薨

七年春正月辛巳祀南郊大赦辛丑祀明堂二月乙巳以行宕昌王梁彌泰為平西將軍河涼二州刺史正封宕昌王辛亥耕藉田

乙卯都下地震夏四月戊申東魏人來聘遣兼散騎常侍明少遐報聘冬十一月丙子詔停所在使役女丁十二月壬寅東魏人來聘遣兼散騎常侍袁狎報聘丙辰於宮城西立士林館延集學者是歲宕昌蠕蠕高麗百濟滑國各遣使朝貢百濟求涅槃等經疏及醫工畫師毛詩博士並許之交州人李賁攻刺史蕭諮

八年春正月安成郡人劉敬躬挾左道以反二月戊戌江州刺史湘東王繹遣中兵曹子郢討禽之送于都斬之建康市三月於江州新蔡高塘立頌平屯墾作蠻田

九年春閏正月丙申地震生毛三月以太子詹事謝舉為尚書僕射夏四月林邑王破德州攻李賁賁將范脩又破林邑王於九德敗走之冬十一月益州刺史武陵王紀進號征西將軍開府儀同

三司

十年春正月李賁竊號于交趾年號天德三月甲午幸蘭陵庚子
謁建陵有紫雲陰陵上食頃乃散帝望陵流涕所需草皆變色陵
傍有枯泉至是而流水香潔辛丑哭于修陵壬寅於皇基寺設法
會詔賜蘭陵老少位一階并加頒賚所經縣邑無出今年租賦因
賦還舊鄉詩癸卯詔園陵職司恭事勤勞並錫位一階并加賜賚
巴西幸京口城北固樓因改名北顧庚戌幸回賓亭宴帝鄉故老
及所經近縣奉迎候者少長數千人各賚錢二千夏四月乙卯至
自蘭陵詔鰥寡孤獨尤貧者贍恤各有差五月廣州人盧子略反
刺史新渝侯映討平之詔曲赦廣州秋九月己丑赦冬十一月大
雪平地三尺

十一年春正月震華林園光嚴殿重雲閣帝自貶拜謝上天累刻
乃止夏四月東魏人來聘冬十月己未詔復開贖罪典

中大同元年春正月丁未曲阿縣建陵隧口石辟邪起舞有大蛇
鬪隧中其一被傷奔走青蟲食陵樹葉略盡癸丑交州刺史楊暉
尅交趾嘉寧城李賁竄入屈獠洞交州平三月乙巳大赦庚戌幸
同泰寺講金字三慧經仍施身夏四月丙戌皇太子以下奉贖仍
於同泰寺解設法會大赦改元是夜同泰寺災六月辛巳竟天有
聲如風水相薄秋七月甲子詔自今有犯罪者非大逆父母祖父
母勿坐丙寅詔曰朝四暮三衆狙皆喜名實未虧而喜怒爲用頃
聞外間多用九佰錢佰減則物貴佰足則物賤非物有貴賤是心
有顛倒至於遠方日更滋甚自今可通用足佰錢八月丁丑東揚
州刺史武昌王警薨甲午渴槃陁國遣使獻方物冬十一月癸酉
汝陰王劉哲薨

太清元年春正月己亥朔日有蝕之壬寅荊州刺史廬陵王續薨

辛酉祀南郊大赦甲子祀明堂是月東魏相渤海王高歡薨二月
巳卯白虹貫日庚辰東魏司徒侯景求以河南十三州內屬壬午
以景爲大將軍封河南王大行臺承制如鄧禹故事丁亥耕藉田
三月庚子幸同泰寺設無遮大會上釋御服服法衣行清淨大捨
名曰羯磨以五明殿爲房設素木牀葛帳土瓦器乘小輿私人執
役乘輿法服一皆屏除甲辰遣司州刺史羊鴉仁率土州刺史桓
和仁州刺史湛海珍等應接侯景兵未至而東魏遣兵攻景景又
割地求救於西魏方解圍乙巳帝升光嚴殿講堂坐師子講金字
三慧經捨身夏四月庚寅羣臣以錢一億萬奉贖皇帝菩薩僧衆
默許戊寅百辟詣鳳莊門奉表三請三荅頓首並如中大通元年
故事丁亥服袞冕御輦還宮幸太極殿如卽位禮大赦改元是月
神馬出皇太子獻寶馬頌六月戊辰以前雍州刺史鄱陽王範爲

征北將軍總督漢北征討諸軍事秋七月庚申羊鴉仁入縣瓠城
八月乙丑諸軍北征以南豫州刺史蕭明爲大都督赦緣邊初附
諸州戊子以大將軍侯景錄行臺尙書事九月癸卯王游苑成輿
駕幸苑冬十一月東魏將慕容紹宗大敗蕭明于寒山明被俘執
紹宗進圍潼州十二月戊辰命太子舍人元貞還北爲東魏主
二年春正月癸巳朔兩月相承如鈞見于西方戊戌詔在位各舉
所知巳亥東魏克渦陽辛丑以尙書僕射謝舉爲尙書令以守吏
部尙書王克爲尙書僕射甲辰東魏尅殷豫二州三月甲辰撫軍
將軍高麗王高延卒以其子成爲寧東將軍高麗王樂浪公巳未
屈獠洞斬李賁傳首建鄴夏四月丙子詔在朝及州郡各舉士五
月辛丑以新除中書令邵陵王綸爲安前將軍開府儀同三司辛
亥曲赦交愛德三州六月天裂于西北長十丈濶二丈光出如電

其聲若雷秋七月使兼散騎常侍謝班聘于東魏結和八月戊戌
侯景舉兵反甲辰使開府儀同三司邵陵王綸都督衆軍討景曲
赦南豫州九月戊辰地震江左尤甚壞屋殺人地生白毛長二尺
益州市有飛螽萬羣螿人死冬十月侯景襲譙州進攻陷歷陽戊
申以臨賀王正德爲平北將軍都督諸軍屯丹陽郡巳酉景自橫
江濟采石辛亥至建鄴臨賀王正德率衆附賊十一月戊午朔設
壇刑白馬祀蚩尤于太極殿前巳未景立蕭正德爲天子於南闕
前辛酉賊攻陷東府城庚辰邵陵王綸帥武州刺史蕭弄璋前譙
州刺史趙伯倫等入援乙酉進軍湖頭與賊戰賊敗績丙戌安北
將軍鄱陽王範遣世子嗣雄信將軍裴之高等率衆入援次張公
洲十二月戊申天西北裂有光如火尙書令謝舉卒丙辰司州刺
史柳仲禮前衡州刺史韋粲高州刺史李遷仕前司州刺史羊鴉

仁等率軍入援

三年春正月丁巳大都督柳仲禮率衆軍分據南岍賊濟軍于青
塘襲殺韋粲庚申白虹貫日三重邵陵王綸臨城公大連等率兵
集南岍戊辰有流星長三十丈墮武庫李遷仕及天門太守樊文
皎進軍青溪東爲賊所破文皎死之壬午熒惑守心二月侯景遣
使求和皇太子固請帝乃許之盟于西華門下景旣運東城米歸
于石頭亦不解圍啓求遣諸軍還丁未皇太子又命南兗州刺史
南康王會理前青冀二州刺史湘潭侯遷率江北之衆頓于蘭亭
苑甲子以開府儀同三司丹陽尹邵陵王綸爲司空以合州刺史
鄱陽王範爲征北大將軍開府儀同三司以司州刺史柳仲禮爲
侍中尙書僕射時景奸計旣成乃表陳帝失復舉兵向闕三月城
內以景違盟設壇告天地神祇戊午前司州刺史羊鴉仁等進軍

東府北與賊戰大敗時四方征鎮入援者三十餘萬莫有鬪志自相抄奪而已丁卯賊攻陷宮城縱兵大掠巳巳賊矯詔遣石城公大款解外援軍庚午侯景自爲都督中外諸軍事大丞相錄尚書事辛未援軍各退散丙子熒惑守心夏四月巳丑都下地震丙申又震巳酉帝以所求不供憂憤寢疾是月青冀二州刺史明少遐東徐州刺史湛海珍北青州刺史王奉伯各舉州附東魏五月丙辰帝崩于淨居殿時年八十六辛亥遷梓宮于太極前殿十一月乙卯葬於修陵追尊爲武皇帝廟號高祖帝性淳孝六歲獻皇太后崩水漿不入口三日哭泣有過成人及丁文帝憂時爲齊隨王諮議隨府在荆鎮以病聞便投劾星馳不復寢食倍道就路憤風驚浪不暫停止帝形容本壯及至都銷毀骨立親表士友皆不復識望宅奉諱氣絕久之每哭輒歐血數升服內日惟食麥二溢拜

婦山陵涕淚所洒松草變色及居帝位卽於鎮山造大愛敬寺青溪邊造智度寺於臺內立至敬等殿又立七廟堂月中再設淨饌每至展拜涕泗滂沱哀動左右少而篤學能事畢究雖萬機多務猶卷不輟手燃燭側光常至戊夜換通史六百卷金海三十卷制旨孝經義周易講疏及六十四卦二繫文言序卦等義樂社義毛詩春秋荅問尚書大義中庸講疏孔子正言孝經講疏凡二百餘卷王侯朝臣皆奉表質疑帝皆爲解釋修飾國學增廣生員立五館置五經博士天監初何佟之賀瑒嚴植之明山賓等覆述制旨并撰吉凶賓軍嘉五禮一千餘卷帝稱制斷疑焉大同中於臺西立士林館領軍朱异太府卿賀琛舍人孔子祛等遞互講述皇太子宣城王亦於東宮宣猷堂及揚州解開講於是四方郡國莫不向風爰自在田及登寶位躬制贊序詔誥銘誄箴頌牋奏諸文又

百二十卷六藝備閑基登逸品陰陽緯侯卜筮占決草隸尺牘騎射莫不稱妙晚乃溺信佛道日止一食膳無鮮腴惟豆羹糲飯而已或遇事擁日儻移中便嗽口以過製涅槃大品淨名三慧諸經義紀數百卷聽覽餘閑卽於重雲殿及同泰寺講說名僧碩學四部聽衆常萬餘人身衣布衣木棉皂帳一冠三載一被二年自五十外便斷房室後宮職司貴妃以下六宮禕褕三翟之外皆衣不曳地傍無錦綺不飲酒不聽音聲非宗廟祭祀大會饗宴及諸法事未嘗作樂勤於政務孜孜無怠每冬月四更竟卽敕把燭看事執筆觸寒手爲皴裂然仁愛不斷親親及所愛愆犯多有縱捨故政刑弛紊每決死罪常有哀矜涕泣然後可奏性方正雖居小殿暗室恒理衣冠小坐暑月未嘗褰袒雖見內豎小臣亦如遇大賓也初齊高帝夢屐而登殿顧見武明二帝後一人手張天地圖而

不識問之答曰順子後及崔慧景之逼長沙宣武王入援至越城夢乘馬飛半天而墜帝所馭化爲赤龍騰虛獨上時臺內有宿衛士爲覲常見太極殿有六龍各守一柱末忽失其二後見在宣武王宅時宣武爲益州覲乃往蜀伏事及宣武在郢此覲還都乃見六龍俱在帝所寢齋遂去郢之雍中途遇疾且死謂同侶曰蕭雍州必作天子具以前事語之推此而言蓋天命也雖在蒙塵齋戒不廢及疾不能進膳盥漱如初皇太子日中再朝每問安否涕泗交面賊臣侍者莫不掩泣疾久口苦索密不得再曰荷荷遂崩賊祕之太子問起居不得見慟于閣下始天監中沙門釋寶誌爲詩曰昔年三十八今年八十三四中復有四城北火酣酣帝使周捨封記之及中大同元年同泰寺災帝啓封見捨手迹爲之流涕帝生於甲辰三十八尅建鄴之年也遇災歲實丙寅八十三矣四月

十四日而起火之始自浮屠第三層三者帝之昆季次也帝惡之
召太史令虞履筮之遇《履》曰無害其由云西南得朋東北喪朋
安貞吉文言云東北喪朋乃終有慶帝曰斯魔鬼也酉應見卯金
來尅木卯爲陰賊鬼而帶賊非魔何也孰爲致之酉爲口舌當乎
說位說言乎兌故知善言之口宜前爲法事於是人人讚善莫不
從風或刺血灑地或刺血書經穿心然燈坐禪不食及太清元年
帝捨身光嚴重雲殿游仙化生皆震動三日乃止當時謂之祥瑞
識者以非動而動在洪範爲祇以比石季龍之敗殿壁畫人頸皆
縮入頭之類時海中浮鵠山去餘姚岍可千餘里上有女人年三
百歲有女官道士四五百人年並出百但在山學道遣使獻紅席
帝方捨身時其使適至云此草常有紅鳥居下故以爲名觀其圖
狀則鸞鳥也時有男子不知何許人於大眾中自割身以飴飢鳥

血流徧體而顏色不變又沙門智泉鐵鉤掛體以然千燈一日一
夜端坐不動開講日有三足鳥集殿之東戶自戶適于西南縣楣
三飛三集白雀一見于重雲閣前連理樹又有五色雲浮于華林
園昆明池上帝旣流遁益甚境內化之遂至喪亡云

論曰梁武帝時逢昏虐家遭冤禍旣地居勢勝乘機而作以斯文
德有此武功始用湯武之師終濟唐虞之業豈曰人謀亦惟天命
及據圖籙多歷歲年制造禮樂敦崇儒雅自江右以來年踰二百
文物之盛獨美于茲然先王文武遞用德刑備舉方之水火取法
陰陽爲國之道不可獨任而帝留心俎豆忘情干戚溺於釋教弛
于刑典旣而帝紀不立悖逆萌生反噬彎弧皆自子弟履霜弗戒
卒至亂亡自古撥亂之君固已多矣其或樹置失所而以後嗣失
之未有自己而得自己而喪追蹤徐偃之仁以致窮門之酷可爲

深痛可爲至戒者乎

南史卷七

梁本紀中第七

終

晉書卷之四十四

南史卷八

梁本紀下第八

晉書卷之四十五

太宗簡文皇帝諱綱字世讚小字大通武帝第三子昭明太子母弟也天監二年十月丁未生于顯陽殿五年封晉安王普通四年累遷都督雍州刺史中大通三年被徵入朝未至而昭明太子謂左右曰我夢與晉安王對奕擾道我以班劍授之王還當有此加乎四月昭明太子薨五月丙申立晉安王爲皇太子七月乙亥臨軒策拜以修繕東宮權居東府四年九月移還東宮太清三年臺城陷太子坐永福省見侯景神色自若無懼容五月丙辰帝崩辛巳太子卽皇帝位大赦癸未追尊穆貴嬪爲皇太后追謚妃王氏爲簡皇后六月丙戌以南康王會理爲司空丁亥立宣城王大器爲皇太子壬辰立當陽公大心爲尋陽郡王石城公大款爲江夏

郡王寧國公大臨爲南海郡王臨城公大連爲南郡王西豐公大春爲安陸郡王新塗公大成爲山陽郡王臨湘公大封爲宜都郡王高唐公大莊爲新興郡王秋七月甲寅廣州刺史元景仲謀應侯景西江督護陳霸先攻之景仲自殺霸先迎定州刺史蕭勃爲刺史庚午以司空南康王會理爲兼尚書令是月九江大饑人相食者十四五八月癸卯征東大將軍開府儀同三司南徐州刺史蕭藻薨丙午侯景矯詔儀同三司位比正公自令悉不加將軍以爲定準冬十月丁未地震是月百濟國遣使朝貢見城寺荒蕪哭于闕下

大寶元年春正月辛亥朔大赦改元丁巳天雨黃沙巳未西魏尅安陸執司州刺史柳仲禮盡有漢東地丙寅月晝見于東方癸酉前江都令祖皓起義兵于廣陵二月癸未侯景攻下廣陵皓見害乙巳以尚書僕射王克爲左僕射丙午侯景逼帝幸西州夏五月丙辰東魏靜帝遜位于齊庚午開府儀同三司鄱陽王範薨自春迄夏大旱人相食都下尤甚六月庚子前司州刺史羊鴉仁自尚書省出奔江陵秋七月戊辰賊行臺任約寇江州刺史尋陽王大心以州降之八月甲午湘東王繹遣領軍將軍王僧辯逼郢州邵陵王綸棄郢州走九月乙亥侯景自進位相國封二十郡爲漢王冬十月乙未景又逼帝幸西州曲宴自加宇宙大將軍都督六合諸軍事立皇子大鈞爲西陽郡王大威爲武寧郡王大球爲建安郡王大昕爲義安郡王大摯爲綏建郡王大園爲樂樂郡王壬寅侯景害司空南康王會理十一月任約進據西陽分兵寇齊昌執衡陽王獻送都下害之湘東王繹遣前寧州刺史徐文盛拒約南郡王前中兵參軍張彪起義於會稽若耶山攻破浙東諸縣

二年春二月邵陵王綸走至安陸董城爲魏所攻見殺三月庚戌魏文帝崩夏閏四月侯景圍巴陵六月乙巳解圍宵遁秋七月景還至建鄴八月戊午景遣僞衛尉卿彭儁廂公王僧貴入殿廢帝爲晉安王害皇太子大器尋陽王太心西陽王大鈞武寧王大威建安王大球義安王大昕及尋陽王諸子二十餘人矯爲帝詔以爲次當支庶宜歸正嫡禪位于豫章王棟使呂季略送詔令帝寫之帝書至先帝念神器之重思社稷之固越升非次遂主震方嗚咽不能自止賊衆皆爲掩泣乃幽帝於永福省棟卽位改元天正使害南海王大臨於吳郡南郡王大連於姑孰安陸王大春於會稽新興王大莊於京口冬十月壬寅帝崩於永福省時年四十九賊僞謚曰明皇帝廟稱高宗明年三月巳丑王僧辯平侯景率百官奉梓宮升朝堂元帝追崇爲簡文皇帝廟號太宗四月乙丑葬

莊陵帝幼而聰睿六歲便能屬文武帝弗之信於前面試帝攬筆立成文武帝嘆曰常以東阿爲虛今則信矣及長器宇寬弘未嘗見喜愠色尊嚴若神方願豐下須鬢如畫直髮委地雙眉翠色項毛左旋連錢入背手執玉如意不相分辨眇眇則目光燭人讀書十行俱下辭藻豔發博綜羣言善談玄理自十一便能親庶務歷試藩政所在稱美孝恭居穆貴嬪憂哀毀骨立所坐席霑濕盡爛在襄陽拜表侵魏遣長史柳津司馬董當門壯武將軍杜懷寶振遠將軍曹義宗等進軍尅南陽新野等郡拓地千餘里及居監撫多所弘宥文簿部領纖毫必察弘納文學之士賞接無倦嘗於玄圃述武帝所製五經講疏聽者傾朝野雅好賦詩其自序云七歲有詩癖長而不倦然帝文傷於輕靡時號宮體所著昭明太子傳五卷諸王傳三十卷禮大義二十卷長春義記一百卷法寶連

壁三百卷謝客文涇渭三卷玉簡五十卷光明符十二卷易林十
七卷竈經二卷沐浴經三卷馬槊譜一卷碁品五卷彈碁譜一卷
新增白澤圖五卷如意方十卷文集一百卷並行於世初卽位制
年號將曰文明以外制強臣取周易內文明而外柔順之義恐賊
覺乃改爲大寶雖在蒙塵尙引諸儒論道說義披尋墳史未嘗暫
釋及見南康王會理誅知不久指所居殿謂舍人殷不害曰麗涓
死此下又曰吾昨夢吞土試思之不害曰昔重耳饋塊卒反晉國
陛下所夢將符是乎帝曰儻幽冥有徵異斯言不妄初景納帝女
溧陽公主公有美色景惑之妨於政事王偉每以爲言景以告
主主出惡言偉知之懼見讒乃謀廢帝而後間主苦勸行殺以絕
衆心廢後王偉乃與彭儁王修纂進觴於帝曰丞相以陛下幽憂
旣久使臣上壽帝笑曰已禪帝位何得言陛下此壽酒將不盡此

乎於是儁等并賚酒肴曲項琵琶與帝極飲帝知將見殺乃盡酣
謂曰不圖爲樂一至於斯旣醉而寢偉乃出儁進土囊王修纂坐
上乃崩竟協於夢偉撤戶扉爲棺遷殯于城北酒庫中帝自幽繫
之後賊乃撤內外侍衛使突騎圍守墻垣悉有枳棘無復紙乃書
壁及板鄣爲文自序云有梁正士蘭陵蕭世讚立身行道終始若
一風雨如晦鷄鳴不已弗欺暗室豈况三光數至於此命也如何
又爲文數百篇崩後王偉觀之惡其辭切卽使刮去有隨偉入者
誦其連珠三首詩四篇絕句五篇文並悽愴云

世祖孝元皇帝諱繹字世誠小字七符武帝第七子也初武帝夢
眇目僧執香爐稱託生王宮旣而帝母在采女次侍始塞戶幔有
風回裾武帝意感幸之采女夢月墮懷中遂孕天監七年八月丁
巳生帝舉室中非常香有紫胞之異武帝奇之因賜采女姓阮進

爲修容十三年封湘東王太清元年累遷爲鎮西將軍都督荊州
刺史三年三月侯景陷建鄴四月世子方等至自建鄴知臺城不
守帝命柵江陵城周回七十里鎮西長史王冲等拜牋請爲太尉
都督中外諸軍事承制主盟帝不許曰吾於天下不賤寧俟都督
之名帝子之尊何藉上台之重議者可斬投筆流淚冲等重請不
從又請爲司空以主諸侯亦弗聽乃開鎮西府辟天下士是月帝
徵兵於湘州刺史河東王譽譽拒命尋上甲侯韶自建鄴至宣三
月十五日密詔授帝位假黃鉞大都督中外諸軍事司徒承制於
是立行臺於南郡而置官司焉七月遣世子方等討河東王譽軍
敗死之又遣鎮兵將軍鮑泉討譽九月乙卯雍州刺史岳陽王詒
舉兵寇江陵其將杜崩兄弟來降詒遁走鮑泉攻湘州未尅又遣
左衛將軍王僧辯代將及簡文帝卽位改元爲大寶元年帝以簡
文制于賊臣卒不遵用正月使少子方晷質于魏魏不受質而約
爲兄弟四月尅湘州斬譽湘州平雍州刺史岳陽王詒自稱梁王
蕃于魏魏遣兵助伐襄陽先是邵陵王綸書已言凶事祕之以待
湘州之捷是月壬寅始命陳瑩報武帝崩問帝哭于正寢六月江
夏王大款山陽王大成宜都王大封自信安來奔九月辛酉以前
郢州刺史南平王恪爲中衛將軍尚書令開府儀同三司改封大
款爲臨川郡王大成爲桂陽郡王大封爲汝南郡王十一月甲子
南平王恪等奉牋進位相國總百揆帝不從二年三月侯景悉兵
西上閏四月景遣其將宋子仙任約襲郢州執刺史方諸庚戌領
軍王僧辨屯師巴陵五月癸未帝遣將胡僧祐陸法和援巴陵六
月僧祐等擊破景將任約軍禽約景解圍宵遁以王僧辯爲征東
將軍開府儀同三司尚書令率衆追景所至皆捷進圍郢州獲賊

將宋子仙等九月盤盤國獻馴象十月辛丑朔紫雲如蓋臨江陵城是月簡文帝崩開府儀同三司王僧辯等奉表勸進帝奉諱大臨三日百官縞素答表不許司空南平王恪率宗室領軍將軍胡僧祐率羣僚江州別駕張佚率吏人並奉牋勸進帝固讓十一月乙亥僧辯又奉表勸進又不從時巨寇尙存帝未欲卽位而四方表勸前後相屬乃下令斷表

承聖元年二月王僧辯衆軍發自尋陽帝馳檄四方購獲景及逆者封萬戶開國公絹布五萬疋三月僧辯等平景傳首江陵戊子以賊平告明堂太社己丑僧辯等又表勸進曰衆軍以今月戊子總集建康賊景鳥伏獸窮頻擊頻挫茲竭詐盡深溝自固臣等分勒武旅百道同趨突騎短兵犀函鐵楯結隊千羣持戟百萬止紂七步圍項三重轟然大潰羣凶四滅京師少長俱稱萬歲長安酒

食於此價高九縣雲開六合清朗矧伊黔首誰不載躍伏惟陛下咀痛茹哀嬰憤忍酷自紫庭絳闕胡塵四起墉垣好時異馬雲屯泣血臨兵嘗膽誓衆而吳楚一家方與七國俱反管蔡流言又以三監作亂西涼義衆阻秦塞而不通并州遺黎跨飛狐而見絕豺狼當路非止一人鯨鯢不梟脩焉五載英武克振怨恥並雪永尋霜露伊何可勝臣等輒依故實奉修社廟使者持節分告園陵嗣后升遐龍輅未殯承華掩曜梓宮莫測並卽隨由備辦禮具凶荒四海同哀六軍祖哭聖情孝友理當感動日者百司岳牧仰祈宸鑒以錫珪之功旣歸有道當璧之禮允屬聖明而優詔謙冲杳然凝邈飛龍可躋而乾爻在四帝閽云叫而閭闔未開謳歌再馳是用翹首所以越人固執熏丹穴以求君周人樂推踰岐山而事主漢王不卽位無以貴功臣光武止蕭王豈謂紹宗廟黃帝迷於襄

城尚訪御人之道放勛寂於姑射猶使樽俎有歸伊此儻來豈聖
人所欲帝王所應不獲已而然伏讀聖書尋諷制旨領懷物外未
奉慈衷陛下日角龍顏之姿表於狗齊之日彤雲素靈之瑞基於
應物之初博學則大哉無所與名深言則曄乎文章之觀忠爲令
德孝實動天加以英威茂略雄圖武算指麾則丹浦不戰顧眄則
阪泉自蕩地維絕而重紐天柱傾而更植鑿河津於孟門百川復
啓補穹儀以五石萬物再生縱陛下拂衣而游廣城登嶼山而去
東土羣臣安得仰訴兆庶何所歸仁况郊祀配天曷篚禮曠言法
清廟匏竹不陳仰望鑿輿匪朝伊夕瞻言法駕載渴且_且豈可久
稽衆議有曠彝則舊邦凱復函洛已平高奴櫟陽宮館雖毀濁河
清渭佳氣猶存臯門有亢其泉四敞土圭測景仙人承露斯蓋九
州之赤縣六合之樞機博士捧圖書而稍還太常定禮儀其已立

豈得不揚清警而赴名都具玉鑿而旋正寢昔東周既遷鎬京遂
其不復長安一亂邾洛永以爲居夏后以萬國朝諸侯文王以六
州匡天下方之跡基百里劔杖三尺以燧楚之地抗拒六戎一旅
之卒翦夷三叛坦然大定御辯東歸解五牛於冀州秣六馬於譙
郡緬求前古其可得歟對揚天命無所讓德有理存焉敢重祈奏
帝尚未從辛卯宣猛將軍朱買臣奉帝密旨害豫章王棟及其二
弟橋樛四月乙巳益州刺史新除假黃鉞太尉武陵王紀僭位於
蜀年號天正帝遣兼司空蕭泰祠部尚書樂子雲拜謁瑩陵修復
社廟丁巳下令解嚴五月庚午司空南平王恪及宗室王侯大都
督王僧辯等復拜表上尊號帝猶固讓甲申以開府儀同三司江
州刺史王僧辯爲司徒乙酉斬賊左僕射王偉尚書呂季略少府
卿周石珍舍人嚴亶於江陵市乃下令赦境內齊將潘樂辛術等

攻秦郡王僧辯遣將杜顛帥眾拒之以陳霸先爲征北大將軍開
府儀同三司徐州刺史齊人賀平侯景八月武陵王紀率巴蜀之
眾東下遣護軍將軍陸法和屯巴峽以拒之九月甲戌司空南平
王恪薨十月乙未前梁州刺史蕭循自魏至江陵以爲平北將軍
開府儀同三司戊申執湘州刺史王琳於殿內庚戌琳長史陸納
及其將潘烏累等舉兵反攻陷湘州是月四方征鎮王公卿士復
勸進表三上乃許之冬十一月丙子皇帝卽位於江陵改太清六
年爲承聖元年通租宿責並許弘宥孝子順孫悉皆賜爵長徒鎖
士特加原有禁錮奪勞一皆曠蕩是日帝不升正殿公卿陪列而
巳時有兩日俱見巳卯立王太子方矩爲皇太子改名元良立皇
子方智爲晉安郡王方略爲始安郡王追尊所生妣阮修容爲文
宣太后改謚忠壯太子爲武烈太子封武烈子莊爲永嘉王是月

陸納遣將軍潘烏累等破衡州刺史丁道貴於淥口道貴走零陵
十二月陸納分兵襲巴陵湘州刺史蕭循擊走之天門山獲野人
出山三日而死星隕吳郡淮南有野象數百壞人室廬宣城郡猛
獸暴食人是歲魏廢帝元年

二年春正月乙丑詔王僧辯討陸納戊寅以吏部尚書王褒爲尚
書僕射巳卯江夏宮南門籬牡飛三月庚寅有兩龍見湘州西江
夏五月甲申魏大將尉遲迥進兵逼巴西潼州刺史楊乾運以城
納迥巳丑武陵王紀軍至西陵六月乙卯王僧辯平湘州秋七月
武陵王紀眾大潰見殺八月戊戌尉遲迥平蜀九月齊遣郭元建
及將邢杲遠步六汗薩東方老帥眾頓合肥冬十一月辛酉僧辯
留鎮姑熟豫州刺史侯瑱據東關壘徵吳興太守裴之橫帥眾繼
之戊戌以尚書僕射王褒爲左僕射湘東太守張綰爲右僕射十

二月宿豫土人東方光據城歸北齊江西州郡皆起兵應之
三年春正月魏帝爲相安定公所廢而立齊王廓是爲公帝元年
三月主衣庫見黑蛇長丈許數十小蛇隨之舉頭高丈餘南望俄
失所在帝又與宮人幸玄洲苑復見大蛇盤屈於前羣小蛇遶之
並黑色帝惡之宮人曰此非怪也恐是錢龍帝敕所司卽日取數
千萬錢鎮於蛇處以厭之因設法會赦囚徒振窮乏還居栖心省
又有蛇從屋墮落帝帽上忽然便失又龍光殿上所御肩輿復見
小蛇縈屈輿中以頭駕夾膝前金龍頭上見人走去逐之不及城
濠中龍騰出煥爛五色竦躍入雲六七小龍相隨飛去羣魚騰躍
墜死於陸道龍處爲窟若數百斛圖舊大城上常有紫氣至時稍
復消歇甲辰以司徒王僧辯爲太尉車騎大將軍戊申以護軍將
軍郢州刺史陸法和爲司徒夏四月癸酉以征北大將軍開府儀

同三司陳霸先爲司空六月癸未黑氣如龍見于殿內秋九月
辛卯帝於龍光殿述老子義先是魏使宇文仁恕來聘齊使又至
江陵帝接仁恕有闕魏相安定公憾焉乙巳使柱國萬紐于謹來
攻冬十月丙寅魏軍至襄陽梁王蕭詧率衆會之丁卯停講內外
戒嚴輿駕出行城柵大風拔木丙子續講百僚戒服以聽詔徵王
僧辯十一月甲申幸津陽門講武置南北兩城主帝親觀閱風雨
總集部分未交旗幟飄亂帝趣駕而回無復次序風雨隨息衆竊
驚焉乙酉以領軍胡僧祐爲都督城東城北諸軍事右僕射張綰
爲副左僕射王褒都督城西城南諸軍事直殿省元景亮爲副丁
亥魏軍至柵下丙申徵廣州刺史王琳入援丁酉大風城內火燒
居人數千家以爲失在婦人斬首尸之是日帝猶賦詩不廢以胡
僧祐爲開府儀同三司庚子信州刺史徐世譜晉安王司馬任約

軍次馬頭岬是夜有流星墜城中帝援蓍筮之卦成取龜式驗之因抵于地曰吾若死此下豈非命乎因裂帛爲書催僧辯曰吾忍死待公可以至矣戊申胡僧祐朱買臣等出戰買臣敗績辛亥魏軍大攻帝出枇杷門親臨陣督戰僧祐中流矢薨軍敗反者斬西門守卒以納魏軍帝見執如梁王蕭譽營甚見詰辱他日乃見魏僕射長孫儉譎儉云埋金千斤於城內欲以相贈儉乃將帝入城帝因述譽相辱狀謂儉曰向聊相譎欲言耳豈有天子自埋金乎儉乃留帝於主衣庫十二月丙辰徐世譜任約退戍巴陵辛未魏人戕帝明年四月梁王方智承制追尊爲元皇帝廟號世祖帝聰悟俊朗天才英發出言爲論音響若鐘年五六歲武帝嘗問所讀書對曰能誦曲禮武帝使誦之卽誦上篇左右莫不驚歎初生患眼醫療必增武帝自下意療之遂盲一目乃憶先夢彌加愍愛及

長好學博極羣書武帝嘗問曰孫策在江東于時年幾荅曰十七武帝曰正是汝年帝性不好聲色頗慕高名爲荊州刺史起州學宣尼廟嘗置儒林參軍一人勸學從事二人生三十人加稟餼帝工書善畫自圖宣尼像爲之贊而書之時人謂之三絕與裴子野劉顯蕭子雲張纘及當時才秀爲布衣交常自比諸葛亮桓溫惟纘許焉性好矯飾多猜忌於名無所假人微有勝已者必加毀害帝姑義興昭長公主子王銓兄弟八九人有盛名帝妬害其美遂改寵姬王氏兄王珩名琳以同其父名忌劉之遴學使人鳩之如此者甚衆雖骨肉亦徧被其禍始居文宣太后憂依丁蘭作木母及武帝崩秘喪逾年乃發凶問方刻檀爲像置于百福殿內事之甚謹朝夕進蔬食動靜必啓聞迹其虛矯如此性愛書籍旣患目多不自執卷置讀書左右番次上直晝夜爲常略無休已雖睡卷

猶不釋五人各伺一更恒致達曉常眠熟大鼾左右有睡讀失次第或偷卷度紙帝必驚覺更令追讀加以櫛楚雖戎略殷湊機務繁多軍書羽檄文章詔詰點毫便就殆不游手常曰我韜於文士愧於武夫論者以爲得言始在尋陽夢人曰天下將亂王必維之又背生黑子巫媪見曰此大貴不可言初武帝敕賀革爲帝府諮議使講三禮革西上意甚不悅過別御史中丞江革江革告之曰吾嘗夢主上徧見諸子至湘東王脫帽授之此人後必當璧卿其行乎革頷之及太清之禍遂膺歸運自侯景之難州郡大半入魏自巴陵以下至建康緣以長江爲限荊州界北盡武寧西拒峽口自嶺以南復爲蕭勃所據文軌所同千里而近人戶著籍不盈三萬中興之盛盡於是矣武陵之平議者欲因其舟艦遷都建鄴宗慄黃羅漢皆楚人不願移帝及胡僧祐亦俱未欲動僕射王褒左

戶尚書周弘正驟言卽楚非便宗恒及御史大夫劉懿以爲建鄴王氣已盡且渚宮洲已滿百於是乃留尋而歲星在井熒惑守心帝觀之慨然而謂朝臣文武曰吾觀玄象將恐有賊但吉凶在我運數由天避之何益及魏軍逼關人朱買臣按劔進曰惟有斬宗慄黃羅漢可以謝天下帝曰曩實吾意宗黃何罪二人退入於人中及魏人燒柵買臣謝荅仁勸帝乘暗潰圍出就任約帝素不便馳馬曰事必無成徒增辱耳荅仁又求自扶帝以問僕射王褒褒曰荅仁侯景之黨豈是可信成彼之勳不如降也乃聚圖書十餘萬卷盡燒之荅仁又請守子城收兵可得五千八帝然之卽授城內大都督以帝鼓吹給之配以公主旣而又召王褒謀之荅仁請入不得歐血而去遂使皇太子王褒出質請降有頃黃門郎裴政犯門而出帝乘白馬素衣出東門抽劔擊闔曰蕭世誠一至此乎

魏師至凡二十八日徵兵四方未至而城見尅在幽逼求酒飲之製詩四絕其一曰南風且絕唱西陵最可悲今日還蒿里終非封禪時其二曰人世逢百六天道異貞恒何言異螻蟻一旦損鷓鴣其三曰松風侵曉哀霜氛當夜來寂寥千載後誰畏軒轅臺其四曰夜長無歲月安知秋與春原陵五樹杏空得動耕人梁王嘗遣尚書傅準監行刑帝謂之曰卿幸爲我宣行準捧詩流淚不能禁進土囊而殞之梁王嘗使以布帊纏屍歛以蒲席束以白茅以車一乘葬于津陽門外愍懷太子元良及始安王方略等皆見害徐世譜任約自馬^頭走巴陵約後降于齊將軍裴畿畿弟機並被害謝荅仁三人相抱俱見屠汝南王大封尚書左僕射王褒以下並爲俘以歸長安乃選百姓男女數萬口分爲奴婢小弱者皆殺之帝於伎術無所不該嘗不得南信筮之遇剝之艮曰南信已至今

當遣左右季心往看果如所說賓客咸歎其妙凡所占決皆然初從劉景受相術因訊以年荅曰未至五十當有小厄禳之可免帝自勉曰苟有期會禳之何益及是四十七矣特多禁忌牆壁崩倒屋宇傾頽年月不便終不修改庭草蕪沒令鞭去之其慎護如此著孝德傳忠臣傳各三十卷丹陽尹傳十卷注漢書一百十五卷周易講疏十卷內典博要百卷連山三十卷詞林三卷玉韜金樓子補闕子各十卷老子講疏四卷懷舊傳二卷古今全德志荆南地記貢職圖古今同姓名錄一卷筮經十二卷式贊三卷文集五十卷初承聖二年三月有二龍自南郡城西升天百姓聚觀五采分明江陵故老竊相泣曰昔年龍出建康淮西天下大亂今復有焉禍至無日矣帝聞而惡之踰年而遭禍又江陵先有九十九洲古老相承云洲滿百當出天子桓玄之爲荊州刺史內懷篡逆之

心乃遣鑿破一洲以應百數隨而崩散竟無所成宋文帝爲宜都王在藩一洲自立俄而文帝篡統後遇元凶之禍此洲還沒太清末枝江楊之閣浦復生一洲羣公上疏稱慶明年而帝卽位承聖末其洲與大岬相通惟九十九云

敬皇帝諱方智字慧相小字法真元帝第九子也太清二年封梁興侯承聖元年封晉安郡王二年出爲江州刺史三年十一月魏尅江陵太尉王僧辯司空陳霸先定議以帝爲梁王太宰承制四年二月癸丑於江州奉迎至建鄴入居朝堂以太尉王僧辯爲中書監錄尚書驃騎大將軍都督中外諸軍事加司空陳霸先班劍二十人以湘州刺史蕭循爲太尉廣州刺史蕭勃爲司徒三月齊遣其上黨王高渙送貞陽侯蕭明來主梁嗣至東關遣吳興太守裴之橫拒之與戰敗績死之四月司徒陸法和以郢州附齊遣江

州刺史侯瑱討之七月辛丑僧辯納貞陽侯蕭明自采石濟江甲辰入建鄴丙午卽僞位年號天成以帝爲皇太子司空陳霸先襲殺王僧辯黜蕭明而奉帝焉

紹泰元年秋九月丙午皇帝卽位冬十月己巳大赦改元以貞陽侯蕭明爲司徒封建安郡公壬子加司空陳霸先尚書令都督中外諸軍事震州刺史杜龕舉兵攻信武將軍陳蒨於長城義興太守韋載應之癸丑以太尉蕭循爲太保以司徒蕭明爲太傅司徒蕭勃爲太尉以鎮南將軍王琳爲車騎將軍開府儀同三司戊午尊所生夏貴妃爲皇太后立妃王氏爲皇后辛未司空陳霸先東討韋載降之丙子南豫州刺史任約譙秦二州刺史徐嗣徽舉兵據石頭反十一月庚辰齊安州刺史翟子崇楚州刺史柳達摩率衆赴任約入石頭十二月庚戌任約徐嗣徽等至采石迎齊援丙

辰遣猛烈將軍侯安都於江寧邀擊敗之約嗣徽等奔江西庚申翟子崇等降並放還北

太平元年春正月戊寅大赦追贈謚簡文帝諸子封故永安侯確子後爲邵陵王奉攜王後癸未震州刺史杜龕降詔賜死赦吳興郡己亥以太保宜封侯蕭循襲封鄱陽王東揚州刺史張彪圍臨海太守王懷振於剡岩二月庚戌遣周文育陳蒨襲會稽討彪敗走以中尉將軍臨川王大款卽本號開府儀同三司丙辰若邪村人斬張彪傳首建鄴赦東揚州甲子以東土經杜龕張彪之亂遣大使巡省是月齊人來聘使侍中王廓報聘三月壬午班下遠近並雜用今古錢戊戌齊將蕭軌出柵口向梁山陳霸先大敗之夏四月壬申侯安都輕兵襲齊行臺司馬恭於歷陽大破之五月癸未太傅建安公蕭明薨庚寅齊軍水步入丹陽縣內外纂嚴六月

壬子齊軍至玄武湖西北乙卯陳霸先大破齊軍戊午大赦辛酉解嚴秋七月丙子司空陳霸先進位司徒丁亥以開府儀同三司侯瑱爲司空八月己酉太保鄱陽王循薨九月壬寅大赦改元司徒陳霸先進位丞相錄尚書事改封義興郡公加中權將軍王冲開府儀同三司以吏部尚書王通爲尚書右僕射冬十月乙亥魏相安定公薨十一月起雲龍神武門十二月壬申進太尉蕭勃爲太保甲午封前壽昌令劉叡爲汝陰王前鎮西法曹行參軍蕭沈爲巴陵王奉宋齊二代後庚子魏恭帝遜位于周二年春正月壬寅詔求魯國孔氏族爲奉聖侯并繕廟堂供備祀典又詔諸州各置中正舊放舉選不得輒承單狀序官皆須中正押上然後量授其選中正每求耆德該悉以他官領之以開府儀同三司王琳爲司空以尚書右僕射王通爲左僕射二月庚午遣

領軍將軍徐度入東關太保廣州刺史蕭勃舉兵反詔平西將軍周文育平南將軍侯安都等南討戊子徐度至合肥燒齊船舶三千艘癸巳周文育軍於巴山獲蕭勃僞帥歐陽頎三月甲寅德州刺史陳法武前衡州刺史譚遠於始興攻殺蕭勃夏四月癸酉曲赦江廣衡三州并督內爲賊所拘逼者巳卯鑄四柱錢一當二十齊遣使通和壬辰改四柱錢一當十丙申復用細錢五月乙巳平西將軍周文育進號鎮南將軍平南將軍侯安都進號鎮北將軍並開府儀同三司戊辰余孝頃遣使詣丞相府求降秋八月加丞相陳霸先殊禮九月周冢宰宇文護殺閔帝丞相陳霸先改授相國封陳國公冬十月戊辰進陳國公爵爲王辛未帝遜位于陳陳受命奉帝爲江陰王薨于外邸時年十六追謚敬皇帝

論曰帝王之位天下之重職文武之道守國所常遵其於行用義

均水火相資則可專任成亂觀夫有梁諸帝皆一之而已簡文文明之姿稟乎天授粵自支庶人居明兩經國之算其道弗聞宮體所傳且變朝野雖主虛號何救滅亡元帝居勢勝之地啓中興之業旣雪讐恥且應天人而內積猜忍外崇矯飾攀號之節忍酷於踰年定省之制申情於木偶竟而雍州引寇釁起河東之戮益部親尋事習邵陵之窘悖辭屈于僧辯殘虐極於圓正不義不昵若斯之甚而復謀無經遠心勞志大近捨宗國遠迫強鄰外弛藩籬內崇講肄卒於溘至戕隕方追始皇之迹雖復文籍滿腹何救社廟之墟歷觀書契以來蓋亦廢興代有未見三葉遘愍頓若蕭宗之酷敬皇以此冲年當斯頹運將不高揖其可得乎初武帝末年都下用錢每佰皆除其九謂爲九佰竟而有侯景之亂及江陵將覆每佰復除六文稱爲六佰識者以爲九者陽九六者百六蓋符

歷數非人事也善乎鄭文貞公論之曰高祖固天攸縱聰明稽古道亞生知學爲博物允文允武多藝多才爰自諸生有不羈之度屬昏凶肆虐天倫及禍糾合義旅將雪家冤曰紂可伐不期而會龍躍樊漢電擊湘郢翦離德如振槁取獨夫如拾遺其雄才大略固無得而稱矣旣縣白旗之首方應皇天之眷布德施惠悅近來遠開蕩蕩之王道革靡靡之商俗大修文教盛飾禮容鼓扇玄風闡揚儒業介胄仁義折衝尊俎聲振寰宇澤流遐裔于戈載戢凡數十年濟濟焉洋洋焉魏晉以來未有若斯之盛也然不能息末敦本斷彫爲樸慕名好事崇尚浮華抑揚孔墨流連釋老或終夜不寢或日旰不食非弘道以利物惟飾智以驚愚且心未遺榮虛廁蒼頭之位高談脫屣終戀黃屋之尊夫人之大欲在乎飲食男女至於軒冕殿堂非有切身之急高祖屏除嗜欲眷戀軒冕得其

所難而滯於所易可謂神有所不達智有所不通矣逮夫精華稍竭鳳德已衰惑於聽受權在奸佞儲后百辟莫能盡言險躁之心暮年逾甚見利而動懷諫違卜開門揖盜棄好卽讐釁起蕭牆禍成戎羯身殞非命災被億兆衣冠斃鋒鏑之下老幼粉戎馬之足瞻彼黍離痛深周廟永言麥秀悲甚殷墟自古以安爲危旣成而敗顛覆之速書契所未聞也易曰天之所助者順人之所助者信高祖之遇斯屯剝不得其死蓋動而之險不由信順失天人之助其能免於此乎太宗敏叡過人神采秀發多聞博達富瞻詞藻然文艷用寡華而不實體窮淫麗義罕疎通哀思之音遂移風俗以此而貞萬國異乎周誦漢莊矣我生不辰載離多難桀逆構扇巨猾滔天始同姜里之拘終類望夷之禍悠悠蒼昊其可問哉昔國步初屯兵纏魏闕羣后釋位投袂勤王元帝以盤石之宗受分陝

之任屬君親之難居連率之長不能撫劍嘗膽枕戈泣血射先士
卒致命前驅遂乃擁眾逡巡內懷觖望坐觀國變以為身幸不急
莽卓之誅先行昆弟之戮又沈猜忍酷多行無禮騁智辯以飾非
肆忿戾以害物爪牙重將心膂謀臣或顧盼以就拘囚或一言而
及菹醢朝之君子相顧慄然自謂安若太山算無遺策休於邪說
即安荆楚雖元惡克翦社稷未寧而西鄰責言禍敗旋及斯乃上
靈降鑒此焉假手天道人事其可誣乎其篤志藝文採浮華而棄
忠信戎昭果毅先骨肉而後寇讐口誦六經心通百氏有仲尼之
學有公旦之才適足以益其驕矜增其禍患何補金陵之覆沒救
江陵之滅亡哉敬帝遭家不造紹茲屯運征伐有所自出政刑不
由於已時無伊霍之輔焉得不為高讓歟

南史卷八

梁本紀下第八

終

西川屯鳳園
氏蘭園開甫

南史卷九

陳本紀上第九

西川屯鳳園
氏蘭園開甫

陳高祖武皇帝諱霸先字興國小字法生吳興長城下若里人其
本甚微姓陳氏自云漢太丘長寔之後也寔玄孫晉太尉準準生
匡匡生逢永嘉中南遷為丞相掾太子洗馬出為長城令悅其山
水遂家焉嘗謂所親曰此地山川秀麗當有王者興焉二百年後
我子孫必鍾斯運逢生康復為丞相掾咸和中土斷故為長城人
康生盱眙太守英英生尚書郎公弼公弼生步兵校尉鼎鼎生散
騎侍郎高高生懷安令詠詠生安成太守猛猛生太常卿道巨道
巨生皇考文讚帝以梁天監二年癸未歲生少儻有大志長於
謀略意氣雄傑不事生產及長涉獵史籍好讀兵書明緯候孤虛
遁甲之術多武藝明逢果斷為當時推服身長七尺五寸日角龍

顏垂手過膝嘗游義興館于許氏夢天開數丈有四人朱衣捧日而至納之帝口及覺腹內猶熱帝心獨喜初仕鄉爲里司後至建鄴爲油庫吏徙爲新喻侯蕭映傳教勤於其事爲映所賞及映爲吳興太守甚重帝謂僚佐曰此人將來遠大必勝於我及映爲廣州帝爲中直兵參軍隨之鎮映令帝招集士馬先是武林侯蕭諮爲交州刺史以嚴刻失和土人李賁連結數州豪傑同時反臺遣高州刺史孫罔新州刺史盧子雄將兵擊賁罔等不時進皆於廣州伏誅子雄弟子略與罔子姪及其主帥杜天合杜僧明共舉兵執南江督護沈顛進寇廣州晝夜苦攻州中震恐帝率精兵救之賊衆大潰僧明後有功業遂降梁武帝深歎異焉授直閣將軍封新枋縣子仍遣圖帝貌而觀之其年冬蕭映卒明年帝送喪還至大庾嶺會有詔以帝爲交州司馬與刺史楊暕南討帝益招勇敢

器械精利暕委帝經略時蕭勃爲定州刺史於西江相會勃知軍士憚遠役因詭說留暕集諸將問計帝曰交趾叛渙罪由宗室節下奉辭伐罪故當死生以之於是鼓行而進軍至交州暕推帝爲前鋒所向摧陷賁竄入屈獠洞中屈獠斬賁傳首建鄴是歲太清元年也賁兄天寶遁入九真與劫帥李紹隆收餘兵殺德州刺史陳文戒進圍愛州帝討平之除西江督護高要太守督七郡諸軍事二年冬侯景寇逼帝將赴援廣州刺史元景仲陰將圖帝帝知之與成州刺史王懷明等集兵於南海馳檄以討景仲繼于閩下帝迎蕭勃鎮廣州時臨賀內史歐陽頔監衡州蘭裕蘭京禮扇誘始興等十郡共攻頔頔請援於勃勃令帝救之悉禽裕等仍監始興郡事帝遣杜僧明胡穎將二千人頓于嶺上并厚結始興豪傑同謀義舉侯安都張偲等率衆來附蕭勃聞之遣鍾休悅說停

帝帝泣謂休悅曰君辱臣死誰敢愛命僕行計決矣時蔡路養起兵據南康勃遣腹心譚世遠爲曲江令與路養相結同遏義軍大寶元年正月帝發始興次大庾嶺大破路養軍進頓南康湘東王繹承制授帝交州刺史改封南野縣伯於是修理崎頭古城徙居之劉惠騫等望見恒有紫氣冒城上遠近驚異故惠騫等深自結於帝尋改封長城縣侯南江州刺史時寧都人劉藹等資高州刺史李遷仕舟艦兵仗將襲南康帝遣杜僧明等據白口禦之二年僧明禽遷仕送南康斬之承制授帝江州刺史帝發南康瀨石舊有二十四灘灘多巨石行旅以爲難帝之發水暴起數丈三百里間巨石皆沒進軍頓西昌有龍見水濱高五丈五采鮮曜軍人觀者數萬人帝又嘗獨坐胡牀於閣下忽有神光滿閣廊廡之間並得相見趙知禮侍側怪而問帝帝笑而不荅時承制遣征東將軍

王僧辯督衆軍討侯景次盆城帝率杜僧明等合三萬將會焉時西軍乏食帝先計軍糧五十萬石至是分三十萬石以資之仍頓巴丘會侯景廢簡文立豫章嗣王棟帝遣兼長史沈袞奉表於江陵勸進承制授帝東揚州刺史領會稽太守三年帝帥師發自豫章二月次桑落洲時僧辯已發盆城會帝於白茅灣乃登岬結壇刑牲盟約進次大雷軍人杜稜夢雷池君周何神自稱征討大將軍乘朱航陳甲仗稱下征侯景須臾便還云已殺景竟三月帝與諸軍進尅姑熟仍次蔡洲侯景登石頭城望官軍之盛不悅曰一把子人何足可打密謂左右曰此軍上有紫氣不易可當乃以舩舩貯石沈塞淮口緣淮作城自石頭迄青溪十餘里中樓雉相接僧辯遣杜崩問計於帝帝以諸將不敢當鋒請先往立柵卽於石頭西橫壠築柵衆軍次連八城直出東北賊恐西州路斷亦於東

北果林作五城以遏大路帝曰善用兵者如常山之蛇使救首救尾因而無暇今我師旣衆賊徒甚寡應分賊兵力以弱制疆乃命諸將分處置兵帝與王琳杜龕等悉力乘之景衆大潰僧辯啓命帝鎮京口五月齊遣將辛術圍嚴超達摩秦郡帝命徐度領兵助其固守齊衆起土山穿地道攻之甚急帝乃自率萬人解其圍振旅南歸承制授帝征北大將軍開府儀同三司南徐州刺史進封長城縣公及王僧辯征陸納於湘州承制命帝代鎮揚州承聖二年湘州平帝旋鎮京口三年三月進帝位司空及魏平江陵帝與王僧辯等進啓請晉安王以太宰承制十二月晉安王至自尋陽入居朝堂給帝班劍二十人四年五月齊送貞陽侯明還主社稷王僧辯納之明卽位改元天成以晉安王爲皇太子初齊之納貞陽也帝固爭之以爲不可不見從帝居嘗憤歎曰嗣主高祖之孫

元皇之子竟有何事坐致廢黜假立非次此情可知乃密具袍數千領及錦綿金銀以爲賞賜之資九月壬寅帝召徐度侯安都周文育仍部列將士水陸俱進夜發南徐州討王僧辯甲辰帝至石頭前遣勇士自城北踰入時僧辯方視事聞外白有兵遽走帝大兵尋至因風縱火僧辯就禽是夜縊之及其子頴於是廢貞陽侯而奉晉安王卽位改承聖四年爲紹泰元年壬子詔授帝侍中大都督中外諸軍事車騎將軍揚南徐二州刺史持節司空班劍鼓吹並如故仍詔甲仗百人出入殿省震州刺史杜龕據吳興與義興太守章載舉兵逆命辛未帝表自東討留高州刺史侯安都石州刺史杜稜宿衛臺省甲戌軍至義興泰州刺史徐嗣徽據城入齊又要南豫州刺史任約舉兵應龕齊人資其兵食嗣徽乘虛掩至關下侯安都出戰嗣徽等退據石頭丁丑載及龕從弟北叟來

降帝撫而釋之仍以載兄鼎知郡事以嗣徽寇逼卷甲還都命周
文育進討杜龕十一月己卯齊遣兵五千度據姑熟又遣安州刺
史翟子崇楚州刺史劉士榮淮州刺史柳達摩領兵萬人於胡墅
度米粟三萬石馬千匹入石頭帝乃遣侯安都領水軍夜襲胡墅
燒齊船周鐵武率舟師斷齊運輸帝領鐵騎自西明門襲之齊人
大潰嗣徽留達摩等守城自率親屬腹心往南州采石以迎齊援
先是太白自十一月丙戌不見十二月乙卯出于東方丙辰帝盡
命衆軍分部甲卒對冶城日立航度兵攻其水南二柵柳達摩等
喪淮置陣帝督兵疾戰縱火燒柵煙塵漲天齊人大潰盡收其船
艦是日嗣徽約等領齊兵還據石頭帝遣侯安都領水軍襲破之
嗣徽等單舸脫走丁巳拔石頭南岬柵移度北岬起柵以絕其汲
路又堙塞東門故城中諸井齊所據城中無水水一合買米一升

一升米買絹一疋或炒米食之達摩謂其衆曰頃在北童謠云石
頭擣兩襠擣青復擣黃侯景服青已倒於此今吾徒衣黃豈謠言
驗耶庚申達摩遣侯子欽劉士榮等請和帝許之乃於城外盟約
其將士恣其南北辛酉帝出石頭南門陳兵送齊人歸北者及至
齊人殺之壬戌齊和州長史烏丸遠自南州奔還歷陽江寧令陳
嗣黃門侍郎曹朗據姑熟不從帝命侯安都徐度等討平之聚其
首爲京觀是月杜龕以城降二年正月癸未誅龕其弟翕從弟北
叟司馬沈孝敦並賜死三月戊戌齊遣水軍儀同蕭軌庫狄伏連
堯難宗東方老侍中裴英起東廣州刺史獨孤辟惡洛州刺史李
希光并任約徐嗣徽王僧愔等衆十萬出柵口向梁山帳內盪主
黃叢逆擊敗之燒其前軍船艦齊頓軍保蕪湖五月丙申齊兵至
秣陵故城己亥帝率宗室王侯及朝臣於大司馬門外白虎闕下

刑牲告天以齊人背約發言慷慨涕泗交流士卒觀者益奮辛丑
齊軍於秣陵故城跨淮立橋柵引度兵馬癸卯自方山進及兒塘
游騎至臺都下震駭帝潛以精卒三千配沈泰度江襲齊行臺趙
彥深於瓜步護其舟粟六月甲辰齊兵潛至鍾山龍尾丁未進至
幕府山帝遣錢明領水軍出江乘邀擊齊人糧運盡獲之齊軍大
餒殺馬驢而食之壬子齊軍至玄武湖西北幕府山南將據北郊
壇衆軍自覆舟東移頓郊壇北與齊人相對其夜大雨震電暴風
拔水平地水丈餘齊軍晝夜坐立泥中縣鬲以爨足指皆爛而臺
中及潮溝北水退路燥官軍每得番易甲寅少霽是時食盡調市
人餽軍皆是麥屑爲飯以荷葉裹而分給間以麥餅兵士皆困會
文帝遣送米三千石鴨千頭帝卽炊米煮鴨誓申一戰士及防身
計糧數衡人人裹飯混以鴨肉帝命衆軍暮食攻之齊軍大潰執

嗣徽及其弟嗣宗斬之以徇虜蕭軌東方老王敬寶李希光裴英
起王僧智等將帥四十六人其軍士得竄至江者縛筏以濟中江
而溺流屍至京口者彌岸惟任約王僧愔獲免先是童謠云虜萬
夫入五湖城南酒家使虜奴自晉宋以後經綰在魏境江淮以北
南人皆謂爲虜是時以賞俘買酒者一人裁得一醉丁巳衆軍出
南州燒賊舟巳未斬劉歸義徐嗣產傅野猪于建康市是日解嚴
庚申誅蕭軌東方老王敬寶李希光裴英起等太平元年九月壬
寅帝進位丞相錄尚書事鎮衛大將軍揚州牧進封義興郡公庚
申追贈皇考侍中光祿大夫封義興郡公謚曰恭十月甲戌梁帝
敕丞相自今問訊可施別榻以近宸坐二年正月壬寅詔加帝班
劍十人并前爲三十丁未詔贈皇兄道談南兖州刺史長城縣公
謚曰昭烈皇弟休光侍中南徐州刺史武康縣侯謚曰忠壯甲寅

遣兼侍中謁者僕射陸繕策拜長城縣夫人草氏爲義興國夫人
丁卯詔贈皇祖侍中太常卿謚曰孝追封皇祖妣許氏吳郡嘉興
縣君謚曰敬皇妣張氏義興國太夫人謚曰宣二月庚午蕭勃舉
兵自廣州度嶺頓南康遣其將歐陽頎傅泰及其子孜爲前軍至
豫章分屯要險南江州刺史余孝頃起兵應勃帝命周文育侯安
都率衆討平之八月甲午帝進位太傅加黃鉞劔履上殿入朝不
趨贊拜不名丙申加前後部羽葆鼓吹是時湘州刺史王琳擁兵
不應命遣周文育侯安都率衆討之九月辛丑梁帝進帝位相國
總百揆封十郡爲陳公備九錫之禮加璽紱遠遊冠綠綬綬位在
諸侯王上策曰大哉乾元資日月以貞觀至哉坤元憑山川以載
物故惟天爲大陟配者欽明惟王建國翼輔者齊聖是以文武之
佐磻谿蘊其玉璜堯舜之臣滎河鏤其金板况乎體得一之鴻姿

寧陽九之危厄援橫流於碣石撲燎火於崑岡驅馭於韓彭跨蹠
於齊晉神功行而靡用聖道運而無名者乎今將授公典策其敬
聽朕命日者昊天不弔鍾亂於我國家網漏吞舟彊胡內鼎茫茫
宇宙懔懔黎元方趾圓顛萬不遺一太清否亢橋山之痛以深大
寶屯如平陽之禍相繼上宰膺運康救黔黎鞠旅於溟池之南揚
旌於桂嶺之北縣三光於已墜謚四海於羣飛光啓中興此則公
之大造於皇家者也旣而天未悔禍夷醜荐臻南夏崩騰西京蕩
覆冢司昏撓旁引寇讐旣見貶於桐宮方謀危於漢閣皇運已殆
何殊贅旒中國搖然非徒如綬公赫然投袂匡救本朝復莒齊都
平戎王室朕所以還膺寶歷重履宸居挹建武之風猷歌宣王之
雅頌此又公之大造於皇家者也公應務之初登庸惟始孫盧肇
釁越貊爲災番部帖危勢將淪殄公赤旗所指祆壘洞開白羽纔

馮凶徒粉潰此又公之功也大同之末邊政不修李賁狂迷竊我
交愛公英暮雅算電掃風行馳御樓船直跨滄海三山獠洞八角
蠻陬逃矣水寓之鄉悠哉火山之國馬援之所不屆陶璜之所未
開莫不懼我王靈爭朝邊候歸賒天府獻狀鴻臚此又公之功也
自寇虜陵江宮闈幽辱而奮禹連率本自諸夷言得其朋是懷同
惡公仗此忠誠乘機勦定執沛令而釁鼓平新野而據鞏此又公
之功也世道初艱方隅多難公以國盜邊警知無不爲恤是同盟
誅其醜類南土黔黎重保蘇息此又公之功也長驅嶺嶠夢想京
畿緣道酋豪遞爲榛梗路養渠帥全據大都蓄聚逋逃方謀阻亂
公龍驤虎步嘯吒風雲山靡堅城野無疆陣清祆氛於瀆石滅沴
氣於雩都此又公之功也遷仕凶慝屯據大臯乞活類馬騰之軍
流人多杜弢之衆公坐揮三略遙制六奇義勇同心貔貅騁力雷

奔電擊谷靜山空列郡無犬吠之驚叢祠罷狐鳴之盜此又公之
功也王師討虜次屆淪波兵乏兼儲士有饑色公回麾彭蠡積穀
巴丘億庾之詠斯豐壺漿之晷是衆故使三軍勇銳百戰無前承
此兵糧遂殄凶逆此又公之功也盆池猜鷹用淹戎略公志惟同
獎師克在和屈禮交盟神祇感咽故能使舟師並路遠邇朋心此
又公之功也姑熟襟要嶠函所憑寇虜據其關梁大盜負其肩鏑
公一校纔馮三雄並奮左賢右角沙潰土崩鄂坂之隘斯開夷庚
之道無塞此又公之功也義軍大衆俱集帝京逆豎凶徒猶屯皇
邑公回茲地軸抗此天羅曾不崇朝俾無遺噍此又公之功也內
難初靜諸侯出關外郡傳烽鮮卑犯塞公舟師步甲亘野橫江殲
厥羣氏遂殫封豕此又公之功也公克黜禍難劬勞皇室而孫寗
之黨翻啓狄人伊洛之間咸爲虜戍朝闈戎塵夜喧胡鼓公三籌

既畫八陣斯張裁舉靈鈺亦抽金僕咸俘醜類悉反高墉此又公之功也任約叛渙梟聲不悅戎羯貪婪狼心不改公左甄右落箕張翼舒掃是櫬槍驅其獫狁投秦坑而盡沸噎渚水而不流此又公之功也一相居中自折彘鼎五湖小守妄懷同惡公夙駕兼道秉羽杖戎玉斧將揮金鉦且戒袂首震懼遽請灰釘此又公之功也賊龕凶橫陵虐具區阻兵安忍憑災怙亂公雖宗居汝潁世寓東南眷言桑梓公私憤切戮此大憝如烹水鮮此又公之功也同姓有扈頑凶不賓憑藉宗盟圖危社稷公論兵於廟堂之上決勝於尊俎之間寇賈樊滕浮江下瀨一朝勦撲無待旬師此又公之功也豫章祆寇依憑山澤繕甲完聚多歷歲時結從連橫爰洎交廣呂嘉既獲吳淠已縱命我還師征其不恪連營盡拔僞黨斯禽此又公之功也自八紘九野瓜剖豆分竊帝偷王連州比縣公武

靈已暢文德又宣折簡馳書風猷斯遠此又公之功也京師禍亂亟積寒暄雙闕低昂九門寥廓公求衣昧旦仄食高春興構宮闈具瞻遐邇郊庠宗稷之典六符十等之章還聞太始之風流重覩永平之遺事此又公之功也公有濟天下之勲重之以明德凝神體道合德符天周百姓以爲心隨萬機以成務上德下德無爲以爲夏長春生顯仁藏用功成化洽樂奏咸雲安上御人禮兼文質是以天無蘊寶地有呈祥既景煥於圖書方歲蕤於史牒高勲踰於象魏積德冠於嵩華固無得而稱者矣朕又聞之前王宰世茂賞尊賢式樹藩長總征羣伯二南崇絕四履遐曠泱泱表海祚土維齊巖巖泰山俾侯于魯况復經營宇宙寧惟斷齧足之功弘濟蒼生非直鑿龍門之險而疇庸報德寂爾無聞朕所以垂拱當宁載懷慈悻者也今授公相國以南豫州之陳留南丹陽宣城揚州

之吳興東陽新安新寧南徐州之義興江州之鄱陽臨川十郡封
公爲陳公錫茲青土直以白茅爰定爾邦用建冢社昔旦奭分陝
俱爲保師晉鄭諸侯咸作卿士兼其內外禮實攸宜今命使持節
兼太尉王通授相國印綬陳公璽紱使持節兼司空王瑒授陳公
茅土金虎符第一至第五左竹使符第一至第十左相國秩踰三
鉉任總百司位絕朝班禮由事革以相國總百揆除錄尚書之號
上所假節侍中貂蟬中書監印章中外都督太傅印綬義興公印
策其鎮衛大將軍揚州牧如故又加公九錫其敬聽後命以公禮
爲楨幹律等銜策四維皆舉八柄有章是用錫公大輅戎輅各一
玄牲二駟以公賤寶崇穀疏爵待農室富京坻人知榮辱是用錫
公袞冕之服赤舄副焉以公調理陰陽燮諧風雅三靈允降萬國
同和是用錫公新縣之樂六佾之舞以公宣導王猷弘闡風光

景所照鞮象必是用錫公朱戶以居以公抑揚清濁褒德進賢
髦士盈朝幽人虛谷是用錫公納陛以登以公凝然廊廟爲世鎔
範折衝四表臨御八荒是用錫公虎賁之士三百人以公軌茲明
罰期在刑厝象恭無赦于紀必誅是用錫公斧鉞各一以公英猷
遠量跨厲嵩真包一車書括囊寰寓是用錫公彤弓一彤矢百盧
弓十盧矢千以公天經地義貫徹幽明春露秋霜允供粢盛是用
錫公秬鬯一卣圭瓚副焉陳國置丞相以下一遵舊式往欽哉其
恭循朕命克相皇天弘建邦家允興鴻業以光我高祖之休命十
月戊辰又進帝爵爲王以揚州之會稽臨海永嘉建安南徐州之
晉陵信安江州之尋陽豫章安成廬陵并前爲二十郡益封陳國
其相國揚州牧鎮衛大將軍並如故又命陳王冕十有二旒建天
子旌旗出警入蹕乘金根車駕六馬備五時副車置旄頭雲罕樂

舞八佾設鐘虜宮縣王妃王子王女爵命之號陳臺百官一依舊
典辛未梁帝禪位于陳策曰咨爾陳王惟昔上古厥初生人驪連
粟陸之前容成大庭之世杳冥恍忽故靡得而議焉自羲農軒昊
之君陶唐有虞之主或垂衣而御四海或無爲而子萬姓居之如
馭朽索去之如脫敝屣裁遇許由便能捨帝暫逢善卷卽以讓王
故知玄扈旋璣非闕尊貴金根玉輅示表君臨及南觀河渚東沈
刻璧菁華旣竭耄勤已倦則抗首而笑惟賢是與譏然作歌簡能
斯授遺風餘烈昭晰圖書漢魏因循是爲故實宋齊授受又弘斯
義我高祖應期撫運握樞御宇三后重光祖宗齊聖及時屬陽九
封豕荐食西都失馭夷狄交侵乃 天成輕弄龜鼎慄慄黔首若
崩厥角徽徽皇極將甚綴旒惟王乃聖乃神欽明文思二儀並運
四時合序天錫智勇人挺雄傑珠庭日角龍行虎步爰初投袂日

廼勤王電埽番禺雲轍彭蠡翦其元惡定我京畿及王賀帝弘質
茲冠履旣行伊霍用保冲人震澤稽塗並懷叛逆獯羯醜虜三亂
皇都裁命偏師二邦自殄薄伐獫狁六戎盡殪嶺南叛渙湘郢連
結賊帥旣禽凶渠傳首用能百揆時序四門允穆無思不服無遠
不届上達穹昊下漏深泉蛟魚並見謳歌攸屬况乎長彗橫天已
徵布新之兆璧日斯旣寔表更姓之符七百無常期皇王非一族
昔木德旣季而傳祚于我有梁天之歷數允集明哲式遵前典廣
詢羣議王公卿尹莫不攸屬敬從人祇之願授帝位于爾躬四海
困窮天祿永終王其允執厥中軌儀前式以副溥天之望禋郊祀
帝時膺大禮永固洪業豈不盛與又命璽書遣兼太保尚書左僕
射王通兼太尉司徒左長史王瑒奉皇帝璽紱受終之禮一依唐
虞故事是日梁帝遜于別宮帝謙讓再三羣臣固請乃許之永定

元年冬十月乙亥皇帝卽位于南郊柴燎告天曰皇帝臣霸先敢用玄牲昭告于皇皇后帝梁氏以圯剝荐臻歷運有極欽若天應以命于霸先夫肇有黎蒸乃樹司牧選賢與能未常厥姓有梁末運仍葉邁屯獯醜憑陵久移神器承聖在外非能祀夏天未悔禍復罹寇逆嫡嗣廢黜宗枝僭詐天地板蕩紀綱泯絕霸先爰初投袂大拯橫流重舉義兵實戡多難廢王立帝寔有厥功安國定社用盡其力是謂小康方期大道旣而煙雲表色日月呈祥除舊布新旣彰玄象遷虞事夏且協謳歌九域八荒同布衷欵百神羣祀皆有誠願梁帝高謝萬邦授以大寶霸先自惟菲薄讓德不嗣至于再三辭弗獲許僉以百姓須王萬機難曠皇靈眷命非可謙拒畏天之威用膺嘉祚永言夙志能無慚德敬簡元辰升壇受禪告類上帝用荅眎心永保于我有陳惟明靈尚饗先是氛霧雨雪晝

夜冥至是日景氣清晏禮畢輿駕還宮臨太極前殿大赦改元賜百姓爵二級文武二等鰥寡孤獨不能自存者人穀五斛逋租宿責皆勿復收有犯鄉論清議賊污淫盜者皆洗除先注與之更始其長徒赦擊特皆原之亡官失爵禁錮奪勞一依舊典又詔以江陰郡奉梁主爲江陰王行梁正朔車旗服色一依前準梁皇太后爲江陰國太妃皇后爲江陰國妃又詔百司各依位攝職丙子幸鍾山祭蔣帝廟戊寅幸華林園覽辭訟臨赦囚徒巳卯分遣大使宣勞四方庚辰詔出佛牙於杜姥宅集四部設無遮大會辛巳追尊皇考曰景皇帝廟號太祖皇妣董太夫人曰安皇后前夫人錢氏爲昭皇后世子克爲孝懷太子立夫人章氏爲皇后癸未尊景帝陵曰瑞陵昭皇后陵曰嘉陵依梁初園陵故事立刪定郎刊定律令戊子遷景皇帝神主附于太廟是月西討都督周文育侯

安都於郢州敗績没于王琳十一月丙申封皇兄子長城縣侯蒨
爲臨川郡王項襲封始興郡王皇弟子曇朗襲封南康郡王庚申
都下火十二月庚辰皇后謁太廟是歲周閔帝元年及九月冢宰
宇文護廢閔帝而奉明帝又爲明帝元年

二年春正月乙未以車騎將軍開府儀同三司侯瑱爲司空辛丑
祀南郊大赦甲寅遣中書舍人韋鼎策吳興楚王神爲帝戊午祀
明堂二月壬申南豫州刺史沈泰奔齊辛卯詔司空侯瑱總督水
陸衆軍以禦齊三月王琳立梁永嘉王蕭莊以奉梁後卽位于郢
州夏四月甲子祀太廟乙丑江陰王歿陳志也追謚梁敬帝詔太
宰弔祭司空監護喪事以梁武林侯蕭諮子李卿嗣爲江陰王戊
辰重雲殿東鴟尾有紫煙屬天五月乙未都下地震壬寅立梁邵
陵馮王廟室祭以太牢辛酉帝幸大莊嚴寺捨身壬戌羣臣表請

還官六月乙巳詔司空侯瑱領軍將軍徐度討王琳初侯景之平
也太極殿被焚承聖中議欲營之獨闕一柱秋七月有樟木大十
八圍長四丈五尺流泊陶家後渚監軍鄒子度以聞詔中書令沈
衆兼起部尚書構太極殿八月周文育侯安都等於王琳所逃歸
自劾廷尉卽日引見宥之並復本官丁亥加江州刺史周迪平南
將軍開府儀同三司冬十月庚午遣鎮南將軍周文育都督衆軍
出豫章討余孝勤乙亥幸莊嚴寺發金光明經題丁酉加高州刺
史黃法氈平南將軍開府儀同三司十二月甲子幸大莊嚴寺設
無碍大會捨乘輿法物羣臣備法駕奉迎卽日還宮丙戌加北江
州刺史熊曇朗平西將軍開府儀同三司

三年春正月丁酉鎮南將軍廣州刺史歐陽頎卽本號開府儀同
三司是夜大雪及旦太極殿前有龍跡見甲子廣州言仙人見于

羅浮山寺小石樓二月辛酉加平西將軍桂州刺史淳于量鎮西
大將軍開府儀同三司夏閏四月甲午詔依前代置西省學士兼
取伎術士是時久不雨丙午幸鍾山祭蔣帝廟是日降雨迄于月
晦五月丙辰朔日有蝕之有司奏舊儀帝御前殿服朱紗袍通天
冠詔曰此乃前代承用意有未同合朔仰助太陽宜備袞冕之服
自今永可爲準丙子扶南國遣使朝貢乙酉北江州刺史熊曇朗
殺都督周文育舉兵反王琳遣其將常衆愛曹慶率兵援余孝勸
六月戊子儀同侯安都敗衆愛等於左里獲琳從弟襲主帥羊暕
等四十餘人衆愛遁走庚寅廬山人斬之傳首建鄴甲午衆軍凱
歸丁酉帝不豫遣兼太宰尚書右僕射王通以疾告太廟兼太宰
中書令謝哲告太社南北郊辛丑帝小瘳故司空周文育之柩至
自建昌士寅帝素服哭于朝堂哀甚癸卯上臨訊獄訟是夜熒惑

在天尊上疾甚丙午帝崩于璿璣殿時年五十七遺詔追臨川王
蒨入續大業甲寅殯于太極殿西階八月甲午羣臣上謚曰武皇
帝廟號高祖丙申葬萬安陵帝雄武多英畧性甚仁愛及居阿衡
恒崇寬簡雅尚儉素常膳不過數品私饗曲晏皆瓦器蟬盤肴核
庶羞裁定克足不爲虛費初平侯景及立敬帝子女玉帛皆班將
士其克闡房者衣不重采飾無金翠聲樂不列於前踐祚之後彌
厲恭儉故能隆功茂德光于江左云

世祖文皇帝諱蒨字子華始興昭烈王之長子也少沈敏有識量
美容儀留意經史武帝甚愛之常稱吾家英秀梁太清初帝夢兩
日鬪一大一小大者光滅墜地色正黃其大如斗帝三分取一懷
之侯景之亂避地臨安縣郭文舉舊宅及武帝舉兵南下景遣吳
興太守信都遵收帝及衡陽獻王出都帝乃密抽小刀候見景欲

圖之及至以付郎中王翻幽守故其事不遂武帝圍石頭景欲加
害者數矣會景敗乃得出起家吳興太守武帝之討王僧辯也先
召帝與謀時僧辯塔杜龕據吳興兵眾甚盛武帝密令帝還長城
立柵備之龕遣將杜泰乘虛掩至將士相視失色帝言笑自若部
分並明於是眾心乃定及武帝遣周文育討龕帝遣將軍劉澄蔣
元舉攻下龕拜會稽太守武帝受禪立為臨川王夢梁武帝以寶
刀授已周文育侯安都之敗於沌口武帝詔帝入總軍政尋命率
兵城南皖永定三年六月丙午武帝崩皇后稱遺詔徵帝入纂皇
統甲寅至自南皖入居中書省皇后令帝嗣膺寶籙帝辭讓至于
再三公卿固請其日即皇帝位於太極前殿大赦詔州郡悉停奔
赴秋七月丙辰尊皇后為皇太后辛酉以司空侯瑱為太尉以南
豫州刺史侯安都為司空以南徐州刺史徐度為侍中中撫軍將

軍開府儀同三司乙丑重雲殿災八月庚戌立皇子伯茂為始興
王奉昭烈王後徙封始興嗣王瑱為安成王九月辛酉立皇子伯
宗為皇太子王公以下賜帛各有差乙亥立妃沈氏為皇后冬十
月甲子齊文宣帝殂十一月乙卯王琳寇大雷詔太尉侯瑱司空
侯安都儀同徐度御之是歲周明帝改天王稱皇帝復建年號曰
武成元年

天嘉元年春正月癸丑大赦改元詔賜鰥寡孤獨不能自存者人
粟五斛孝弟力田殊行異等加爵一級甲寅分遣使者宣勞四方
辛酉祀南郊詔賜人爵一級二月丙申太尉侯瑱敗王琳于梁山
敗齊兵于博望禽齊將劉伯球王琳及其主蕭莊奔齊庚子分遣
使者齎璽書宣勞四方乙巳遣太尉侯瑱鎮益城庚戌立武帝第
六子昌為衡陽王三月丙辰蕭莊所署郢州刺史孫瑒舉州內附

丁巳江州刺史周迪平南中斬賊帥熊曇朗傳首建鄴戊午齊軍
棄魯山城走詔南豫州刺史程靈洗守之丙子衡陽王昌沈于江
夏四月丁亥立皇子伯信爲衡陽王奉獻王後辛丑周明帝崩六
月辛巳改謚皇祖妣景安皇后曰景文皇后壬辰詔改葬梁元帝
於江寧舊塋車騎禮章悉同梁典仍依魏葬漢獻帝故事甲午追
策故始興昭烈王妃曰孝妃辛丑國哀周忌上臨于太極前殿百
僚陪哭赦建鄴殊死以下秋七月丙辰立皇子伯山爲鄱陽王八
月壬午齊孝昭帝廢其主殷而自立戊子詔非兵器及國容所須
金銀珠玉衣服雜玩悉皆禁斷丁酉幸正陽堂閱武九月癸丑彗
星見乙卯周將獨孤盛領水軍趣巴湘與賀若敦水陸俱進太尉
侯瑱自尋陽禦之冬十月癸巳侯瑱襲破獨孤盛於楊葉洲盛登
岍築城自保丁酉詔司空侯安都率衆會侯瑱南拒周軍十二月

巳亥周巴陵城主尉

憲降庚子獨孤盛潛遁走

二年春正月庚戌大赦辛未周湘州城主殷亮降湘州平二月庚
寅曲赦湘州諸郡三月乙卯太尉湘州刺史侯瑱薨夏六月巳亥
齊人通好秋七月丙午周將賀若敦遁歸武陵天門南平義陽河
東宜都郡悉平九月甲寅詔以故太尉侯瑱故司空周文育故關
府儀同三司杜僧明故中護軍胡穎故領軍陳擬配食武帝廟庭
冬十月癸丑霍州西山蠻率部內屬乙卯高麗國遣使朝貢十一
月甲辰齊孝昭帝殂十二月甲申立始興國廟于都下用王者禮
以國用不足立煮海鹽傳及權酷科先是縉州刺史留異應王琳
丙戌詔司空侯安都討之是歲周武帝保定元年
三年春正月庚戌設帷宮于南郊幣告胡公以配天辛亥祀南郊
詔賜人爵一級孝弟力田加一等二月梁宣帝殂閏月巳酉以百

濟王餘明爲撫東大將軍高麗王高湯爲寧東將軍江州刺史周
迪舉兵應留異甲子改鑄五銖錢三月丙子安成王頊至自周丁
丑以安右將軍吳明徹爲安南將軍江州刺史督衆軍南討甲申
大赦庚寅司空侯安都破留異於姚支嶺異奔晉安東陽郡平夏
四月癸卯曲赦東陽郡乙巳齊人來聘秋七月巳丑皇太子納妃
王氏在位文武賜帛各有差孝弟力田爲父後者賜爵二級九月
戊辰朔日有蝕之以侍中到仲舉爲尚書右僕射丁亥周迪請降
四年春正月丙午于阇利國遣使朝貢甲申周迪走投閩州刺史
陳寶應納之夏四月辛丑設無碍大會捨身於太極前殿乙卯加
驃騎將軍揚州刺史安成王頊開府儀同三司六月癸丑司空侯
安都賜死秋九月壬戌開府儀同三司廣州刺史歐陽頲薨癸亥
曲赦都下辛未周迪復寇臨川詔護軍將軍章昭達討平之冬十

二月丙申大赦詔昭達進軍建安討陳寶應

五年春三月壬午詔以故護軍將軍周鐵虎配食武帝廟庭夏五
月周齊並遣使來聘秋七月丁丑曲赦都下九月城西城冬十一
月巳丑章昭達禽陳寶應留異送建鄴晉安郡平甲辰以護軍將
軍章昭達爲鎮軍將軍開府儀同三司十二月甲子曲赦建安晉
安二郡討陳寶應將士死王事者並給棺槨送還本鄉并復其家
癸未齊人來聘

六年春正月甲午皇太子加元服王公以下賜帛各有差孝弟力
田爲父後者賜爵一級鰥寡孤獨不能自存者穀人五斛夏四月
甲寅以開府儀同三司揚州刺史安成王頊爲司空五月齊武成
帝僞位於太子緯自號太上皇帝六月辛酉彗星見于上台北周
人來聘秋七月癸未有大風自西南至廣百餘步激壞靈臺候樓

甲申儀賢堂無故自壞丙戌臨川太守駱牙斬周迪傳首建鄴梟於朱雀航八月己卯立皇子伯固爲新安王伯恭爲晉安王伯仁爲廬陵王伯義爲江夏王九月新作大航冬十月辛亥齊人來聘十二月乙卯立皇子伯禮爲武陵王癸亥曲赦都下

天康元年春二月丙子大赦改元三月己卯以司空安成王頊爲尚書令夏四月乙卯皇孫至澤生賜在位文武帛各有差爲父後者賜爵一級癸酉皇帝崩于有覺殿遺詔皇太子可卽君臨山陵務存儉速大斂竟羣臣三日一臨公除之制率依舊典六月甲子羣臣上謚曰文皇帝廟號世祖丙寅葬永寧陵文帝起自布衣知百姓疾苦國家資用務從儉約妙識真僞下不容姦一夜內刺閨取外事分判者前後相續每雞人伺漏傳籤於殿中者令投籤於階石上鎗然有聲云吾雖得眠亦令驚覺其自彊若此云

廢帝諱伯宗字奉業小字藥王文帝嫡長子也梁承聖三年五月庚寅生永定二年二月戊辰拜臨川王世子三年文帝嗣位八月庚戌立爲皇太子自梁室亂離東宮焚燼太子居于永福省天康元年四月癸酉文帝崩是日太子卽皇帝位于太極前殿大赦詔內外文武之復其職遠方悉停奔赴五月己卯尊皇太后曰太皇太后皇后曰皇太后庚寅以司空揚州刺史新除尚書令安成王頊爲司徒錄尚書都督中外諸軍事丁酉以中軍大將軍開府儀同三司徐度爲司空以鎮東將軍東揚州刺史始興王伯茂爲征東將軍開府儀同三司以吏部尚書袁樞爲尚書左僕射以吳興太守沈欽爲右僕射秋七月丁酉立妃王氏爲皇后冬十月庚申享太廟十一月乙亥周人來弔十二月甲子高麗國遣使朝貢是歲周天和元年

光大元年春正月癸酉尚書左僕射袁樞卒乙亥大赦改元賜孝
悌力田爵一級辛卯祀南郊二月辛亥南豫州刺史余孝頃謀反
伏誅三月甲午以尚書右僕射沈欽爲侍中尚書僕射夏五月乙
未湘州刺史華皎不從執政丙申以中撫軍大將軍淳于量爲征
南大將軍總舟師討之六月壬寅以中軍大將軍司空徐度爲車
騎將軍總督都下衆軍自步道襲湘州秋七月戊申立皇子至澤
爲皇太子賜天下爲父後者爵一級王公以下賚帛各有差九月
丙辰百濟國遣使朝貢是月周將拓拔定入郢州與華皎水陸俱
進都督淳于量吳明徹等大破之皎單舸奔江陵禽定送建鄴冬
十月辛巳曲赦湘巴二州爲皎所誑誤者十一月甲子中權將軍
開府儀同三司王冲薨十二月庚寅以儀同三司兼從事中郎孔
英哲爲奉聖亭侯奉孔子祀

二年春正月己亥司徒安成王頊進位太傅領司徒加殊禮以新
除征南大將軍淳于量爲中軍大將軍及安南將軍湘州刺史吳
明徹卽本號並開府儀同三司庚子詔討華皎軍人死王事者並
給棺槨送還本鄉仍復其家甲子司空徐度薨夏五月丙辰太傅
安成王頊獻玉璽一六月丁亥彗星見秋七月戊申新羅國遣使
朝貢壬戌立皇弟伯智爲永陽王伯謀爲桂陽王九月林邑狼牙
修國並遣使朝貢冬十一月甲寅慈訓太后令曰伯宗昔在儲宮
本無令問及居崇極遂騁凶淫太傅親承顧託義深垣屏而贊塗
未御翌日無淹仍遣劉師知殷不佞等顯言排斥陰謀禍亂賴元
相維持但除君側又以余孝頃密邇京師便相徵召宗社之靈祇
氛是滅於是密謂華皎稱兵上流國祚憂惶幾移醜類又別敕歐
陽紇等攻逼衡州嶺表紛紜殊淹弦望但賊豎皆亡日望懲改而

惇禮忘德情性不悛盪主侯法喜等太傅麾下恒游府內啗以深
利謀與肘腋又盪主孫泰等潛相連結大有交通天誘其衷自然
開發此諸文迹今以相示豈可復肅恭禋祀臨御生靈今可特降
為臨海郡王送還潘邸太傅安成王固天生德齊聖廣深二后鍾
心三靈佇眷自前不豫任總邦家威惠相宣刑禮兼設且地彰
靈墮天表長彗布初除舊禎祥咸顯文皇知子之鑒事甚帝堯傳
弟之懷又符太伯今可還申舊志崇立賢君中外宜依舊典奉迎
輿駕是日帝出居別第太建二年四月乙卯薨時年十九帝性仁
弱無人君之器及卽尊位政刑皆歸冢宰故宣太后稱文帝遺志
而廢焉

論曰陳武帝以雄毅之姿屬殷憂之運功存拯溺道濟橫流應變
無方蓋惟人傑及乎西都盪覆江表帖危僧辯任同伊尹空結桐
宮之恨貞陽入假秦兵不息穆羸之泣帝乘隙以舉乃蹈玄機王
業所基始自於此柴天改物蓋有憑云文帝以宗枝承統情存兢
惕加以崇尚儒術愛悅文義恭儉行已勤勞濟物志度弘遠有前
哲之風至于臨下明察得永平之政矣臨海懦弱有同于帝孳文
后雖欲不鑒殷道蓋亦其可得耶

南史卷九 陳本紀上第

魏州中鳳堂
氏閣南中

南史卷十

陳本紀下第十

魏州中鳳堂
氏閣南中

高宗孝宣皇帝諱頊字紹世小字師利始興昭烈王第二子也梁
中大通二年七月辛酉生有赤光滿室少寬容多智畧及長美容
儀身長八尺三寸垂手過膝有勇力善騎射武帝平侯景鎮京口
梁元帝徵武帝子姪入侍武帝遣帝赴江陵累官為中書侍郎時
有軍主李總與帝有舊每同遊處帝嘗夜被酒張燈而寐總適出
尋反乃見帝是大龍便驚走他室魏平江陵遷于長安帝貌若不
慧魏將楊忠門客張子煦見而奇之曰此人虎頭當大貴也永定
元年遙襲封始興郡王文帝嗣位改封安成王天嘉三年自周還
授侍中中書監中衛將軍置佐吏歷位司空尚書令廢帝即位拜
司徒錄尚書都督中外諸軍事光大二年正月進位大尉領司徒

南史卷十

加殊禮劔履上殿十一月甲寅慈訓太后黜廢帝爲臨海王以帝入纘皇統是月齊武成帝殂

太建元年春正月甲午皇帝卽位於太極前殿大赦改元文武賜位一階孝悌力田及爲父後者賜爵一級鰥寡不能自存者人賜穀五斛復太皇太后尊號曰皇太后立妃柳氏爲皇后世子叔寶爲皇太子封皇子江州刺史康樂侯叔陵爲始興王奉昭烈王祀一未謁太廟丁酉分命大使觀省四方風俗以尚書僕射沈欽爲左僕射度支尚書王勸爲右僕射辛丑祀南郊壬寅封皇子建安侯叔英爲豫章王豐城侯叔堅爲長沙王二月乙亥耕藉田夏五月甲午齊人來聘丁巳以吏部尚書徐陵爲尚書右僕射秋七月辛卯皇太子納妃沈氏王公以下賜帛各有差冬十月新除左衛將軍歐陽紇據廣州反辛未遣開府儀同三司章昭達討之

二年春二月癸未章昭達禽歐陽紇送都斬于建康市廣州平三月丙申皇太后崩丙午曲赦廣衡二州丁未大赦又詔自討周迪華皎以來兵所有死亡者並令收斂并給棺槨送還本鄉夏四月乙卯臨海王伯宗薨戊寅皇太后祔葬于萬安陵五月壬午齊人來弔六月戊子新羅國遣使朝貢辛卯大雨雹乙巳分遣大使巡州郡省冤屈冬十一月辛酉高麗國遣使朝貢十二月癸巳雷三年春正月癸丑以尚書右僕射徐陵爲尚書僕射辛酉祀南郊二月辛巳祀明堂丁酉耕藉田三月丁丑大赦夏四月壬辰齊人來聘五月辛亥高麗新羅丹丹天竺盤盤等國並遣使朝貢六月丁亥江陰王蕭季卿以罪免甲辰封東中郎長沙王府諮議參軍蕭彝爲江陰王冬十月乙酉周人來聘十二月壬辰司空章昭達薨

四年春正月丙午以尚書僕射徐陵爲左僕射中書監王勸爲右僕射二月乙酉立皇子叔卿爲建安王三月乙丑扶南林邑國並遣使朝貢夏五月癸卯尚書右僕射王勸卒是月周人誅冢宰宇文護秋八月辛未周人來聘九月庚子朔日有蝕之辛亥大赦丙寅以故太尉徐度儀同三司杜稜程靈洗配食武帝廟庭故司空章昭達配食文帝廟庭冬十一月己亥地震是歲周建德元年五年春正月癸酉以吏部尚書沈君理爲尚書右僕射領吏部辛巳祀南郊二月辛丑祀明堂乙卯夜有白氣如虹自北方貫北斗紫宮三月壬午以開府儀同三司吳明徹都督征討諸軍事略地北邊丙戌西衡州獻馬生角己丑皇孫胤生內外文武賜帛各有差爲父後者賜爵一級夏六月癸卯周人來聘秋九月癸未尚書右僕射沈君理卒壬辰晦夜明冬十月己亥以特進周弘正爲尚

書右僕射乙巳吳明徹尅壽陽城斬王琳傳首建鄴梟于朱雀航十二月壬辰詔熊曇朗留異陳寶應周迪鄧緒等及王琳首並還親屬以弘廣宥乙巳立皇子叔明爲宜都王叔獻爲河東王是歲諸軍略地所在尅捷

六年春正月壬戌赦江右淮北諸州甲申周人來聘高麗國遣使朝貢二月壬辰朔日有蝕之辛亥耕藉田夏四月庚子彗星見六月壬辰尚書右僕射周弘正卒冬十一月乙亥詔北邊行軍之所並給復十年十二月戊戌以吏部尚書王瑒爲尚書右僕射

七年春正月辛未祀南郊三月辛未詔豫二兗譙徐合霍南司定九州及南豫江郢所部在江北諸郡置雲旗義士往大軍及諸鎮備防夏四月丙戌有星孛于大角庚寅監豫州陳桃根獻青牛詔以還百姓乙未桃根又上織成羅紋錦被表各二詔於雲龍門外

焚之壬子郢州獻瑞鍾六六月丙戌詔爲北行將士死王事者尅日舉哀壬辰以尚書右僕射王瑒爲尚書僕射巳酉改作雲龍神獸門秋八月癸卯周人來聘閏九月壬辰都督吳明徹大破齊軍於呂梁是月甘露頻降樂游苑丁未輿駕幸苑採甘露宴羣臣詔於苑龍舟山立甘露亭冬十月巳巳立皇子叔齊爲新蔡王叔文爲晉熙王十二月壬戌以尚書僕射王瑒爲左僕射太子詹事陸繕爲右僕射甲子南康郡獻瑞鍾一

八年春二月壬申以開府儀同三司吳明徹爲司空夏五月庚寅尚書左僕射王瑒卒六月甲寅以尚書右僕射陸繕爲左僕射新除晉陽太守王克爲右僕射秋九月戊戌立皇子叔彪爲淮南王九年春正月乙亥齊主傳位於其太子恒自號太上皇是月周滅齊二月壬子耕藉田秋七月巳卯百濟國遣使朝貢庚辰大雨震

萬安陵華表巳丑震慧日寺刹及瓦官寺重門一女子震死冬十月戊午司空吳明徹破周將梁士彥於呂梁十二月戊申東宮成皇太子移于新宮

十年春二月甲子周軍救梁士彥大敗司空吳明徹於呂梁及將卒皆見囚俘不反三月辛未震武庫丙子分命衆軍以備周乙酉大赦夏四月庚戌詔絰在軍者並賜爵二級又詔御府堂署所營造禮樂儀服軍器之外悉皆停息掖庭常供王侯妃主諸有奉卹者並各量減庚申大雨雹六月丁酉周武帝崩閏六月丁卯大雨震大皇寺刹莊嚴寺露盤重陽閣東樓千秋門內槐樹及鴻臚府門秋七月戊戌新羅國遣使朝貢八月戊寅隕霜殺稻菽九月乙巳立方明壇于婁湖戊申以揚州刺史始興王叔陵兼王官伯臨盟甲寅幸婁湖臨誓衆乙卯分遣大使以盟誓班下四方以上下

相警冬十月戊子以尚書左僕射陸繕爲尚書僕射十二月乙亥
合州廬江蠻田伯興出寇樅陽刺史魯廣達討平之是歲周宣政
元年

十一年春正月丁酉南充州言龍見二月癸亥耕藉田秋七月辛
卯初用大貨六銖錢八月丁卯幸大壯觀閱武冬十月甲戌以尚
書僕射陸繕爲尚書左僕射以祠部尚書晉安王伯恭爲右僕射
十一月辛卯大赦戊戌周將梁士彥圍壽陽尅之辛亥又尅霍州
癸丑以揚州刺史始興王叔陵爲大都督總督水步衆軍十二月
乙丑南北克晉三州及盱台山陽陽平馬頭秦歷陽沛北譙南梁
等九郡民並自拔向建鄴周又尅譙北徐二州自是淮南之地盡
歸于周矣己巳詔非軍國所須多所減損歸于儉約是歲周宣帝
大象元年

十二年夏四月癸亥尚書左僕射陸繕卒己卯大雩壬午雨五月
癸巳以尚書右僕射晉安王伯恭爲尚書僕射己酉周宣帝崩六
月壬戌大風吹壞臯門中闔秋八月己未周鄖州總管司馬消難
以所統九州八鎮之地來降詔因以消難爲大都督加司空封隨
郡公庚申詔鎮西將軍樊毅進督兵漢諸軍事遣南豫州刺史任
忠率衆趨歷陽超武將軍陳慧紀爲前軍都督趨南充州戊辰以
司空司馬消難爲大都督水陸諸軍事庚午通直散騎常侍淳于
陵尅臨江郡癸酉智武將軍魯廣達尅郭默城甲戌大雨霖丙子
淳于陵尅柘州城九月癸未周臨江太守劉顯光率衆來降是夜
天東南有聲如風水相激三夜乃止丁亥周將王延貴率衆援歷
陽任忠擊破之禽延貴等己酉周廣陵義軍主曹藥率衆來降冬
十月癸丑大雨震電十二月庚辰南徐州刺史河東王叔獻薨

十三年春正月壬午以中權將軍護軍鄱陽王伯山卽本號
開府儀同三司以尚書僕射晉安王伯恭爲左僕射吏部尚書袁
憲爲右僕射二月乙亥耕藉田秋九月癸亥夜大風從西北來發
屋拔樹大雨雹冬十月壬寅丹丹國遣使朝貢十二月辛巳彗星
見西南是歲周靜帝大定元年遜位于隋文帝改元開皇元年
十四年春正月己酉上弗豫甲寅崩于宣福殿時年五十三遺詔
凡厥終制事從省約金銀之飾不以入壙明器皆用瓦以日易月
及公除之制悉依舊準在位百司三日一臨四方州鎮五等諸侯
各守所職並停奔赴二月辛卯羣臣上謚曰孝宣皇帝廟號高宗
癸巳葬顯寧陵帝之在田本有恢弘之度及居尊位寔允天人之
屬于時國步初弭創痍未復淮南之地並入于齊帝志復舊境意
反侵地疆弱之形理則縣絕犯斯不韙適足爲禽及周兵滅齊乘

勝而舉略地還至江際自此懼矣旣而修飾都城爲扞禦之備獲
銘云二百年後當有癡人修破吾城者時莫測所從云

後主諱叔寶字元秀小字黃奴宣帝嫡長子也梁承聖二年十一
月戊寅生于江陵明年魏平江陵宣帝遷于長安留後主於穰城
天嘉三年歸建鄴立爲安成王世子光大二年累遷侍中太建元
年正月甲午立爲皇太子十四年正月甲寅宣帝崩一卯始興王
叔陵構逆伏誅丁巳太子卽皇帝位于太極前殿大赦在位文武
及孝悌力田爲父後者並賜爵一級孤老鰥寡不能自存者賜穀
人五斛帛二匹癸亥以侍中丹陽尹長沙王叔堅爲驃騎將軍開
府儀同三司揚州刺史乙丑尊皇后爲皇太后丁卯立皇弟叔敦
爲始興王奉昭烈王祀乙巳立妃沈氏爲皇后辛未立皇弟叔儼
爲尋陽王叔慎爲岳陽王叔達爲義陽王叔熊爲巴山王叔虞爲

武昌王甲戌設無碍大會於太極前殿三月癸亥詔內外衆官九品以上各薦一人又詔求忠讜無所隱諱己巳以新除翊左將軍永陽王伯智爲尚書僕射夏四月丙申立皇子永康公胤爲皇太子賜天下爲父後者爵一級王公以下賚帛各有差庚子詔鏤金銀薄庶物化生土木人綵華之屬及布帛短狹輕疎者並傷財廢業尤成蠹患又僧尼道士挾邪左道不依經律人間淫祀祆書諸珍怪事詳爲條制並皆禁絕秋七月辛未大赦是月自建鄴至荊州江水色赤如血八月癸未天有聲如風水相激乙酉夜又如之九月丙午設無碍大會於太極前殿捨身及乘輿御服大赦辛亥夜天東北有聲如蟲飛漸移西北丙寅以驃騎將軍開府儀同三司揚州刺史長沙王叔堅爲司空征南將軍江州刺史豫章王叔英卽本號開府儀同三司

至德元年春正月壬寅大赦改元以江州刺史豫章王叔英爲驃騎將軍開府儀同三司以司空揚州刺史長沙王叔堅爲江州刺史征東將軍開府儀同三司癸卯立皇子深爲始安王秋八月丁卯以驃騎將軍開府儀同三司長沙王叔堅爲司空九月丁巳天東南有聲如蟲飛冬十月丁酉立皇弟叔平爲湘東王叔敖爲臨賀王叔宣爲陽山王叔穆爲西陽王叔儉爲南安王叔澄爲南郡王叔興爲沅陵王叔韶爲樂山王叔純爲新興王十二月丙辰頭和國遣使朝貢司空長沙王叔堅有罪免戊午夜天開自西北至東南其內有青黃雜色隆隆若雷聲

二年春正月丁卯分遣大使巡省風俗癸巳大赦夏五月戊子以吏部尚書江總爲尚書僕射秋七月壬午皇太子加元服在位文武賜帛各有差孝悌力田爲父後者賜爵一級鰥寡癯老不能自

存者人穀五斛冬十一月丙寅大赦是月盤盤百濟國並遣使朝貢

三年春正月戊午朔日有蝕之庚午鎮左將軍長沙王叔堅卽本號開府儀同三司三月辛酉前豐州刺史章大寶舉兵反夏四月庚戌豐州義軍主陳景詳斬大寶傳首建鄴冬十月己丑丹丹國遣使朝貢十一月己未詔修復仲尼廟辛巳幸長干寺大赦十二月癸卯高麗國遣使朝貢是歲梁明帝殂

四年春正月甲寅詔王公以下各薦所知無隔輿阜二月丙申立皇弟叔讓爲巴東王叔顯爲臨江王叔坦爲新寧王叔隆爲新寧王夏五月丁巳立皇子莊爲會稽王秋九月甲午幸玄武湖肄艦艦閱武丁未百濟國遣使朝貢冬十月癸亥以尚書僕射江總爲尚書令吏部尚書謝朓爲尚書僕射十一月己卯大赦

禎明元年春正月戊寅大赦改元乙未地震秋九月庚寅梁太傅安平王蕭巖荊州刺史蕭巖遣其都官尚書沈君公詣荊州刺史陳紀請降辛卯巖等帥其文武官男女濟江甲午大赦冬十一月丙子以蕭巖爲平東將軍開府儀同三司東揚州刺史丁亥以驃騎大將軍開府儀同三司豫章王叔英爲兼司徒十二月丙辰以前鎮衛大將軍開府儀同三司東揚州刺史鄱陽王伯山爲鎮衛大將軍開府儀同三司

二年春正月辛巳立皇子恮爲東陽王恬爲錢唐王夏四月戊申有羣鼠無數自蔡洲岸入石頭淮至于清塘兩岸數日自死隨流入江是月郢州南浦水黑如墨五月甲午東冶鑄鐵有物赤色大如數升自天墜鎔所有聲隆隆如雷鐵飛出墻外燒人家六月戊戌扶南國遣使朝貢庚子廢皇太子胤爲吳興王立揚州刺史始

安王深爲皇太子辛丑以太子詹事袁憲爲尚書僕射丁巳大風自西北激濤水入石頭城淮渚暴溢漂没舟乘冬十月己亥立皇子潘爲吳王己酉幸幕府山大校獵十一月丁卯詔尅日於大政殿訊獄丙子立皇弟叔榮爲新昌王叔匡爲太原王初隋文帝受周禪甚敦鄰好宣帝尚不禁侵掠太建末隋兵大舉聞宣帝崩乃命班師遣使赴弔修敵國之禮書稱姓名頓首而後主益驕書末云想彼統內如宜此宇宙清泰隋文帝不說以示朝臣清河公楊素以爲主辱再拜請罪及襄邑公賀若弼並奮求致討後副使袁彥聘隋竊圖隋文帝狀以歸後主見之大駭曰吾不欲見此人每遣間牒隋文帝皆給衣馬禮遣以歸後主愈驕不虞外難荒于酒色不恤政事左右嬖佞珥貂者五十人婦人美貌麗服巧態以從者千餘人常使張貴妃孔貴人等八人夾坐江總孔範等十人預

宴號曰狎客先令八婦人襪采箋製五言詩十客一時繼和遲則罰酒君臣酣飲從夕達旦以此爲常而盛修宮室無時休止稅江稅市徵取百端刑罰酷濫牢獄常滿覆舟山及蔣山栢林冬月常多采醴後主以爲甘露之瑞前後災異甚多有神自稱老子游于都下與人對語而不見形言吉凶多驗得酒輒醕之經三四年乃去船下有聲云明年亂視之得嬰兒長三尺而無頭蔣山衆鳥鼓兩翼以拊膺曰柰何帝柰何帝又建鄴城無故自壞青龍出建陽門井涌霧赤地生黑白毛大風拔朱雀門臨平湖草舊塞忽然自通後主又夢黃衣圍城乃盡去繞城橘樹又見大蛇中分首尾各走夜中索飲忽變爲血有血霑階至於坐牀頭而火起有狐入其牀下捕之不見以爲祆乃自賣於佛寺爲奴以禳之於郭內大皇佛寺起七層塔未畢火從中起飛至石頭燒死者甚衆又采木湘

州擬造正寢棧至牛渚磯盡沒水中既而漁人見棧浮于海上起齊雲觀國人歌曰齊雲觀寇來無際畔始北齊末諸省官人多稱省主未幾而滅至是舉朝亦有此稱識者以爲省主將見省之兆隋文帝謂僕射高頴曰我爲百姓父母豈可限一衣帶水不拯之乎命大作戰船人請密之隋文帝曰吾將顯行天誅何密之有使投柀於江若彼能改吾又何求及納梁蕭巖蕭巖隋文愈忿以晉王廣爲元帥督八十總管致討乃送璽書暴後主二十惡又散寫詔書書三十萬紙徧喻江外諸軍既下江濱鎮戍相繼奏聞新除湘州刺史施文慶中書舍人沈客卿掌機密並抑而不言初蕭巖蕭巖之至也德教學士沈君道夢殿前長人朱衣武冠頭出欄上攘臂怒曰那忽受叛蕭誤人事後主聞之忌二蕭故遠散其衆以巖爲東揚州刺史巖爲吳州刺史使領軍任忠出守吳興郡以

襟帶二州使南平王嶷鎮江州永嘉王彥鎮南徐州尋召二王赴期明年元會命緣江諸防船艦悉從二王還都爲威勢以示梁人之來者由是江中無一鬪船上流諸州兵皆阻楊素軍不得至都下甲士尚十餘萬人及聞隋軍臨江後主曰王氣在此齊兵三度來周兵再度至無不摧沒虜今來者必自敗孔範亦言無渡江理但秦伎縱酒作詩不輟

三年春正月乙丑朔朝會大霧四塞入人鼻皆辛酸後主昏聩至晡時乃罷是日隋將賀若弼自北道廣陵濟韓擒虎趨橫江濟分兵晨襲采石取之進拔姑熟次於新林時弼攻下京口緣江諸戍望風盡走弼分兵斷曲阿之衝而入丙寅采石戍主徐子建至告變戊辰乃下詔曰犬羊陵縱侵竊郊畿蠡蠹有毒宜時掃定朕當親御六師廓清八表內外並可戒嚴於是以蕭摩訶爲皇畿大都

督樊猛爲上流大都督樊毅爲下流大都督司馬消難施文慶並
爲大監軍重立賞格分兵鎮守要害僧尼道士盡皆執役庚午賀
若弼攻陷南徐州辛未韓擒虎又陷南豫州隋軍南北道並進辛
巳賀若弼進軍鍾山頓白土岡之東南衆軍敗績弼乘勝進軍宮
城燒北掖門是時韓擒虎率衆自新林至石子岡鎮東大將軍任
忠出降擒虎仍引擒虎經朱雀航趣宮城自南掖門入城內文武
百司皆遁出唯尚書僕射袁憲後閣舍人夏侯公韻侍側憲勸端
坐殿上正色以待之後主曰鋒刃之下未可交當吾自有計乃逃
於井二人苦諫不從以身蔽井後主與爭久之方得入沈后居處
如常太子深年十五閉閣而坐舍人孔伯魚侍焉戍士叩閣而入
深安坐勞之曰戎旅在塗不至勞也旣而軍人窺井而呼之後主
不應欲下石乃聞叫聲以繩引之驚其太重及出乃與張貴妃孔

貴人三人同乘而上隋文帝聞之大驚開府鮑宏曰東井上於天
文爲秦今王都所在投井其天意邪先是江東謠多唱王獻之桃
葉辭云桃葉復桃葉度江不用楫但渡無所苦我自迎接汝及晉
王廣軍於六合鎮其山名桃葉果乘陳船而度丙戌晉王廣入據
臺城送後主於東宮三月巳巳後主與王公百司同發自建鄴之
長安隋文帝權分京城人宅以俟內外修整遣使迎勞之陳人謳
詠忘其亡焉使還奏言自後主以下大小在路五百里纍纍不絕
隋文帝嘆曰一至於此及至京師列陳之車服器物於庭引後主
於前及前後二太子諸父諸弟衆子之爲王者凡二十八人司空
司馬消難尚書令江總僕射袁憲驃騎蕭摩訶護軍樊毅中領軍
魯廣達鎮軍將軍任忠吏部尚書姚察侍中中書令蔡徵左衛將
軍樊猛自尚書郎以上二百餘人文帝使納言宣詔勞之次使內

史令宣詔讓後主後主伏地屏息不能對乃見宥隋文帝詔陳武
文宣三帝陵總給五戶分守之初武帝始即位其夜奉朝請史普
直宿省夢有人自天而下導從數十至太極殿前北面執玉策金
字曰陳氏五帝三十二年及後主在東宮時有婦人突入唱曰畢
國主有鳥一足集其殿庭以嘴畫地成文曰獨足上高臺盛草變
爲灰欲知我家處朱門當水開解者以爲獨足蓋指後主獨行無
衆盛草言荒穢隋承火運草得火而灰及至京師與其家屬館于
都水臺所謂上高臺當水也其言皆驗或言後主名叔寶反語爲
少福亦敗亡之徵云既見有隋文帝給賜甚厚數得引見班同三
品每預宴恐致傷心爲不奏吳音後監守者奏言叔寶云既無秩
位每預朝集願得一官號隋文帝曰叔寶全無心肝監者又言叔
寶常耽醉空有醒時隋文帝使節其酒既而曰任其性不爾何以

過日未幾帝又問監者叔寶所嗜對曰嗜驢肉問飲酒多少對曰
與其子弟日飲一石隋文帝大驚及從東巡登芒山侍飲賦詩曰
日月光天德山川壯帝居太平無以報願上東封書并表請封禪
隋文帝優詔謙讓不許後從至仁壽宮常侍宴及出隋文帝目之
曰此敗豈不由酒將作詩功夫何如思安時事當賀若弼度京口
彼人密啓告急叔寶爲飲酒遂不省之高頰至日猶見啓在牀下
未開封此亦是可笑蓋天亡也昔苻氏所征得國皆榮貴其主苟
欲求名不知違天命與之官乃違天也隋文帝以陳氏子弟既多
恐京下爲過皆分置諸州縣每歲賜以衣服以安全之後主以隋
仁壽四年十一月壬子終於洛陽時年五十二贈大將軍封長城
縣公謚曰煬葬河南洛陽之芒山
論曰陳宣帝器度弘厚有人君之量文帝知冢嗣仁弱早存太伯

之心及乎弗念咸已委託矣至於續業之後拓土開疆蓋德不逮
文智不及武志大不已晚致呂梁之敗江左日蹙抑此之由也後
主因削弱之餘鍾滅亡之運刑政不樹加以荒淫夫以三代之隆
歷世數十及其亡也皆敗於婦人况以區區之陳外鄰明德覆車
之跡尚且追蹤叔季其獲支數年亦爲幸也雖忠義感慨致慟并
隅何救麥秀之深悲適足取笑乎千祀嗟乎始梁末童謠云可憐
巴馬子一日行千里不見馬上郎但見黃塵起黃塵汚人衣阜莢
相料理及僧辯滅羣臣以謠言奏聞曰僧辯本乘巴馬以擊侯景
馬上郎王字也塵謂陳也而不解阜莢之謂旣而陳滅于隋說者
以爲江東謂殺羊角爲阜莢隋氏姓楊楊羊也言終滅於隋然則
興亡之兆蓋有數云

南史卷十

陳本紀第十

終

薛公中圖章
氏書向甫出

